



# *THEOT Deuteronomy in IES 294*

Ff. 211r–259v

Draft 1, Text of Deuteronomy in Mahabire Hawariyat electronic edition; the following people were involved in creating second, third, and fourth drafts: Jeremy Brown, Ralph Lee, Rowan Williams, Shaun Short, Jonah Sanford, Ashlee Maslik, Curt Niccum, Brian Jeanseu, and Jarod Jacobs; Draft 5, Hiwot Samuel; Draft 6, Steve Delamarter and Daniel Assefa; Draft 7, Ralph Lee

*Nota Bene:* Images can be viewed at the British Library Endangered Archives programme website at <https://eap.bl.uk/archive-file/EAP286-1-1-397#?xywh=-237%2C0%2C4345%2C2591&cv=210>

## Chapter 1

Deut 01:00 አራት ዳግም ሕግ

Deut 01:01 ዝንቱ ውእቱ ነገር ዘነገሮሙ ሙሴ ለደቂቀ እስራኤል በማዕድተ ዮርዳንስ በመንገለ ዓረቢሃ ሰጥቦ ባሕረ ኢርትራ በመእከለ ፋራን ጦፌል ወቦሎን ወአውሎን ወዘኪረስያ።

Deut 01:02 በዓሡር መዋዕል በኮሬብ በፍኖት በደብረ ሴይር እስከ ቃዴስ በርኔ።

Deut 01:03 ወኮነ አመ አርበዓ ዓም አመ ዓሡርቱ ወአሐዱ አውርኅ አመ ሠርቀ ወርኅ ነገሮሙ ሙሴ ለኹሎሙ ደቂቀ እስራኤል ኹሎ ዘአዘዘ እግዚአብሔር ይንግሮሙ።

Deut 01:04 እምድኅረ ቀተልዎ ለሴዎን ንጉሠ አሞሬዎን ዘይነብር ውስተ ሔሴቦን ወአግ ንጉሠ ባሳን ዘይነብር ውስተ አስጣሮት ወኤኔዴራይን።

Deut 01:05 በማዕድተ ዮርዳንስ ውስተ ምድረ ሞአብ ወአኅዘ ሙሴ ይንግሮሙ ዘንተ ሕገ ወይቤ እግዚአብሔር አምላክነ ነገረነ በኮሬብ ወይቤለነ የአከለክሙ ኅድሩ

Deut 01:06 ውስተ ዝንቱ ደብር ተንሥኡ እንከ ወግብኡ ወባኡ ውስተ ደብረ አሞሬዎን ወውስተ ኹሎ ማኅደረ አራባ ውስተ ደብሩ ወውስተ ገዳሙ ወውስተ ሊባ ወውስተ ጳራልያ ዘምድረ ከናኣን ወአንጢሊባኖን እስከ ፈለግ ዐቢይ ፈለገ አፍራጥስ

Deut 01:07 ናሁ ወሀብኩክም ለይእቲ ምድር እንተ መሐልኩ ለአበዊክሙ ቅድሜክሙ ለአብርሃም ወለይስሐቅ ወለያዕቆብ ከመ አሀቦሙ ሎሙ ወለዘርአሙ እምድኅሬሆሙ ምድር እንተ ትውኅዝ ሐሊበ ወመዓረ።

Deut 01:08 ወእቤለክሙ በውእቶን መዋዕል እንዘ እብል ኢይክል ባሕቲትየ ክሂሎትክሙ እስመ አብዘኀን እግዚአብሔር አምላክነ።

Deut 01:09 ወናሁ ብዙኃን አንትሙ የም ከመ ከዋክብተ ሰማይ።

Deut 01:10 ወያበዝኅክሙ እግዚአብሔር አምላክሙ ለአበዊክሙ እምእልፊት ወለይበርክሙ በከመ ይቤለክሙ።

Deut 01:11 ወእፎ እክል በሕቲትየ ጸማክሙ ወሥራሕክሙ ወተበህሎትክሙ።

Deut 01:12 አውፅኡ ለክሙ ዕደወ ጠቢባነ ወለበዊያነ ወማእምራነ ዘዘ ነገዶሙ ወእሠይሞሙ ለኹሎሙ መሳፍንቲ ክሙ።

Deut 01:13 ወአውሥአክሙኒ ወትቤሉኒ ሠናይ ዝንቱ ቃል ወትቤሉኒ ግበር ከማሁ።

Deut 01:14 ወነሣእኩ እምውስቴትክሙ ዕደወ ጠቢባነ ወማእምራን ወለባዊያን ወሢምክዎሙ ላዕሌክሙ ይኩኑክሙ ሐበይተ ወመሳፍንተ ወነገሥተ ሕዝበ ወሊቃናተ ወጸሐፍቶሙ ለመኳንንቲክሙ።

Deut 01:15 ወእቤሎሙ በውእቶን መዋዕል ሰምዑ ማእከለ አኃዊክሙ ወአግብኡ ፍትሐ በጽድቅ ማእከለ ብእሲ ወእኅሁ ወማእከለ ግዩር

Deut 01:16 ወኢትንሣእ ገጸ በፍትሕ ኢለንኡስ ወኢለዓቢይ ይኩንን ወኢትንሣእ ገጸ ሰብእ እስመ ፍትሕ ዘእግዚአብሔር ውእቱ ወለእመቦ ዘተዓፀበክሙ (ነ)ገር ታዓርጉ ኀቤየ ወእሰምዕ።

Deut 01:17 ወአዘዝኩክሙ በውእቶን መዋዕል ኩሎ ዘትገብሩ ቃለ።

Deut 01:18 ወግዕዝነ እምነ ኮሬብ ወሐርነ ኩሎ ዝክተ ገዳመ ዓቢየ ወግሩመ ዘርኢክሙ በፍኖተ ደብረ አሞሬወን በከመ አዘዘነ እግዚአብሔር አምላክነ ወበዓኅነ እስከ ቃዴስ በርኔ።

Deut 01:19 ወነገርኩክሙ በውእቶን መዋዕል ወእቤለክሙ ብጽሑ እስከ ደብረ አሞሬዎን ዘይሁበክሙ እግዚአብሔር አምላክክሙ።

Deut 01:20 ወናሁ ርእዩ ከመ ወሀበክሙ እግዚአብሔር አምላክክሙ ይእተ ምድረ ቅድመ ገጽክሙ ዕረጉ እንከ ወተዋረስዋ በከመ ይቤሎሙ እግዚአብሔር አምላክሙ ለአበዊነ ወኢትፍርሁ ወኢትደንግፁ።

Deut 01:21 ወእምዝ መጻእክሙ ኩልክሙ ኀቤየ ወትቤሉኒ (ን)ፈኑ ዕደወ ቅድሜነ ወይርአይዋ ለይእቲ ምድር ለነ ወይዜንወነ ዜናሃ ለይእቲ ፍኖት እንተ ሀለወተነ ንዕርግ ውስቴታ ወአህጉርኒ እለ ሀለወነ ንባእ ውስቴቶን።

Deut 01:22 ወአደመኒ ውእቱ ነገር ወነሣእኩ እምውስቴትክሙ ዐሠርተ ወክልኤተ ዕደወ በበ አሐዱ ብእሲ እምውስተ ነገድ።

Deut 01:23 ወተመይጡ ወዓርጉ ውስተ ቈለት ዓጽቅ ወርእዩ።

Deut 01:24 ወነሥኡ ምስሌሆሙ እምውስተ ፍሬሃ ለይእቲ ምድር ወአምጽኡ ኀቤነ ወንቤ ሠናይት ምድር እንተ ይሁበነ እግዚአብሔር አምላክነ።

Deut 01:25 ወአበይክሙ ዓረገ ወክሕድክሙ በቃለ እግዚአብሔር አምላክክሙ።

Deut 01:26 ወአንጐርጐክሙ በውስተ ተዓይኒክሙ ወትብሉ እስመ ይጸልክነ እግዚአብሔር አውፅክነ እምድረ ግብጽ ከመ ያግብክነ ውስተ እዴሆሙ ለአሞሬዎን ከመ ይሠርውነ አይቱ እንከ ነዓርግ ንሕነ።

Deut 01:27 ወባሕቱ አኃዊክሙ አክሐድዎ ለልብክሙ ወይቤሉክሙ ዓቢይ ሕዝብ ወብዙኀን ወይጽንዑ እምኔነ (ወ)አህጉሪሙኒ ዓበይት ወገንቱ ጥቅመ ዘይበጽሕ እስከ ሰማይ ወርኢነ በህየ ደቂቆሙ ለእለ ያርብኀ።

Deut 01:28 ወእቤለክሙ በውእቶን መዋዕል ወኢትፍርሁ ወኢትደንግፁ እምኔሆሙ።

Deut 01:29 እግዚአብሔር አምላክክሙ ውእቱ ይፀብእ ምስሌክሙ ውእቱ የሐውር ቅድመ ገጽክሙ በከመ ኩሉ ዘገብረ ለክሙ በምድረ ግብጽ።

Deut 01:30 ወበውስተ ዝንቱ ገዳም ዘርኢክሙ ዘከመ ሴሰየክሙ እግዚአብሔር አምላክክ ከመ ይሴሲ ብእሲ ወልዶ በኩሉ ፍኖት እንተ ሓርክሙ እስከ በጽሐክሙ ውስተ ዝንቱ መካን።

Deut 01:31 ወኢአመንክምዎ በዝንቱ ቃለ (ለ)እግዚአብሔር አምላክክሙ ዘየሐውር ቅድሜክሙ ውስተ ፍኖት ከመ ይሕረይ ለክሙ መካነ ወይምራሕክሙ ሌሊት በእሳ(ት) ከመ ያርኢክሙ ፍኖት እንተ ተሐውሩ ውስቴታ ወመዓልትኒ በደመና።

Deut 01:32 ወሰምዐ እግዚአብሔር ቃለ ነገርክሙ ወተምዐ ወመሐለ ወይቤ ከመ ኢይርእይዎ እሉ ዕደው ለይእቲ ምድር ቡርክት እንተ መሐልኩ ለአበዊሆሙ እንበለ ካሌብ ወልደ ዮፎኔ።

Deut 01:33 ውእቱ ዘይሬኢያ ወሎቱ እሁባ ለይእቲ ምድር እንተ ውስቴታ ዓረገ ወለ ደቂቁ እስመ ኀበ እግዚአብሔር ውእቱ ልቡ።

Deut 01:34 ወኪያየኒ ተምዕዓኒ እግዚአብሔር በእንቲ(አ)ክሙ ወይቤለኒ አንተሂ ኢትበውእ ህየ።

Deut 01:35 እስመ ኢየሱስ ወልደ ኔዌ ዘይቀውም ቅድሜከ ውእቱ ዘይበውእ ህየ ኪያሁ አጽንዖ እስመ ውእቱ ያወርሶሙ ይእተ ምድር ለእስራኤል።

Deut 01:36 ወ(ለ)ደቂቅክሙ እለ ትብሉ ይዲወው ወኩሎ ሕፃን ንኡስ ዘኢያአምር ዮም ሠናይተ ወእኪተ እሙንቱ ይበውኡ ህየ ወሎሙ እሁባ ወእሙንቱ ይትዋረስዋ።

Deut 01:37 ወአንትሙስ ተመየጥክሙ ወገዓዝክሙ ውስተ ገዳሙ ፍኖተ ባሕረ ኤርትራ።

Deut 01:38 ወአውሳእክሙኒ ወትብሉኒ አበስነ ቅድመ እግዚአብሔር አምላክነ ነዓርግ ንሕነ ወንትቃተል ኩሎ በከመ አዘዘነ እግዚአብሔር አምላክነ ወነሳእክሙ ብእሴ ብእሴ ንዋያ ሐቅሉ ወዓረግሙ ውስተ ደብረ።

Deut 01:39 ወይቤለኒ እግዚአብሔር በሎሙ ኢትዕርጉ ኦ ወኢትትቃተሉኦ እስመ ኢህለውኩኦ ምስሌክሙኦ ከመኦ ኢትትቀጠቀጡኦ ቅድመኦ ፀርክሙኦ።

Deut 01:40 ወነገርኩክሙ ወኢሰማዕክሙኒ ወተዓወርክሙ ቃለ እግዚአብሔር ወተነየልክሙኒ ወዓርግሙ ውስተ ደብረ።

Deut 01:41 ወወፅኡ አሞራዊያን እለ ይነብሩ ውስተ ውእቱ ደብር ወተቀበሉክሙ ወአንጥዑክሙ ወሰደዱክሙ ወነደፉክሙ ከመ ንህብ ወወግኡክሙ እምነ ሴይር እስከ ኤርማ።

Deut 01:42 ወነበርክሙ ወበከይክሙ ቅድመ እግዚአብሔር ወኢሰምዐክሙ ቃለክሙ ወኢነጸረክሙ።

Deut 01:43 ወነበርክሙ ውስተ ቃዴስ ብዙኅ መዋዕለ አምጣነ ነበርክሙ ቀዲሙ ህየ።

## Chapter 2

Deut 02:01 ወተመየጥነ ወ{.}ሖርነ ውስተ ገዳም ፍኖተ ባሕር ኤርትራ በከመ ይቤለነ እግዚአብሔር ወኦድናሁ ለድብረ ሴይር ብዙኅ መዋዕለ።

Deut 02:02 ወይቤለኒ እግዚአብሔር ኮንክሙ አዋዲቶ ለዝንቱ ደብር ግብኡ እንከሰ ለመንገለ መስዕ።

Deut 02:03 ወአዝዞሙ ለሕዝብ ወበሎሙ ናሁ ተሐውሩ አንትሙ እንተ አድዊሊሆሙ ለአጋዊክሙ ለደቂቀ ዔሳው እለ ይነብሩ ውስተ ሴይር ወይፈርሆክሙ ጥቀ።

Deut 02:04 ዑቁ ኢትትቃተሉ ምስሌሆሙ እስመ ኢእሁብክሙ እምውስተ ምድሮሙ ርስተ ወኢመስጋረ እግር እስመ መክፈልቶ ወሀብክ[ም]ዎ ለዔሳው ደብረ ሴይር።

Deut 02:05 ተሳየጡ እክለ በኅቤሆሙ በወርቅክሙ [ወ]ተሴሰዩ ወማየኒ በመስፈርት ንስኡ በኅቤሆሙ በወርቅክሙ ወስትዩ እስመ በረከክ እግዚአብሔር አምላክከ በኩሉ ግብረ እደዊከ።

Deut 02:06 አእምር እፎ ዓደውካሁ ለ(ዝን)ቱ ገዳም ዓቢይ ዘግሩም ውእቱ ናሁ አርበዓ ዓም ሀለወ እግዚአብሔር ምስሌክ እንዘ አልቦ ዘየጎጥአክ እምዘ ነበብከ።

Deut 02:07 ወተዓደውናሆሙ ለአጋዊክሙ ለደቂቀ ዔሳው እለ ይነብሩ ውስተ ሴይር ኀበ ፍኖተ አራባ እምነ ኤሎም ወእምነ ጋስዮን ጋቤር፡፡ ወእምዝ ተመየጥነ ወተዓደውና ፍኖተ ገዳም ዘሞአብ።

Deut 02:08 ወይቤለኒ እግዚአብሔር ኢትጻረርዎሙ ለሞአባዊያን ወኢትትቃተሉ ምስሌሆሙ እስመ ኢይሁብክሙ ርስተ እምነ ምድሮሙ እስመ ለደቂቀ ሎጥ ወሀብክዎሙ ርስቶሙ ሴይር።

Deut 02:09 ወአሚን ወቀደሙ ነቢረ ውስቴታ ሕዝብ ዓቢይ ጥቀ ወጽኑዓን ከመ እለ ውስተ አቂም።

Deut 02:10 ራፋን ይከውኑ እሙንቱኒ ከመ እለ ውስተ አቂም ወሞአባዊያን ወዘሚን ይብልዎሙ።

Deut 02:11 ወኮረዮስ ውስተ ሴይር ይነብሩ ቀዲሙ ወደቂቀ ዔሳው አጥፍእዎሙ ወቀጥቀጥዎሙ እምቅድመ ገጽሙ ወነበሩ መካኖሙ ከመ ገብርዋ እስራኤል ለምድረ ርስቶሙ እንተ ወሀቦሙ እግዚአብሔር።

Deut 02:12 ወይእዜኒ ተንሥኡ ወገዕዙ አንትሙ ወሐሩ ውስተ ቈላተ ዛሬድ ወተዓደውናሁ ለቈላተ ዛሬድ።

Deut 02:13 ወመ(ዋ)ዕሊሁ በዘ ቦንቱ እምቃዴስ በርኔ እስከ ተዓደውናሁ ለቈላተ ዛሬድ ሠላሳ ወስመንቱ ዓመት እስከ ሞቱ ኩሎሙ ዕደው ዘይእቲ ትውልድ እለ መስተቃትላን እሙንቱ ወጠፍኡ እምነ ማእከለ ትዕይንት በከመ መሐለ ሎሙ እግዚአብሔር እግዚእ።

Deut 02:14 እስመ እደ እግዚአብሔር ሀለወት ለዕሌሆሙ ከመ ታጥፍአሙ እምነ መእከለ ትዕይንት እስከ ወድቁ።

Deut 02:15 ወኮነ እምዘ ወድቁ ኩሎሙ ውእቱሙ ዕደው መስተቃትላን ወሞቱ እምነ መእከለ ሕዝብ።

Deut 02:16 ወነበቦ እግዚአብሔር ለሙሴ ወይቤሎ ናሁ ተሐውር ውስተ አድዋለ ሞአብ ዘሴይር ወትበጽሕ ቅሩቦሙ ለደቂቀ ዓማን።

Deut 02:17 ወኢትጻረርዎሙ ወኢትትአንዙ ቀትለ ምስሌሆሙ እስመ ኢይሁብክሙ እምነ ምድሮሙ ለደቂቀ ዐማን ርስተ ወለደቂቀ ሎጥ ወሀብክዎሙ መክፈላቶሙ።

Deut 02:18 ወረፋይን ትትኖለቀኑ እስመ ረፋይን ይነብሩ ውስቴታ ቀዲሙ ወዐማውያንሰ ዘሚን ይብልዎሙ።

Deut 02:19 ሕዝብ ዓቢይ ወብዙኅ ወጽኑዓን ወኅያላን ከመ እለ አቂም ወአጥፍአሙ እግዚአብሔር እምቅድመ ገጽሙ።

Deut 02:20 ወተዋረስዎሙ ወነበሩ ህየንቴሆሙ ከመ ገብሩ ለደቂቀ ዔሳው እለ ይነብሩ ውስተ ሴይር በከመ አስዓሮሙ እግዚአብሔር ለከራውያን እምቅድመ ገጽሙ ወተዋረስዎሙ ወነበሩ ህየንቴሆሙ እስከ ዛቲ ዕለት።

Deut 02:21 ወሐዋውያንኒ እለ ይነብሩ ውስተ አሴሮት እስከ ጋዜስ ወቀጵዶቅያ ወአጥፍእምሙ ወነበሩ ህየንቴሆሙ።

Deut 02:22 ወይእዜኒ ተንሥኡ ወግዕዙ አንትሙ ወተዓደውዎ ለቄላተ አርኖን (ናሁ) አግባእክዎ ለሴዎን ንጉሠ ሔሴቦን ኮርያዊ ወለምድሩ ወምልካ ወተዋረሳ ወአሐዞሙ ወተቃተሎሙ።

Deut 02:23 ወበዛቲ ዕለት ቅድመ አምጽኦ ላዕለ ኩሉ አሕዛብ እለ ሀለው መትሕተ ሰማይ ከመ ይፍርሁከ ወይርዓዱ እምኔከ (ወ)ይደንግዱ እምከመ ሰምዑ ስመከ ወትሕዞሙ ፍርሀት እምቅድመ ገጽከ።

Deut 02:24 ወፈነው(ኩ) ተናብልተ እምነ ገዳም ዘቆዲሞት ኀበ ሴዎን ንጉሠ ሔሴቦን በቃለ ሰላም እንዘ ትብል እሕልፍኦ እንተኦ ምድርከኦ ወፍኖተኦ አሐውርኦ ኢእትገሐስኦ ኢለየማን ወኢለፀጋም።

Deut 02:25 እክለኒኦ በወርቅየኦ ትሁብኒኦ ወእሰትየ ወዳእሙኦ እሕልፍኦ በእግርየኦ።

Deut 02:26 በከመ ገብሩኦ ሊተኦ ደቂቀ ዔሳውኦ እለኦ ይነብሩኦ ውስተኦ ሴይርኦ ወሞአባዊያንኒኦ እለኦ ይነብሩኦ ውስተ አሮየርኦ እስከኦ ተዓደውክዎኦ ለዮርዳኖስኦ ውስተኦ ምድርኦ እንተኦ ወሀበነኦ እግዚአብሔርኦ አምላክነኦ።

Deut 02:27 ወአበየ ሴዎን ንጉሠ ሔሴቦን አሕልፎተነ (እንተ) ኀቤሁ እስመ አጽንዐ እግዚአብሔር አምላክነ መንፈሶ ወአእከዮ (ለልቡ) ከመ ይግባእ ውስተ እዴነ በይእቲ ዕለት።

Deut 02:28 ወይቤለኒ እግዚአብሔር ናሁ አሐዝኩ አግብኦ ውስተ እዴከ በቅድመ ገጽከ ለሴዎን ንጉሠ ሔሴቦን አሞርያዊ ወምድሮሙሂ ወአሐዝ ተዋረሰ ምድሮ ርስተ።

Deut 02:29 ወወፅኦ ሴዎን ወተቀበለነ ውእቱ ወኩሉ ሕዝቡ ከመ ይትቃተለነ በኢያሱ።

Deut 02:30 ወአግብኦ እግዚአብሔር አምላክነ ውስተ እደዊነ ወቀተልናሁ ሎቱ ወለኩሉ ደቂቁ ወለኩሉ ሕዝቡ።

Deut 02:31 ወነሣእነ ኩሎ አህጉሪሁ በውእቶን መዋዕል ወአጥፈእናሆን ለኩሎ አህጉሪሁ ወአንስቲያሆሙኒ ወደቂቆሙኒ ወአልቦ ዘአትረፍነ ነፋዲተ እምኔሆሙ ዘእንበለ እንስሳሆሙ ዘማህረክነ ለነ ወበርበርነ አህጉሪሆሙ ።

Deut 02:32 ዘነሣእነ እምነ አሩኤር እንተ ማዕዶተ ፈለገ አርኖን ወሀገርኒ እንተ ሀለወት ውስተ ቄላት እስከ ደብረ ገለአድ።

Deut 02:33 ወአልቦ ሀገረ እንተ አምሰጠተነ እስመ ኩሎ አህጉረ አግብኦ እግዚአብሔር አምላክነ ውስተ እደዊነ ዘእንበለ ውስተ ምድረ ደቂቀ ዐሞን ዘኢበጽሐነ።

Deut 02:34 ወኩሎ ዘውስተ ፈለገ ያቦቅ ወአህጉር ዘውስተ ቴርኔ በከመ አዘዘነ እግዚአብሔር አምላክነ።

## Chapter 3

Deut 03:01 ወተመየጥነ ወዓረግነ ውስተ ፍኖተ ባሳን ወወፅአ አግ ንጉሠ ባሳን ተቀበለነ ውእቱ ወኵሎ ሕዝቡ ውስተ ኤድራይን ከመ ይትቀትለነ።

Deut 03:02 ወይቤለኒ እግዚአብሔር ኢትፍርሆ እስመ ውስተ እዴክ አገብኦ ወለኵሎ ሕዝቡ ወለኵሎ ምድሩ ወትገብሮ ከመ ገበርካሁ ለሴዎን ንጉሠ አሞሬዎን ዘይነብር ውስተ ሔሴቦን።

Deut 03:03 ወአግብኦ እግዚአብሔር አምላክነ ውስተ እዴነ ለአግ ንጉሠ ባሳን ወለኵሎሙ ሕዝቡ ወቀተልናሁ እስከ ኢያትረፍናሁ እምኔሆሙ ዘርኦ።

Deut 03:04 ወአስተጋባእነ ኵሎ አህ(ጉ)ሪሁ በውእቶን መዋዕል ወአልቦቱ ሀገረ እንተ ኢነሣእነ እምኔሆሙ ስሳ አህጉር ኵሎ ዘኣድያማ ለአርጎ ዘመንግሥቱ ለአግ በባሳን።

Deut 03:05 ወኵሎን አህጉር (እለ) ቦንቶን ጥቅመ [ወ]ነዋሕት አረፋቲሆን ወቦንቱ ዴዳተ ወመናስግተ ዘእንበለ አህጉረ ፌሬዜዎን እለ ብዙኃት እማንቱ ጥቀ።

Deut 03:06 ወሰረውናሆሙ በከመ ገበርነ በሴዎን ንጉሠ ሔሴቦን ወአጥፍኦነ ኵሎ አህጉር ኅቡረ ወአንስቲያሆሙ[ኒ] ወደቂቆሙኒ እስከ ኢያትረፍነ ነፋጺተ።

Deut 03:07 ወኵሎ እንስሳሆሙ ወምህርካ ዘበርበርነ እምነ አህጉሪሆሙ።

Deut 03:08 ወነሣእነ ምድሮሙ በውእቶን መዋዕል እምውስተ እደዊሆሙ ለክልኤቱ ነገሥት አሞሬዎን እለ ሀለው ማዕዶተ ዮርዳኖስ እምፈለገ አርኖን ዘይብሉ እስከ አኤርሞን ዘይብልዎ ሰብኦ ፍንቄስ አዲርሞን ወሰኒዮርስ ወአሞሬዎን ይብልዎ ሳኒር።

Deut 03:09 ኵሎ አህጉር ዘመንግሥተ አሰሚሶር ወኵሎ ዘገለአድ ወኵሎ ዘባሳን እስከ ኤልካድ ወኤድራይን ሀገረ መንግሥቱ ለአግ ብባሳን እንተ አትረፉ ረፋይን።

Deut 03:10 ወናሁ ዓራቱ ዓራተ ኅጺን ወናሁ ሀለወት ውስተ ጽንፎሙ ለደቂቀ ዐሞን ተስዓ በእመት ኑኃ ወርብዕ በእመት ግድማ በእመት ብእሲ።

Deut 03:11 ወበርበርናሃ ለይእቲ ምድር በውእቶን መዋዕል እምአሮኤር እንተ ውስተ ማዕዶተ ፈለገ አርኖን ወመንፈቁ ለደብረ ገለአድ ወአህጉሪሁኒ ወሀብክዎሙ ለሮቤል ወለጋድ።

Deut 03:12 ወዘተርፈ እምነ ገለአድ ወኵሎ ባሳን መንግሥቶ ለአግ ወሀብክዎሙ ለመንፈቀ ነገዱ ለምናሴ ወኵሎ አድያሚሃ ለአርጎብ ኵሎ ዘንተ ባሳን ዘይትኃለቑ ውስተ ምድረ ረፋይን።

Deut 03:13 ወእ{.}ያእር ወልደ ምናሴ ነሥኦ ኵሎ አድያሚሃ ለአርጎብ እስከ ደወለ ገርጋሲ ወመካጢ ሰመዮን በስሙ ለባሳን አውታይ እስከ ዛቲ ዕለት ወለማኪር ወሀብክዎ ገለአድ።

Deut 03:14 ወለሮቤል ወለጋድ ወሀብክዎሙ እምነ ምድረ ገለአድ እስከ ፈለገ አርኖን ዘማእከለ ፈለገ አድባር ወእስከ ኢያቦቅ ፈለገ አድባር ለደቂቀ ዐሞን።

Deut 03:15 ወአራባ ወዮር(ዳ)ንስ ወሰኖሙ ለመኮናራ ወእስከ ባሕረ አራባ ባሕረ አሊቄ እም አሴዶን ዘፈሰጋ ጽባሒሁ።

Deut 03:16 ወአዝኩክሙ በውእቶን መዋዕል ወእቤለክሙ እግዚአብሔር አምላክክሙ ወሀብክምዎ ለዛቲ ምድር መክፈልትክሙ ከመ ትሖሩ ቅድመ አኅዊክሙ ምስለ ንዋየ ሐቅልክሙ ቅድሜሆሙ ለደቂቀ እስራኤል ኩሉ ኀይል።

Deut 03:17 ዘእንበለ አንስቲያክሙ ወደቂቅክሙ፡፡ ወአአምር ከመሂ ብዙኀ እንስሳ ብክሙ።

Deut 03:18 ወይነብር ባሕቱ ውስተ አህጉረ{.}ክሙ ዘወሀብኩክሙ እስከ አመ ያዓርፎሙ እግዚአብሔር አምላክነ ለአኅዊክሙ ከማክሙ።

Deut 03:19 ወይወርሱ እሙንቱኒ ምድረ እንተ ይሁቦሙ እግዚአብሔር አምላክነ በማዕዶተ ዮርዳንስ ወእምዝ ትገብኡ ኩልክሙ ውስተ ርስትክሙ ዘወሀብኩክሙ።

Deut 03:20 ወአዝክዎ ለኢየሱስኒ በውእቶን መዋዕል ወእቤሎ ርእያ አዕይንቲክሙ ኩሎ ዘገብረ እግዚአብሔር በእሉ ክልኤቱ ነገሥት ከማሁ ይገብር እግዚአብሔር በኩሉ መንግሥት ኀበ ተኃውር አንተ ህየ ወኢትፍርሁ እምኔሆሙ እስመ እግዚአብሔር ይፀብኦሙ ለክሙ።

Deut 03:21 ወሰአልክዎ ለእግዚአብሔር በውእቶን መዋዕል ወእቤሎ እግዚአብሔር አንተ አኀዝክ ታርእዮ ለገብርክ ጽንዓክ ወኀይለክ ወ(ጽ)ንዐ እዴክ ወልዕልና መዝራዕትክ ወመኑ ውእቱ አምላክ በሰማይ ወበምድር ዘይገብር በከመ ገበርክ አንተ።

Deut 03:22 አበሐኒ እዕዱ ወእርአያ ለይእቲ ምድር ቡርክት ይእቲ እንተ ሀለወት ማዕዶተ ዮርዳንስ ወውእቱ ደብር ቡሩክ ወአንጢሊባኖን።

Deut 03:23 ወተጸመመኒ እግዚአብሔር ወኢሰምዓኒ ወይቤለኒ እግዚአብሔር ኮነክ አከለክ ወኢትድግም እንክ ተናገሮ ዘንተ ቃለ ዕርግ ውስተ ርእሰ ዘውቅሮ።

Deut 03:24 ወነጽር በአዕይንቲክ መንገለ ባሕር ወመስዕ ወአዝያብ ወሠረቀ ወርኢ በአዕይንቲክ እስመ ኢተዓድዎ ለዝንቱ ዮርዳንስ።

Deut 03:25 ወአዘዘ ለኢየሱስ ወአጸንዖ ኪያሁ እስመ ውእቱ ይዓዱ ቅድሜሁ ለዝንቱ ሕዝብየ ወውእቱ ያወርሶሙ ምድረ እንተ ርኢከ።

Deut 03:26 ወነበርነ ውስተ ወግር ኀበ ቤተ ፎጎር።

## Chapter 4

Deut 04:01 ወይእዚኒ እስራኤል ስምዑ ኩነኒሁ ወፍትሖ ዘእሜህረክሙ ኣነ ዮም ከመ ትግበሩ ወትሕየው ወትትባዝኑ ወትባኡ ወትትዋረስዋ ለምድር እንተ ይሁበክሙ እግዚአብሔር ኣምላኮሙ ለአበዊክሙ።

Deut 04:02 ኢትወስኩ ላዕለ ቃል ዘእኤዝዘክሙ ኣነ ዮም ወኢታንትጉ እምኒሁ ከመ ትዕቀቡ ኩሎ ትእዛዞ ለእግዚአብሔር ኣምላክክሙ።

Deut 04:03 ኣዕይንቲክሙ ርእያ ኩሎ ዘገብረ እግዚአብሔር በቤዔል ፌጎር እስመ ኩሎ ብእሲ ዘተለወ ወሖረ ድጎረ በዔል ፌጎር ቀጥቀጦ እግዚአብሔር ኣምላክክሙ እምኒክሙ።

Deut 04:04 ወኣንትሙስ እለ ገባእክሙ ኀበ እግዚአብሔር ኣምላክክሙ ሕያው ኩልክሙ ዮም።

Deut 04:05 ናሁ ርእዩ ዘኣርኣይኩክሙ ኩነኒ ወፍትሖ በከመ ኣዘዘኒ እግዚአብሔር እግበር ከማሁ በምድር እንተ ትበውኡ ህዩ ኣንትሙ ከመ ትትዋረስዋ።

Deut 04:06 ወዕቀብዎ ወግበርዎ እስመ ውእቱ ጥበቢክሙ ወኣእምሮትክሙ በቅድሙ ኩሎ ኣሕዛብ እለ ይሰምዕዎ ለዝንቱ ኩሎ ኩነኒ ወይብሉ ናሁ ሕዝብ ጠቢብ ወመእምር ሕዝብ ዐቢይ ውእቱ ዝንቱ

Deut 04:07 ወመኑ ውእቱ ሕዝብ ዐቢይ ዘቦቱ {.}ኣምላክ ዘይቀርብ ከመ ኣምላክነ እግዚአብሔር በኩሎ ዘጸዋዕናሁ።

Deut 04:08 ወመኑ ውእቱ ሕዝብ ዐቢይ ዘቦቱ ኩነኒ ወፍትሖ ዘጽድቅ በከመ ኩሎ ዝንቱ ሕግ ዘኣነ እሁበክሙ ዮም ቅድሚክሙ።

Deut 04:09 ዑቅ ርእሰክ ወዕቀብ ነፍሰክ ጥቀ ከመ ኢትርሳዕ ኩሎ ዘንተ ነገረ ዘርእያ ኣዕይንቲክሙ ወኢይፃእ እምነ ልብክ በኩሎ መዋዕለ ሕይወትክ ወመህሮሙ ለደቂቅክ ወለደቂቅ ደቂቅክ።

Deut 04:10 ወኣይድዖሙ ዕለተ ቆምክሙ ቅድመ እግዚአብሔር ኣምላክክሙ በኮሬብ ኣመ ዕለተ ተጋባእክሙ እስመ ይቤለኒ እግዚአብሔር ኣስተጋብኦሙ ለሕዝብ ኀቤየ ወይስምዑ ቃልየ ከመ ይትሜህሩ ፈሪሆትየ በኩሎ መዋዕል እለ ቦቱ የሐይው እሙንቱ ላዕለ ምድር ወይሜህሩ ለደቂቆሙ።

Deut 04:11 ወመጽኣክሙ ወቆምክሙ ተሐተ ደብር ወይነድድ ደብሩ በእሳት እስክ ሰማይ ወጽልመት ወዓውሎ ወጣቃ።

Deut 04:12 ወነበበኒ እግዚአብሔር እምነ መእከለ እሳት ወሰማዕክሙ ኣንትሙ ቃሎ እንዘ ይትናገር ወርእየቶስ ኢርኢክሙ ዘእንበለ ቃሎ።

Deut 04:13 አይደላም ኪዳኖ ዘአዘዘክም ከመ ትግበር ዓሥሩ ቃለ ወጸሐፎን ውስተ ክልኤቱ ጽላት ዘእብን።

Deut 04:14 ወሊተኒ አዘዘኒ እግዚአብሔር ከመ እምህረክም በውእቶን መዋዕል ኩነኔ ወፍትሕ ዘትገብሩ ላዕለ ምድር እንተ ውስቴታ ትበውኡ አንትሙ ትትዋረስዋ።

Deut 04:15 ወዕቀቡ ጥቀ ነፍስክም እስመ ኢርኢክም ርእየቶ በይእቲ ዕለት እንተ ባቲ ተነገረክም እግዚአብሔር በኮሬብ በውስተ ደብር እምነ መእከለ እሳት ወኢትጌጊዩ።

Deut 04:16 ወኢትግበሩ ለክም ግልፎ በአምሳለ ኩሉ ምስል በአምሳለ ተባዕት አው ዘአንስት።

Deut 04:17 በአምሳለ ኩሉ እንስሳ ዘሀለወ ለዕለ ምድር ወበአምሳለ ኩሉ ሶፍ ሠራሪት ዘይሠርር መትሕተ ሰማይ።

Deut 04:18 ወበአምሳለ ኩሉ ሕያው ዘይትጎወሥ ላዕለ ምድር ወበአምሳለ ኩሉ ዓሣ ዘሀለወ ውስተ ማይ መትሕተ ምድር።

Deut 04:19 ወእም ነጸርከ ሰማየ ወርኢከ ፀሐየ ወወርኅ ወከዋክብተ ወኩሎ ስርጓቲሃ ለሰማይ ዮጊ ትጌጊ[ዮ] ወትሰግድ ሎሙ ወታመልኩሙ ለእለ ገብረ እግዚአብሔር አምላክክ ለኩሉ አሕዛብ ዘተሕተ ሰማይ።

Deut 04:20 ወኪክምሰ ነሥኦክም እግዚአብሔር ወአውፅኦክም እምነ እቶን ጎጺን እምነ ግብጽ ከመ ትኩንዎ መክፈልተ ሕዝቡ እስከ ዛቲ ዕለት።

Deut 04:21 ወተመዕዕኒ እግዚአብሔር በእንተ ዘትቤሎ አንትሙ ወመሐለ ከመ ኢይዕድው ለዝንቱ ዮርዳኖስ ከመ ኢይበእ ውስተ ምድር እንተ ይሁበክ እግዚአብሔር አምላክክ ርስተ።

Deut 04:22 እስመ አንሰ እመውት በዚቲ ምድር ወኢየዕድው ለዮርዳኖስ ወአንትሙሰ ተዓድውዎ ወትወርስዋ ለይእቲ ምድር ቡርክት።

Deut 04:23 ወዑቁ እንከ አንትሙ ኢትርስዑ ኪዳኖ ለእግዚአብሔር አምላክክም ዘተካየደ ላዕሌክም ወአበስክም ወገበርክም ለክም ግልፎ በአምሳለ ኩሉ ምስለ ዘበእንቲአሁ ቀሠፈከ እግዚአብሔር አምላክክ።

Deut 04:24 እሳት እንተ ታጋልቅ ውእቱ ወአምላክ ቀናኢ ውእቱ።

Deut 04:25 ለእመ ወለድከ ደቂቀ ወአዋልደ ወደቂቀ ደቂቅከ ወጐንደይክም ላዕለ ምድር ወአበስክም ወገበርክም ለክም በምሳለ ኩሉ ወገበርክም እኪተ ቅድመ እግዚአብሔር አምላክክም ከመ ተምዕዕዎ።

Deut 04:26 ናሁ አሰምዕ ላዕሌክም ሰማየ ወምድረ ከመ ትጠፍኡ ወትደመሰሱ እምነ ምድር እንተ ውስቴታ አንትሙ ተዕድውዎ ለዮርዳኖስ ህየ ትትዋረስዋ ወኢትጐንድዩ መዋዕለ ውስቴታ እለ ተቀጥቅጦ ትትቀጠቀጡ።

Deut 04:27 ወይዘርወክም እግዚአብሔር ውስተ አሕዛብ ወትተርፉ ውሑዳን በኖልቁ ውስተ አሕዛብ እለ ውስቴቶም ያበውኦክም እግዚአብሔር ህየ።

Deut 04:28 ወታመልኮ በህየ አማልክተ ባዕደ ግብረ እደ እጃለ እመሕያው ዕፀወ ወእበነ እለ ኢይሬኢዩ ወኢይሰምዑ ወኢይበልዑ ወኢያጹንው።

Deut 04:29 ወእምዝ ተጎሥሥዎ ለእግዚአብሔር አምላክክሙ በህየ ወትረክብዎ ሶበ ጎሠሥክምዎ በኩሉ ልብክሙ ወበኩሉ ነፍስክሙ በሕማምክሙ።

Deut 04:30 ወይረክበክሙ ኩሉ ዝንቱ ነገር በዳጎሪ መዋዕል ወትትመየጡ ጎበ እግዚአብሔር አምላክክሙ ወይሰምዐክሙ።

Deut 04:31 እስመ አምላክ መሓሪ ውእቱ እግዚአብሔር አምላክክ ኢይጋድገክ ወኢያጠፍኣክ ወኢይረስዕ ኪዳኖሙ ለአበዊክ ዘመሐለ ሎሙ እግዚአብሔር።

Deut 04:32 ተሰኣሎ ዘቀዲሙ መዋዕል ዘኮነ እምቅድሜክ እምአመ ፈጠሮ እግዚአብሔር ለእጃለ እመሕያው ዲበ ምድር እምጽንፈ ሰማይ እስከ ጽንፈ ሰማይ ለእመ ኮነ ከመ ዝንቱ ነገር ወለእመ ኮነ ከመዝ።

Deut 04:33 ወለእመ ሰምዐ ሕዝብ ቃለ እግዚአብሔር አምላክ ዘሕያው እንዘ ይትናገር እምነ መእከለ እሳት በከመ ሰማዕክ አንተ ወሐየውከ።

Deut 04:34 ለእመ አመከረ እግዚአብሔር ወቦአ ወነሥኦ ሎቱ ሕዝባ እምነ መእከለ ሕዝብ በአመክሮ ወበተአምር ወበመድምም ወበቀትል ወበእድ ጽንዕት ወበመዝራዕት ልዑል ወበመደንግፅ ዐበይት በከመ ኩሉ ዘገብረ እግዚአብሔር በምድረ ግብጽ በቅድሜክ እንዘ ትሬኢ።

Deut 04:35 ከመ ታእምር ከመ ውእቱ እግዚአብሔር አምላክ ወአልቦ ባዕደ እንበሌሁ።

Deut 04:36 እምሰማይ ተሰምዐ ቃሉ ከመ ይምህርክ ወበምድር አርኣየ እሳቶ (ዐቢየ) ወሰማዕክ ቃሉ እምነ መእከለ እሳት።

Deut 04:37 እስመ ያፈቅሮሙ ለአበዊክ ውጎረዮሙ ለዘርኦመ እምድጎሬሆሙ ኪያክሙ እምኩሉ አ(ሕ)ዛብ ወአውፅኣክሙ ውእቱ በጎይሉ ዐቢይ እምነ ግብጽ።

Deut 04:38 ከመ ያጥፍኦሙ ለአሕዛብ ዐበይት ወጽኑዓን እምቅድመ ገጽክ ከመ ያብእክ ወየሀብክ ምድሮሙ ትረስ በከመ ሀለውክ ዮም።

Deut 04:39 ወታአምር ዮም ከመ ውእቱ እግዚአብሔር በሰማይ በላዕሉ ወበምድር በታሕቱ ወአልቦ በዕደ ዘእንበሌሁ።

Deut 04:40 ወዕቀቡ ኩነኒሁ ወትእዛዘ ዘእኤዝዘክሙ ኣነ ዮም ከመ ሠናይ ይኩንክሙ ወለውሉድክሙሂ እምድጎሬክሙ ከመ ይኑጎ መዋዕሌክሙ ውስተ ምድር እንተ ይሁበክ እግዚአብሔር አምላክክሙ በኩሉ መዋዕል።

Deut 04:41 ወይእት አሚረ ፈለጠ ሙሴ ሠላሳ አህጉረ በማዕዱት ዮርዳኖስ መንገለ ሠርቀ ፀሐይ ከመ ይስኪ ህየ ቀታሊ ዘቀተሉ ካልኦ እንዘ ኢያአምር ወኢኮነ ጸላኢሁ ትካት ወይስኪ ውስተ አሐቲ እምእላንቱ አህጉር ወየሐዩ።

Deut 04:42 ባሶር በውስተ ገዳም ውስተ ምድረ ሐቅል ለሩቤል ወራሞት በገለአድ ለጋድ ወአውሎን በበሳን ለምናሴ።

Deut 04:43 ዝንቱ ውእቱ ሕግ ዘአዘዙሙ ሙሴ በቅድሚያሁሙ ለደቂቀ እስራኤል።

Deut 04:44 ወዝንቱ ውእቱ ትእዛዝ ወኲነኔ ወፍትሕ ኩሉ ዘነገሮሙ ሙሴ ለደቂቀ እስራኤል በገዳም ወሂአሙ እምነ ምድረ ግብጽ።

Deut 04:45 በመዕድተ ዮርዳኖስ በቈለት በቅሩብ ቤተ ፌጎር በምድረ ሴዎን ንጉሠ አሞሬዎን ዘይነብር ውስተ ሔሴቦን ዘቀተሉ ሙሴ ወደቂቀ እስራኤል ወሂአሙ እምነ ምድረ ግብጽ።

Deut 04:46 ወተዋረሱ ምድሮሙ ወምድረ አግሂ ንጉሠ ባሳን ክልኤቱ ነገሥተ አሞሬዎን እለ ይነብሩ ማዕድተ ዮርዳኖስ መንገለ ሠርቀ ፀሐይ።

Deut 04:47 እምአሮኤር እንተ ማዕድተ ፈለገ አርኖን እስከ ደብረ ሴዎን ዘአርሞን።

Deut 04:48 ኩሉ አሬቦ ዘማዕድተ ዮርዳኖስ ዘመንገለ ምሥራቀ ፀሐይ ዘመትሕተ አሴዶን ዘቦ መንድቀ።

## Chapter 5

Deut 05:01 ወጸውዖሙ ሙሴ ለኩሉ እስራኤል ወይቤሎሙ ስማዕ እስራኤል ኩሎ ኩነኔ ወፍትሐ ዘአነ እነግረከ ዮም ውስተ አእዘኒክሙ በዛቲ ዕለት ወተመሀሩ ገቢሮቶ ወዐቂቦቶ።

Deut 05:02 እግዚአብሔር አምላክክሙ አቀመ ኪዳኖ ምስሌክሙ በኮሬብ አኮ ለአበዊክሙ ዘአቀመ ዘንተ ኪዳነ አላ ለክሙ እስመ አንትሙ ሀለውክሙ ዝየ ዮም ኩልክሙ ሕያዊኒክሙ።

Deut 05:03 ገጸ በገጽ ተናገረክሙ እግዚአብሔር በደብር በመእከለ እሳት።

Deut 05:04 ወአንሰ ወእግዚአብሔር መእከሌክሙ በይእቲ ዕለት ከመ እንግርክሙ ቃሎ ለእግዚአብሔር እስመ ፈራህክሙ እምቅድመ ገጸ እሳት ወኢዐረግሙ ውስተ ደብር።

Deut 05:05 ወይቤ አነ ውእቱ እግዚአብሔር አምላክክ[ሙ] ዘአውፃእኩክ[ሙ] እምነ ምድረ ግብጽ እምነ ቤተ ቅኔት ወኢይኩንከ ባዕደ አማልክተ ዘእንበሌየ።

Deut 05:06 ወኢትግበር ለከ አምላክ ዘግልፎ ወኢበኩሉ አምሳል ዘውስተ ሰማይ በላዕሉ ወኢበኩሉ ዘምድር በታሕቱ ወኢበኩሉ ዘውስተ ማይ መትሕተ ምድር ወኢትስግድ ሎሙ ወኢታምልኮሙ።

Deut 05:07 እስመ ኣነ እግዚአብሔር አምላክክ[ሙ] አምላክ ቀናኢ ዘይትፈደይ ኅጣይኦ ወላዲ ለዕለ ውሉድ እስከ ሣልስት ወራብዕት ትውልድ ለእለ ይጸልኡኒ።

Deut 05:08 ወእገብር ምሕረተ እስከ እልፍ ትውልድ ለእለ ያፈቅሩኒ ወለእለ ያዕቅቡ ትእዛዝዩ።

Deut 05:09 ኢትምሐል በስመ እግዚአብሔር አምላክክ በሐሰት እስመ ኢያነጽሕ እግዚአብሔር ለዘ ይምሕል በስሙ በሐሰት።

Deut 05:10 ወዕቀበ ዕለተ ሰንበት ከመ ትቀድሳ በከመ አዘዘክ እግዚአብሔር አምላክክ።

Deut 05:11 ሰዱሰ መዋዕለ ትገብር ግብረ ኩሉ ግብረክ ወበሳብዕት ዕለት ሰንበቶ ለእግዚአብሔር አምላክክ።

Deut 05:12 ወኢትግበር ባቲ ኩሎ ግብረክ ወኢወልደክ ወኢወለትክ ወኢገብርክ ወኢአመትክ ወኢለህምክ ወኢአድግክ ወኢኩሉ እንስሳክ ወኢግዩር ዘውስተ ዴዴክ ከመ ያዕርፍ ገብርክ (ወ)አመትክ ከማክ።

Deut 05:13 ወተዘከር ከመ ገብር አንተ በምድረ ግብጽ ወአውፅኦክ እግዚአብሔር አምላክክ እምህዩ በእድ ጽንዕት ወበመዝራዕት ልዑል ወበበይነ ዝንቱ አዘዘክ እግዚአብሔር አምላክክ ከመ ትዕቀበ ለዕለተ ሰንበት ወትቀድሳ።

Deut 05:14 አክብር አበክ ወእመክ በከመ አዘዘክ እግዚአብሔር አምላክክ ከመ ሠናይት ትኩን ላዕሌክ ወይኑሳ መዋዕሌክ ዲበ ምድር እንተ ወሀበክ እግዚአብሔር አምላክክ።

Deut 05:15 ኢትሖር ኅበ ብእሲተ ብእሲ።

Deut 05:16 ወኢትቅትል ነፍሰ።

Deut 05:17 ወኢትስርቅ።

Deut 05:18 ወኢትኩን ስምዐ በሐሰት ለዕለ ቢጽክ ኢትሖሱ ስምዐ።

Deut 05:19 ወኢትፍቶ ብእሲተ ካልእክ ወኢትፍቶ ቤቶ ለካልእክ ወኢገራህቶ ወኢገብሮ ወኢአመቶ ወኢላህሞ ወኢአድጎ ወኢእምኩሉ እንስሳሁ ወኢእምኩሉ ዘቦቱ ለካልእክ።

Deut 05:20 ዝንቱ ነገር ዘተናገረ እግዚአብሔር ለኩሉ ተዓይኒኩሙ በውስተ ደብር በማእከለ እሳት ወጽልምት ወአውሎ ወጣቃ ወቃል ዓቢይ ወኢደገመ እንከ ወጸሐፎ ውስተ ክልኤ ጸላት ዘእብን ወወሀበኒ እግዚአብሔር።

Deut 05:21 ወኮነ ሶበ ሰማዕኩ ውእተ ቃለ እምነ ማእከለ እሳት ወደብሩሂ ይነድድ በእሳት ወመጸእክሙ ኅቢየ ኩልክሙ መላእክተ ነገድክሙ ወአእሩጊክሙ።

## THEOT Deuteronomy in IES 294

Deut 05:22 ወትቤሉኒ ኦርአየነ እግዚአብሔር አምላክነ ሰብሐቲሁ ወቃሎሂ ሰማዕነ እምነ ማእከለ እሳት ወዮም አእመርነ በዛቲ ዕለት ከመ ይትናገር እግዚአብሔር ምስለ ሰብእ ወየሐዩ።

Deut 05:23 ወይእዜኒ ኢንሙት ወኢታጥፍኣነ ዛቲ እሳት ዐቢይ ለእመ ደገምነ ንሕነ ሰሚዖታ ቃሎ ለእግዚአብሔር አምላክነ ዓዲ ንመውት እንከ።

Deut 05:24 መኑ ውእቱ ዘሥጋ ዘይሰምዕ ቃሎ ለእግዚአብሔር ዘሕያው እንዘ ይትናገር እምነ መእከለ እሳት ከማነ ወየሐዩ።

Deut 05:25 ቶር አንተ ወስማዕ ኩሎ ዘይብል እግዚአብሔር አምላክነ ወንግረነ አንተ ኩሎ ዘይቤለከ እግዚአብሔር አምላክነ።

Deut 05:26 ወሰምዐ እግዚአብሔር ቃለ ነገርክሙ ዘነበብክሙ ዘትቤሉኒ ወይቤለኒ እግዚአብሔር ሰማዕኩ ቃሎሙ ዘይብሉ ዝንቱ ሕዝብ ኩሎ ዘይቤሉከ ወርቱዕ ኩሎ።

Deut 05:27 መኑ እምወሀበሙ ከመዝ ይኩን ላዕሌሆሙ ከመ ይፍርሁኒ ወይዕቀቡ ትእዛዝየ በኩሎ መዋዕሊሆሙኒ ከመ ሠናይት ትኩኖሙ ወለውሉዶሙ እስከ ለዓለም።

Deut 05:28 ቶር ወበሎሙ እትውኦ ውስተ አብያቲክሙኦ።

Deut 05:29 ወአንተሰ (ቁ)ም ኀቤየ ወእንግርከ ትእዛዝየ ወኩነኔየ ወፍትሕየ ኩሎ ዘትሜህሮሙ ወይግበሩ ከማሁ ውስተ ምድር እንተ ኣነ እሁቦሙ ርስቶሙ።

Deut 05:30 ወዕቀቡ ከመ ትግበሩ በከመ ኣዘዘኒ እግዚአብሔር አምላክከ።

Deut 05:31 ወኢትትገሐሥ ኢለየማን ወኢሊጋም እምነ ኩሎ ፍኖት እንተ ኣዘዘከ እግዚአብሔር አምላክከ ከመ ትሖር ባቲ ወከመ ሠናይት ትኩንክሙ ወከመ ታዕርፉ ወይኑኅ መዋዕሌክሙ ውስተ ምድር እንተ ትትዋረሱ።

## Chapter 6

Deut 06:01 ውእቱ ትእዛዝ ወኩነኒ ወፍትሕ ኩሎ ዘኣዘዘ እግዚአብሔር አምላክነ ከመ እምህርክሙ ትግበሩ በውስተ ምድር እንተ ውስቴታ ትበውኡ ትትዋረስዋ።

Deut 06:02 ከመ ትፍርህዎ ለእግዚአብሔር አምላክክሙ ወከመ ትዕቀቡ ኩሎ ኩነኒሁ ወትእዛዝ ኩሎ ዘኣነ እኤዝዘክሙ ዮም አንተ ወወልድከ ወደቂቀ ወልድከ በኩሎ መዋዕለ ሕይወትከ ከመ ይኑኅ መዋዕሌክሙ።

Deut 06:03 ወስማዕ እስራኤል ከመ ትግበር ወከመ ትዕቀቡ ከመ ሠናይተ ትኩንክሙ ወከመ ይኑህ መዋዕሌክሙ ወከመ ትትባዝኑ ጥቀ በከመ ይቤ እግዚአብሔር አምላኮሙ ለአበዊክሙ ከመ የሀብክ ምድረ እንተ ትውሕዝ ሐሊበ ወመዓረ።

Deut 06:04 ወዝንቱ ውእቱ ትእዛዝ ወኩነኔ ኩሉ ዘአዘዞሙ ሙሴ ለደቂቀ እስራኤል በገዳም ወዲአሙ እምነ ምድረ ግብጽ።

Deut 06:05 ስማዕ እስራኤል እግዚአብሔር አምላክክ እግዚአብሔር አሐዱ ውእቱ።

Deut 06:06 ወአፍቅሮ ለእግዚአብሔር አምላክክ በኩሉ ልብክ ወበኩሉ ነፍስክ ወበኩሉ ኀይልክ፡፡

Deut 06:07 ወየሀሉ ውስተ ልብክ ኩሎ ዝንቱ ነገር ዘኣነ እነግረክ ዮም ወውስተ ነፍስክ።

Deut 06:08 ወመህሮ ለወልድክ ያሁ እንዘ ትነብር ውስተ ቤት ወእንዘ ተሐውር ውስተ ፍኖት፡፡ ወለእመ ሰከብከሂ ወለእመ ተ(ን)ሣእከሂ።

Deut 06:09 ወግበሮ ከመ ታእምር ውስተ እዴክ ወይኩንክ ዘኢይትሐወሥ እምቅድመ አዕይንቲክ።

Deut 06:10 ወጸሐፍዎ ውስተ መርፈቀ ጥናተ አብያቲክሙ ወውስተ ዴዳቲክሙ።

Deut 06:11 ወአመ አበኣክ እግዚአብሔር (አምላክክ) ውስተ ምድር እንተ (እግዚአብሔር) መሐለ ለአበዊክ ለአብርሃም ወለይስሐቅ ወለያዕቆብ ከመ የሀብክ አህጉረ ዓቢይተ ወሠናይተ ወአብያተ ዘኢነደቀ።

Deut 06:12 ዘምሉእ ኩሎ በረከተ ዘኢዘገብክ ወዐዘተተ ዘውቅሮ ዘኢወቅርክ ወአዕጻደ ዘይት ዘኢተካልክ።

Deut 06:13 ወእምድኅረ በለዕክ ወጸገብክ ዑቅ እንክ ኢትርስዎ ለእግዚአብሔር አምላክክ ዘአውፅኣክ እምነ ምድረ ግብጽ እምነ ቤተ ቅኔት።

Deut 06:14 ወፍርሆ ለእግዚአብሔር አምላክክ ወሎቱ ለባሕቲቱ አምልክ ወሎቱ ትልዎ ወበስመ ዚአሁ መሐል።

Deut 06:15 ወኢትሖር ኀበ አማልክተ ባዕድ ኀበ አማልክተ ሕዝብ እለ አውድክሙ እስመ አምላክ ቀናኢ ውእቱ እግዚአብሔር አምላክክ።

Deut 06:16 ወዑቅ ኢይትመዓዕክ እግዚአብሔር አምላክክ በመዑቱ ወይሄርወክ እምነ ገጸ ምድር።

Deut 06:17 ወኢታመክሮ ለእግዚአብሔር አምላክክ በከመ አመከርካሁ አመ ዕለተ መንሡት።

Deut 06:18 ትዓቅብ ወዕቀብ ትእዛዙ ለእግዚአብሔር አምላክክ ወስማዕ ኩነኔሁ ኩሎ ዘአዘዘክ።

Deut 06:19 ከመ ትግበር ዘሠናይ ወዘአዳም ቅድሜሁ ለእግዚአብሔር አምላክክሙ ከመ ሠ(ናይት ትኩንክሙ ወትባእ ትትዋረስ) ምድረ ቡርክት እንተ መሐለ እግዚአብሔር ለአበዊክሙ።

Deut 06:20 ከመ ይስድድ ኩሎ ፀረከ እም(ቅ)ድመ ገጽከ በከመ ይቤ እግዚአብሔር።

Deut 06:21 ወሶበ ተስእለከ ወልድከ (ጌሠመ) ወይቤለከ ምንት ውእቱ (ዝንቱ ትእዛዝ) ወኩነኔ ወፍትሕ ኩሎ ዘአዘዘኝ እግዚአብሔር አምላክነ።

Deut 06:22 ወትብሎ ለወልድከ አግብርቲሁ ንሕነ ለፈርዖን በብሔረ ግብጽ ወአውፅአኝ እግዚአብሔር እምህየ በእድ ጽንዕት ወበመዝራዕት ልዑል።

Deut 06:23 ወፈነወ እግዚአብሔር ተአምረ ወመድምመ ዐቢየ ወእኩየ ላዕለ ግብጽ ወለዕለ ፈርዖን ወላዕለ ቤቱ በቅድሚኝ።

Deut 06:24 ወኪያነሰ ወአውፅአኝ እምህየ ከመ ያብአኝ ውስተ ዛቲ ምድር ወየሀበነሃ እንተ መሐለ ከመ ያሀበሙ ለአበዊነ።

Deut 06:25 ወአዘዘኝ እግዚአብሔር ኩሎ ዘንተ ኩነኔ ከመ ንግበር ወከመ ንፍርሆ ለእግዚአብሔር አምላክነ ከመ ሠናይተ ትኩን ላዕሌኝ በኩሎ መዋዕሌኝ ወከመ ንሕዮ በከመ ዮም።

Deut 06:26 ወከመ ንርከብ ምሕረተ ለእመ ዐቀብነ ከመ ንግበር ኩሎ ዘንተ ትእዛዘ በቅድመ እግዚአብሔር አምላክነ በከመ አዘዘኝ እግዚአብሔር።

## Chapter 7

Deut 07:01 ወለእመ አባአከ እግዚአብሔር አምላክከ ውስተ ምድር እንተ ላቲ ተሐውር ህየ ከመ ትረሳ ወአሰሰለ አሕዛብ ዐበይተ ወብዙኅ እምቅድመ ገጽከ ኬጤዎን ወጌርጌሴዎን ወአሞሬዎን ወከናኔዎን ወፌርዜዎን ወኤዌዎን ወኢያቤሴዎን ሰብዓቱ አሕዛብ ዐበይት እለ ይጸንዑኑ።

Deut 07:02 ወአግብአሙ እግዚአብሔር አምላክከ ውስተ እደዊከ ወቀተልካሆሙ ወአጥፍአ አጥፍአሙ ወኢትትከየድ ምስሌሆሙ ኪዳነ ወኢትምሐርዎሙ።

Deut 07:03 ወኢትትሐመዎሙ ወለተከ ኢተሀብ ለወልዱ ወወለቶ ኢትንሣእ ለወልድከ።

Deut 07:04 እስመ ያክሕዱ ለወልድከ እምኔየ ወያመልክ በዕደ አማልክተ ወይትመዕዕ እግዚአብሔር መዐተ ለዕሌክሙ ወይሄርወከ ፍጡነ።

Deut 07:05 እለ ከመዝ ግበርዎሙ መሥዋዓቲሆሙ ንሥተ ወምሳሌሆሙ ቀጥቅጡ ወአማልክቲሆሙ ዘግልፎ አውዕዩ በእሳት።

Deut 07:06 እስመ ሕዝብ ቅዱስ አንተ ለእግዚአብሔር አምላክክ ወኪያክ አብደረ ኅርየ እግዚአብሔር አምላክክ ከመ ትኩኖ ሕዝቦ ሎቱ እምነ ኩሉ አሕዛብ እለ ሀለው ዲበ ገጸ ምድር።

Deut 07:07 ወአኮ እስመ ተበዝኑ እምነ ኩሉ አሕዛብ አብደረ ኅርዮተክሙ እግዚአብሔር አንትሙሰ ትውሕዱ እምነ ኩሉ አሕዛብ።

Deut 07:08 እለ እስመ አፍቀረክሙ እግዚአብሔር ወእስመ የዐቅብ መሐላሁ ዘመሐለ ለአበዊክሙ በበይነ ዝንቱ አውፅአክሙ እግዚአብሔር አምላክክ ሙ በዕድ ጽንዕት ወበመዝራዕት ልዑል ወቤዘወክ እምነ ቤተ ቅኔት እምነ እዴሁ ለፈርዖን ንጉሠ ግብጽ።

Deut 07:09 ወታአምር ከመ ውእቱ እግዚአብሔር አምላክክ ውእቱ እግዚእ ወውእቱ አምላክ ማእመን ዘየዐቅብ ኪዳኖ ወምሕረቶ ለእለ ያፈቅርዎ ወያዐቅቡ ትእዛዞ እስከ እልፍ ትውልድ።

Deut 07:10 ወይትቤቀሎሙ ለእለ ይጸልእዎ በቅድመ ገጸሙ ወይሤርዎሙ ወኢያጐንዲ ሠርዎቶሙ ለእለ ይጸልእዎ በቅድመ ገጸሙ ወኢያጐንዲ ፈድዮቶሙ ለእለ ይጸልእዎ በቅድመ ገጸሙ።

Deut 07:11 ወዕቀቡ ትእዛዞ ወኩነኒሁ ወፍትሐ ኩሉ ዘኣነ እኤዝዘክሙ ዮም ከመ ትግበር።

Deut 07:12 ወለእምከመ ሰማዕክሙ ዘንተ ኩነኒሁ ወዐቀብክሙዎ ወገበርክሙዎ እግዚአብሔርኒ ያዐቅብ ለከ ኪዳኖ ወምሕረቶ ዘመሐለ ለአበዊክሙ።

Deut 07:13 ወ(ያ)ፈቅረክ ወይባርክክ ወያስተበዝኅክ ወይባርክ ለከ ፍሬ ከርሥክ ወፍሬ ምድርክ ወስርናየክ ወወይነክ ወቅብእክ ወአዕጸዳተ ላህምክ ወመራዕየ አባግኢክ ላዕለ ምድር እንተ መሐለ እግዚአብሔር ለአበዊክ ያህብክ።

Deut 07:14 ወትከውን ቡሩክ እምነ ኩሉ አሕዛብ ወአልቦቱ መካነ እምነ አንስቲያክሙ ወኢእንተ አልባቲ ውሉደ ወኢእምነ እንስሳክሙ።

Deut 07:15 ወያሴስል እግዚአብሔር እምኔክ ኩሉ ደዌ ወኩሉ ሕማመ እኩየ ዘርኢክ መጽአ ለዕለ ግብጽ ወኢያመጽአ ለዕሌክ ለውእቱ ኩሉ ዘርኢክ ወይመይዞ እምኔክ ወይወስዶ ላዕለ ፀርክ ወላዕለ ኩሉ እለ ይጸልኡክ።

Deut 07:16 ወትበልዕ ምህርካሆሙ ለአሕዛብ ዘይሁበክ እግዚአብሔር አምላክክ ወኢትመሐኮሙ ዐይንክ ወኢታምልኮሙ አማልክቲሆሙ እስመ እኩይ ውእቱ ለከ ዝንቱ።

Deut 07:17 ወለእመሰ ትብል በልብክ ይበዝኅ ዝንቱ ሕዝብ ወእፎ እክል አጥፍአቶሙ ኢትፍርሆሙ።

Deut 07:18 ተዘክሮ ተዘከር ኩሉ ዘገብረ እግዚአብሔር አምላክክ ላዕለ ፈርዖን ወላዕለ ኩሉ ግብጽ ዐቢይ መንሱተ ዘርእያ አዕይ(ን)ቲክሙ ወውእቱ ተአምር።

Deut 07:19 ወመድምመ ዐበይተ ወእደ ጽንዕት ወበመዝራዕት ልዑል ዘከመ አውፅአከ እግዚአብሔር አምላክከ እምህየ ከማሁ ይገብሮሙ እግዚአብሔር አምላክክሙ ለኩሉ አሕዛብ እለ ትፈርሁ አንትሙ እምቅድመ ገጽሙ።

Deut 07:20 ወይፌኑ እግዚአብሔር አምላክከ ቅድሜከ መቅሠፍተ ላዕሌሆሙ እስከ ያጠፍአሙ ለእለ ተርፉ ወለእለ ተኅብኡ እምኔከ።

Deut 07:21 ወኢትደንግፅ እምቅድመ ገጽሙ እስመ እግዚአብሔር አምላክከ ሀለወ ምስሌከ ወውእቱ አምላክ ዐቢይ ወጽኑዕ።

Deut 07:22 ወያጠፍአሙ እግዚአብሔር አምላክከ ለእሉ አሕዛብ እምቅድመ ገጽከ በበ ንስቲት ንስቲት ወኢትክል አጥፍኦቶሙ ፍጡነ ከመ ኢትኩን ምድር ሐቅለ ወይበዝኅ ለዕሌከ አራዊተ ገዳም።

Deut 07:23 ወያገብአሙ እግዚአብሔር አምላክከ ውስተ እደከ ወይደመስሶሙ በዐቢይ ሕርትምና እስከ ያጠፍአሙ።

Deut 07:24 ወያገብአሙ ለነገሥቶሙ ውስተ እደዊከ ወይደመስስ ስሞሙ እምውእቱ መካን ወአልቦ ዘይትቃውም ቅድመ ገጽከ እስከ ያጠፍአሙ እግዚአብሔር።

Deut 07:25 ለኩሉ ግልፎ አማልክቲሆሙ ወአውዕይዎሙ በእሳት ወኢትፍቱ ኢወርቀ ወኢብሩረ እምኔሆሙ ወኢትንሣእ ለከ ከመ ኢትጌጊ ቦሙ እስመ ርኩሳን እሙንቱ በኅበ እግዚአብሔር አምላክከ።

Deut 07:26 ወኢታብእ ርኩሳ ውስተ ቤትከ ወትከ[ው]ን ርጉመ ከማሁ አርኩሶ ታረኩሶ ወአሥቆርሮ ታሥቆርሮ እስመ ርጉም ውእቱ።

## Chapter 8

Deut 08:01 ወዕቀቡ ከመ ትግበሩ ኩሎ ትእዛዘ ዘእኤዝዘክሙ አነ ዮም ከመ ትሕይው ወትትባዝኅ ወትበኡ ትትዋረሱ ምድረ እንተ መሐለ እግዚአብሔር ለአበዊክሙ።

Deut 08:02 ወተዘከር ኩሎ ፍኖተ እንተ ወሰደከ እግዚአብሔር አምላክከ ውስተ ገዳም ከመ ያሕምምከ ወከመ ያመክርከ ወከመ ያእምር ልብከ ለእመ ተዐቅብ ትእዛዞ ወለእመ አልቦ።

Deut 08:03 ወአሕመመከ ወአርኅበከ ወእምዘ መና ሴሰየከ ዘኢያእመሩ አበዊከ ከመ ያርኢከ ከመ ኢኮነ በእክል በሕቲቱ ዘየሐዩ ሰብእ አላ በኩሎ ቃል እንተ ትወፅእ እምአፉሁ ለእግዚአብሔር የሐዩ ሰብእ።

Deut 08:04 አልባሲከኒ ኢበልየ በላዕሌከ ወእገሪከኒ ኢረስሐ ናሁ ዓርብዓ ዓም።

Deut 08:05 ወእእምር በልብከ እስመ ከመ ይጌሥጽ ብእሲ ወልዶ ከማሁ ይጌሥጽከ እግዚአብሔር አምላክከ።

Deut 08:06 ወዕቀብ ኩሎ ትእዛዞ ለእግዚአብሔር አምላክክ ከመ ትሖር በፍኖቱ ወትፍርሆ።

Deut 08:07 እስመ እግዚአብሔር አምላክክ ያበውአክ ውስተ ምድር ቡርክት ወብዝነት እንተ ወሐይዝተ ማይ ወወዘቃቲሃ ከመ ቀላይ ወይትከወው ውስተ ገዳም ወውስተ አድባር።

Deut 08:08 ምድረ ስርናይ ወስገም ወአዕጻደ ወይን ወበለስ ወሮማን ምድረ ኤልያስ ዘዘይት ወመዓር።

Deut 08:09 ምድር እንተ ኢኮነት በአስተአክሎ ዘትበልዖ ለእክልክ ወአልቦ ዘተኅጥእ ምንተኒ ውስቴታ ምድር እንተ እበኒሃ ኅጺን ወእምውስተ አድባሪሃ ይኤልድዎ ለብርት።

Deut 08:10 ወብላዕ ወጽገብ ወባርኮ ለእግዚአብሔር አምላክክ በውስተ ምድር ቡርክት እንተ ወሀበከ።

Deut 08:11 ወዑቅ ርእሰክ ወኢትርስዖ ለእግዚአብሔር አምላክክ ከመ ትዕቀብ ትእዛዞ ወፍትሖ ወኸነኔሁ ኩሎ ዘአነ እኤዝዘክ[ሙ] ዮም።

Deut 08:12 ዮጊ ሶበ በላዕክ ወጽገብክ ወነደቀ አብያተ ሠናያተ ወነበርክ ውስቴቶሙ ወበዝነ ለክ አባግዲክ ወአልህምቲክ ወሶበ በዝነ ለክ ወርቅ ወብሩር ወበዝነ ለክ ኩሎ ንዋይክ ዮጊ ታዐቢ ልበከ።

Deut 08:13 ወትረስዖ ለእግዚአብሔር አምላክክ ዘአውፅኦክ እምነ ምድረ ግብጽ እምነ ቤተ ቅኔት።

Deut 08:14 ወወሰደክ ውስተ ገዳም ዘዐቢይ ወግሩም ውእቱ ዘአራዊተ ምድር ዘይነስክ ወዓቃርብተ ምድር ወጽምእ ወአልቦ (ማ)የ ለስቴይ ዘአውፅኦ ለክ እምውስተ እብን ኩኸሕ ነቅዐ ማይ ጥዑም።

Deut 08:15 ዘሴሰየክ መና በገዳም ዘኢያአመሩ አበዊክ ከመ ያሕምምክ ወያመክረክ ወያሠኒ ላዕሌክ በደኃሪ መዋዕሊክ።

Deut 08:16 ወኢትበል በልብክ በጽንዕየ ወበኃይለ[የ] እዴየ ገበርኩ ሊተ ዘንተ ኅይለ ዐቢየ።

Deut 08:17 ወተዘከሮ ለእግዚአብሔር አምላክክ እስመ ውእቱ ይሁበክ ኅይለ ከመ ያቅም ኪዳኖ ዘመሐለ እግዚአብሔር ለአበዊክ በከመ ዮም።

Deut 08:18 ወለእመ ረሲዐ ረሳዕካሁ ለእግዚአብሔር አምላክክ ወሖርክ ድኅረ በዕድ አማልክት ወአምላክሆሙ ወሰገድክ ሎሙ አሰምዕ ላዕሌክ ዮም ሰማይ ወምድረ ከመ ጠፊኦ ትጠፍእ።

Deut 08:19 በከመ አሕዛብ ኩሎሙ እለ ደምሰሶሙ እግዚአብሔር እምቅድመ ገጽከሙ ከማሁ ትደመስሱ እስመ ኢሰማዕክሙ ቃለ እግዚአብሔር አምላክክሙ።

Deut 09:01 ስማዕ እስራኤል ናሁ ተዐድዎ አንተ የም ለዮርዳኖስ ከመ (ትሖር) ትትዋረሶሙ ለአሕዛብ ዐቢይት እለ ይጸንዑክሙ ወአህጉር ዐበይት እለ አረፍት ቅጽሮን ይበጽሕ እስከ ሰማይ።

Deut 09:02 ሕዝብ ዐቢይ ወነዋላት እለ ትብሎሙ አንተ።

Deut 09:03 ወታእምር የም ከመ እግዚአብሔር አምላክከ የሐውር ቅድመ ገጽከ (እሳት) ዘይዌድእ ውእቱ ወውእቱ ይሄርዎሙ ውእቱ ያነትዎሙ እምቅድመ ገጽከ ወያጠፍአሙ ወይደመስሶሙ ፍጡነ በከመ ይቤሉከ እግዚአብሔር።

Deut 09:04 ወኢትበል በልብከ ሶበ አጥፍአሙ እግዚአብሔር ለውእቶሙ አሕዛብ እምቅድመ ገጽከ በበይነ ጽድቅየ አብአኒ እግዚአብሔር እትዋረሳ ለዛቲ ምድር ቡርክት አላ በበይነ ኅጢአቶሙ ለውእቶሙ አሕዛብ አጥፍአሙ እግዚአብሔር እምቅድመ ገጽከ ወአኮ በበይነ ጽድቅ(ከ) ወአኮ በበይነ ንጽሐ ልብከ ዘትበውእ አንተ (ት)ትዋረሳ ለምድሮሙ።

Deut 09:05 አላ በበይነ ኅጢአቶሙ ለውእቶሙ አሕዛብ ያጠፍአሙ እግዚአብሔር ለውእቶሙ አሕዛብ እምቅድመ ገጽከ ወከመ ያቅም ኪዳኖ ዘመሐለ እግዚአብሔር ለአበዊክሙ ለአብርሃም ወለይስሐቅ ወለያዕቆብ።

Deut 09:06 ወታእምር የም ከመ አኮ በበይነ ጽድቅከ ዘይሁበከሃ እግዚአብሔር አምላክከ ትትዋረሶ ለይእቲ ምድር ቡርክት እስመ ሕዝብ ዘያገፍ ክሳዶ አንተ።

Deut 09:07 ወተዘከር ወኢትርሳዕ ሚመጠነ አምዕዐካሁ ለእግዚአብሔር አምላክከ በገዳም እምአመ አውፅአከ እምነ ምድረ ግብጽ እስከ [ወ]በጽሐክሙ ውስተ ዝንቱ መካን እንዘ ትክሕድዎ ለእግዚአብሔር።

Deut 09:08 ወበኮሬብሂ አምዕዐክምዎ ለእግዚአብሔር ወተምዕዕ እግዚአብሔር ላዕሌክሙ ከመ ያጥፍአክሙ።

Deut 09:09 አመ ዐረጉ ውስተ ደብር ከመ እንሣእ ክልኤ ጽለተ ዘእብን ጽላት ዘኪዳን ዘተካየደ እግዚአብሔር ምስሌክሙ።

Deut 09:10 ወነበርኩ ውስተ ደብር አርብዓ ዕለተ ወአርብዓ ሌሊተ እክለ ኢበለዕኩ ወማይ ኢሰተይኩ።

Deut 09:11 ወወሀበኒ እግዚአብሔር ክልኤ ጽላተ ዘእብን ወተጽሕፋ በአጽባዕቱ ለእግዚአብሔር ወተጽሕፋ ወውእቶን ኩሉ ቃል ዘነገረኒ እግዚአብሔር በውስተ ደብር አመ ተጋብአክሙ።

Deut 09:12 ወበአርብዓ ዕለት ወበአርብዓ ሌሊት ወሀበኒ እግዚአብሔር ክልኤ ጽለተ ዘእብን ጽላተ ዘኪዳን።

Deut 09:13 ወይቤለኒ እግዚአብሔር ተንሥእ ወሖር ፍጡነ እምዝየ እስመ አበሰ ሕዝብከ ዘአውፅአከ እምነ ምድረ ግብጽ ወፍጡነ ክሕዱ እምውስተ ፍኖት እንተ አዘዝካሆሙ ገብሩ ሎሙ ስብኩ።

Deut 09:14 ወይቤለኒ እግዚአብሔር እቤለከ ምዕረ ወካዕበ እንዘ እብል ርኢኩዎ ለዝንቱ ከመ ሕዝብ ግዙፈ ክሳድ ውእቱ።

Deut 09:15 ጎድገኒ አጥፍሎም ወእደምስስ ስሞም እምታሕተ ሰማይ ወእገብረከ ውስተ ሕዝብ ዐቢይ ወጽኑዕ ወዘይበዝኅ እምነ ዝንቱ ፈድፋድ።

Deut 09:16 ወተመየጥኩ ወወረድኩ እምነ ደብር ወደብሩሰ ይነድድ በእሳት ወእልክቱኒ ክልኤ ጽለተ ውስተ ክልኤሆን እደዊየ።

Deut 09:17 ወሶበ ርኢኩ ከመ አበስክመ ቅድመ እግዚአብሔር አምላክክመ ወገበርክመ ለክመ ስብኮ ወኅደግመ ፍኖተ እንተ አዘዘክመ እግዚአብሔር ወነሣእኩዎን ለእልክቱ ክልኤ ጽለተ ወገደፍኩዎን እምውስተ ክልኤሆን እደዊየ ወቀጥቀጥኩዎን በቅድሜክመ።

Deut 09:18 ወሰአልኩ ዳግመ ቅድመ እግዚአብሔር ከመ ቀዲመ አርብዓ ዕለት ወአርብዓ ሌሊት እክለ ኢበላዕኩ ወማይ ኢሰተይኩ በእንተ ኩሉ ኅጣውኢክመ ዘገበርክመ ወዘአበስክመ እኩየ ቅድመ እግዚአብሔር አምላክክመ ከመ ታምዕዕዎ።

Deut 09:19 ወፈራህኩ በእንተ መዕቱ ዘተምዐ እግዚአብሔር ላዕሌክመ ከመ ያጥፍክክመ ወሰምዐኒ እግዚአብሔር በውእቶን መዋዕል።

Deut 09:20 ወላዕለ አሮንሂ ተምዕዐ እግዚአብሔር ጥቀ ከመ ይሠርዎ ወጸለይኩ ለዕለ አሮንሂ በውእቶን መዋዕል ወበእንተ ጌጋይክመሂ ዘገበርክመ ላህመ።

Deut 09:21 ወነሣእኩዎ ወቀጥቀጥኩዎ ወሐረጽክዎ እስከ አድቀቅክዎ ጥቀ ቦሕቄ ወኮነ ከመ ጸበል ወወደይክዎ ለውእቱ ሐሪጹ ውስተ ነቅዐ ዘይወርድ እምነ ደብር።

Deut 09:22 ወበኅበ ውዕየትኒ ወአመ መንሱትኒ ወበኅበ ተዝካረ ፍትወትኒ አምዕዐክምዎ ለእግዚአብሔር አምላክክመ።

Deut 09:23 ወአመሂ ፈነወክመ እግዚአብሔር እምነ ቃዴስ በርኔ ወይቤለክመ ዕረጉ ወትዋረስዋ ለይእቲ ምድር እንተ እሁበክመ ወክሕድክምዎ በቃለ እግዚአብሔር አምላክክመ ወኢአመንክምዎ ወኢሰማዕክመ ቃሎ።

Deut 09:24 ወኮንክመ ከሐድያነ በእግዚአብሔር እምይእቲ ዕለት እንተ ተአምረ ለክመ።

Deut 09:25 ወሰአልኩ ቅድመ እግዚአብሔር አርብዓ ዕለተ ወአርብዓ ሌሊተ በከመ ሰአልኩ ቀዲመ እስመ ይቤ እግዚአብሔር ከመ ያጥፍኦ(ክ)መ።

Deut 09:26 ወጸለይኩ ኅበ እግዚአብሔር ወእቤ እግዚአ ንጉሦመ ለአማልክት ኢትሠርዎመ ለሕዝብከ ወለመክ(ፈል)ትከ ዘቤዘውከ በኅይልከ ዐቢይ እለ አውፅኦከ እምነ ግብጽ በዐቢይ ኅይልከ ወበእዴከ ጽንዕት ወበመዝራዕትከ ልዑል።

Deut 09:27 ተዘከር ኡብርሃምሃ ወይስሐቅሃ ወያዕቆብሃ አግብርቲከ እለ መሐልከ ሎመ በርእስከ ወኢትነጽር እኩዮመ ለዝንቱ ሕዝብ ወኢ(አ)በሰሆመ ወጌጋዮመ።

Deut 09:28 ከመ ኢይበሉ እለ ይነብሩ ውስተ ምድር እለ እምነቢሆሙ አውግእከነ እስመ ስእነ እግዚአብሔር አብአ(ቶ)ሙ ውስተ ምድር እንተ ይቤሎሙ ወእስመ ይጸልኦሙ አውፅኦሙ ከመ ይቅትሎሙ በገዳም።

Deut 09:29 ወእሉሰ ሕዝብከ እሙንቱ ወርስትከ እለ አውፅኦከ እምነ ግብጽ በዐቢይ ኅይልከ ወበጽኑዕ ወልዑል መዝራዕትከ።

## Chapter 10

Deut 10:01 ወይቤለኒ እግዚአብሔር ወበውእቶን መዋዕል ቅር ለከ ክልኤ ጽላተ ከመ እለ ቀዲሙ ወዕረግ ኅቤየ ውስተ ደብር ወግበር ታቦተ እንተ ዕፅ።

Deut 10:02 ወእጽሕፍ ውስተ ውእቶን ጽላተ ኩሎ ቃለ ዘሀለወ ውስተ እለክቱ ጽላት እለ ቀዲሙ እለ ቀጥቀጥከ ወደዮን ውስተ ታቦተ።

Deut 10:03 ወገበርኩ ታቦተ እንተ ዕፅ ዘኢይነቅዝ ወወ(ቀ)ርኩ ክልኤ ጽላተ ዘእብን ከመ እለ ቀዲሙ ወዕረግ ውስተ ደብር ወውስተ እዴየ ውእቶን ክልኤሆን ጽላት።

Deut 10:04 ወጸሐፈ ውስተ ውእቶን ጽላት በከ[መ] ውእቱ መጽሐፍ ዘቀዲሙ ዐሥሩ ቃል ዘነገረኒ እግዚአብሔር በደብረ ሲና በመእከለ እሳት።

Deut 10:05 ወወደይኩዎን ውስተ ታቦት ለውእቶን ጽላት እለ ገበርኩ ወነበራ ህየ በከመ አዘዘኒ እግዚአብሔር።

Deut 10:06 ወግዕዙ ደቂቀ እስራኤል እምነ ቤርሱ ዘደቂቀ ኢያቅም ዘሚሳዴ ወበህየ ሞተ አሮን ወተቀብረ በህየ ወተሠይመ በህየ አልዓዛር ወልዱ ካህን አልዓዛር ህየቴሁ።

Deut 10:07 ወእምህየ ግዕዙ ውስተ ገድገድ ወእምነ ገድገድ ውስተ ዔጤቦታ ምድር ዘአንቅዕተ ማይ።

Deut 10:08 ወበውእቶን መዋዕል ፈለጦሙ እግዚአብሔር ለነገደ ሌዊ ከመ ይጸሩ ታቦተ ሕጉ ለእግዚአብሔር ወከመ ይቁሙ ቅድመ እግዚአብሔር ወይግበሩ ወይጸልዩ በስመ ዚአሁ እስከ ዛቲ ዕለት።

Deut 10:09 ወበበይነ ዝንቱ አልቦሙ ለሌዋዊያን ክፍለ ወርስተ ምስለ አጋዊሁ (እስመ) እግዚአብሔር ውእቱ ክፍሉ በከመ ይቤሎ።

Deut 10:10 ወአንሰ ቆምኩ ውስተ ደብር አርብዓ ዕለተ ወአርብዓ ሌሊተ ወሰምዐኒ እግዚአብሔር በውእቶን መዋዕል ወኅደገክሙ እግዚአብሔር ወኢያጥፍአክሙ።

Deut 10:11 ወይቤለኒ እግዚአብሔር ሖር ወንግር ቅድሜሆሙ ለዝንቱ ሕዝብ ወይባኡ ወይትዋረሱ ምድረ እንተ መሐልኩ ለአበዊሆሙ ከመ አሀቦሙ።

Deut 10:12 ወይእዜኒ እስራኤል ምንተ ይፈቅድ እግዚአብሔር እምነክ እንበለ ትፍርህ ለእግዚአብሔር አምላክክሙ ወትሖር በኩሉ ፍናው ወከመ ታፍቅሮ ወታምልኮ ለእግዚአብሔር አምላክክ በኩሉ ልብክ ወበኩሉ ነፍስክ ወትዕቀብ ትእዛዞ ለእግዚአብሔር አምላክክ ወኩነኔሁ ኩሎ ዘእነ እኤዝዘክ ዮም ከመ ሠናይ ይኩንከ።

Deut 10:13 ወናሁ ለእግዚአብሔር አምላክክ ሰማይ ወሰማየ ሰማያት ወምድር ወኩሉ ዘውስቴታ።

Deut 10:14 ወዳእሙ አበዊክሙ አብደረ እግዚአብሔር ያፍቅሮሙ ወኅረየ ዘርአሙ እምድኅሬሆሙ ኪያክሙ እምነ ኩሉ አሕዛብ እስከ ዛቲ ዕለት።

Deut 10:15 ወግዘሩ እከዮ ለልብክሙ ወኢታግዝፉ ክሳደክሙ እንከ እስመ እግዚአብሔር አምላክክሙ ውእቱ።

Deut 10:16 አምላክ አማልክት ወእግዚአ ኡጋእስት ውእቱ እግዚአብሔር ዐቢይ ወጽኑዕ ወግሩም ዘኢያደሉ ለገጽ ወኢይነሥኦ ሕልያነ።

Deut 10:17 ወይገብር ፍትሐ ለግዩር ወለእጳለ ማውታ ወለአቤር ወያፈቅሮ ለግዩር ወይሁቦ ሲሰዮ ወዐራዞ።

Deut 10:18 ወአፍቅርዎ ለግዩር እስመ አንትሙኒ ግዩራን ኮንክሙ በምድረ ግብጽ።

Deut 10:19 ለእግዚአብሔር አምላክክ ፍርህ ወሎቱ ለባሕቴቱ አምልኮ ወሎቱ ትልዎ።

Deut 10:20 እስመ ውእቱ ትምክሕትክሙ ወውእቱ አምላክክ ዘገብረ ለከ ዐቢያተ ወእላንተ ክቡራተ ዘርእያ አዕይንቲከ።

Deut 10:21 በሰብዓ ነፍስ ወረዱ አበዊክ ውስተ ግብጽ ወይእዜስ ገብረክ እግዚአብሔር አምላክክ ከመ ከዋክብተ ሰማይ በብዝሃ።

## Chapter 11

Deut 11:01 ወአፍቅሮ ለእግዚአብሔር አምላክክ ወዕቀብ ሕጎ ወኩነኔሁ ወትእዛዘ ወፍትሖ በኩሉ መዋዕለ ሕይወትከ።

Deut 11:02 ወታእምሩ ዮም ከመ አኮ ደቂቅክሙ ዘርእዩ ወአእመሩ ተግ(ሣ)ጸ ለእግዚአብሔር አምላክክ ወአቢያቲሁ ወእድ ጽንዕት ወመዝራዕት ልዑል።

Deut 11:03 ወተአምሪሁ ወመድምም ኩሎ ዘገብረ በመእከለ ግብጽ ወበፈርዖን ንጉሠ ግብጽ ወበኩሉ ምድሩ።

Deut 11:04 ወኸሎ ዘገብረ በኃይሎም ለግብጽ ወበሰረገላቲሆም ወበአፍራሲሆም ዘከመ ከደኖም ማይ ባሕር ኤርትራ ለዕለ ገጸም እንዘ ይዴግኑክም እሙንቱ እምድኅሬክም ወአጥፍኦም እግዚአብሔር አምላክክም እስከ ዕለት።

Deut 11:05 ወኸሎ ዘገብረ ለክም በገዳም እስከ በጽሕክም ዘንተ መካነ።

Deut 11:06 ወኸሎ ዘገብረ በዳታን ወበአቤሮን ደቂቀ ኤልያብ ወልደ ሮቤል እንተ ፈትሐት ምድር አፉሂ ወወኅጠቶም ወለአብያቲሆም ወለደባትሪሆም ወለኸሉ ንዋዮም ዘምስሌሆም እምነ መእከሎም ለኸሉ እስራኤል።

Deut 11:07 እስመ አዕይንቲክም ርእያ ኸሎ ግብረ ዐቢያተ ዘገብረ እግዚአብሔር።

Deut 11:08 ወዕቀቡ ኸሎ ትእዛዞ ዘአነ እኤዝዘክም ዮም ከመ ትሕየው ወትትባዝኑ ወትባኡ ትትዋረሱ ምድረ እንተ ላቲ ተዐድው ዮርዳኖስ ከመ ትትዋረስዋ በህየ።

Deut 11:09 ከመ ይኑኅ መዋዕሊክም በውስተ ምድር እንተ መሐለ እግዚአብሔር ለአበዊክም ከመ የሀቦም ወለዘርአም እምድኅሬሆም ምድረ እንተ ትውሕዝ ሐሊብ ወመዐረ።

Deut 11:10 ወከመዝ ይእቲ ምድር እንተ ትበውእ ህየ ትትዋረስ አኮ ከመ ምድረ ግብጽ ይእቲ እንተ እምኔሃ (አ)ውፀአክ ዘሶበ ዘይዘርኡ ዘርአ ይሰቁዩ በእገረሆም ከመ ዐጸደ ኅምል።

Deut 11:11 ወምድርስ እንተ ህየ ትበውእ ከመ ትትዋረሳ ምድር ይእቲ እንተ ባቲ አድባረ ወአምዳረ ወእምነ ዝናመ ሰማይ ትሰቅይ።

Deut 11:12 ማይ ምድር እንተ ዘልፈ ይኔውጸ እግዚአብሔር አምላክክ ወአዕይንቲሁ ለእግዚአብሔር አምላክክ ላዕሌሃ እምር(እ)ስ ዓመት እስከ መኅለቅቱ ለዓመት።

Deut 11:13 ወለእመሰ ሰሚዐ ሰማዕክም ኸሎ ትእዛዞ ዘአነ እኤዝዘክም ዮም ከመ ታፍቅሮ ለእግዚአብሔር አምላክክ ወታምልኮ በኸሎ ልብክ ወበኸሎ ነፍስክ ወይሁብ ዝናመ በበ መዋዕሊሁ ላዕለ ምድርክም ዘነግህኒ ወዘሰርክኒ።

Deut 11:14 ወአስተጋቢአክ እክለክ ወወይነክ ወቅብአክ ይሁብ ሣዕረ ውስተ ገዳምክ ለእንስሳክ ወትበልዕ ወትጸግብ።

Deut 11:15 ወዑቅ ባሕቱ ኢታሥብሑ ልበክም ወትከሐዱ ወተሐውሩ ወታመልኩ በዕደ አማልክተ ወትሰግዱ ሎም።

Deut 11:16 ወይትመዐዕ በመዐት እግዚአብሔር ለዕሌክም ወየዐጽዋ ለሰማይ ወኢይመጽእ ዝናም ወምድርኒ ኢትሁብ ፍሬሃ ወትጠፍኡ ፍጡነ እም(ነ) (ም)ድር ቡርክት እንተ ወሀበክም እግዚአብሔር።

Deut 11:17 ወዕቀብዎ ለዝንቱ ነገር ውስተ ልብክም ወውስተ ነፍስክም ወረስይዎ ተአምረ ውስተ እዴክም ወይኩን ዘ(ኢ)ይትኅወሥ ቅድመ አዕይንቲክም።

Deut 11:18 ወመሀርዎ ለደቂቅክሙ ከመ ይትናገሩ ቦቱ ለእመ ነበሩ ውስተ ቤት ወለእመኒ ሐሩ ውስተ ፍኖት ወሶበኒ ትሰክብ ወሶበኒ ትትነሣእኒ።

Deut 11:19 ወጸሐፍዎ ውስተ መርፈቀ ኖጎተ ቤትክሙ ከመ ይብዛኅ መዋዕሊክሙ ወመዋዕለ ውሉድክሙ ውስተ ምድር እንተ መሐለ እግዚአብሔር ለአበዊክሙ ከመ ያህበሙ በአምጣኒ መዋዕለ ሰማይ ውስተ ምድር።

Deut 11:20 ወለእመ ሰሚዐ ሰማዕክሙ ኩሎ ትእዛዘ ዘአነ እኤዝዘክሙ ዮም ከመ ትግበሩ ወታፍ(ቀ)ርዎ ለእግዚአብሔር አምላክክሙ ወከመ ትሐሩ በኩሉ ፍናዊሁ ወከመ ትትልውዎ ወያወፅኦሙ እግዚአብሔር ለእሉ አሕዛብ እምቅድመ ገጽክሙ።

Deut 11:21 (ወ)ትትዋረስዎሙ ለአሕዛብ ዐበይት እለ ይጸንዑ ፈድፋደ እምኔክሙ።

Deut 11:22 ወኩሎ መካነ ኀበ ኬደ አሰረ እገሪክሙ ለክሙ ውእቱ እምነ ገዳም ወአንጢሊባኖን ወእምነ ፈለግ ዐቢይ አፍራጦስ ወእስከ ባሕር እንተ መንገለ ዐረብ ይከውን ደወልክሙ።

Deut 11:23 ወአልቦ መኑሂ ዘይትቀውም ቅድመ ገጽክሙ ወይወዲ እግዚአብሔር ፍርሀተክሙ ወርዕደተክሙ ለዕለ ገጸ ኩሉ ምድር እንተ ዐረግሙ ላዕሌሃ በከመ ይቤለክሙ እግዚአብሔር።

Deut 11:24 ወናሁ አነ ዮም አቀውም ቅድሜክሙ በረከተ ወመርገመ።

Deut 11:25 በረከትሰ ለእመ ሰማዕክሙ ትእዛዘ ለእግዚአብሔር አምላክክሙ ኩሎ ዘአነ እኤዝዘክሙ ዮም።

Deut 11:26 ወመርገመኒ ለእመ ኢሰማዕክሙ ትእዛዘ ለእግዚአብሔር አምላክክሙ ኩሎ ዘአነ እኤዝዘክሙ ዮም ውኅደግሙዋ ለፍኖት እንተ እኤዝዘክሙ ዮም ወሐርክሙ ወአምለክሙ በዕደ አማልክተ ዘኢታአምሩ።

Deut 11:27 ወሶበ አበአክ እግዚአብሔር አምላክክ ውስተ ምድር እንተ ላቲ ተዐዱ ዮርዳንስ ከመ ትትዋረስ በህየ ወታገብእ በረከተ ላዕለ { }ደ(ብ)ረ ጋሪዝን ወመርገመ ለዕለ ደብረ ጌባል።

Deut 11:28 [.]እለ ሀለው ማዕዶተ ዮርዳንስ ድኅረ ፍኖት ዘመንገለ ዐረብ ፀሐይ በምድረ ከናአን እለ ሀለው ውስተ ዐረብ መእኃዝ ኅልኅልታ ቅሩበ ዕፀተ ነዋኅ።

Deut 11:29 ወናሁ ተዐድውዎ ለዮርዳንስ አንትሙ ከመ ትበኡ ትትዋረስዎ ለምድር እንተ ይሁበክሙ እግዚአብሔር አምላክክሙ መክፈልተክሙ በኩሉ መዋዕል ወትነብሩ ውስቴታ።

Deut 11:30 ወዕቀቡ ከመ ትገበሩ ኩሎ ትእዛዘ ወፍትሐ ወኩሎ ዘአነ እሁበክሙ ቅድሜክሙ ዮም።

Deut 12:01 ወዝንቱ ውእቱ ትእዛዝ ወፍትሕ ዘትዐቅቡ ከመ ትግበሩ በምድር እንተ ይሁበክሙ እግዚአብሔር አምላክክሙ መክፈልተክሙ በኩሉ መዋዕል ዘተሐይው አንትሙ ላዕለ ምድር።

Deut 12:02 ወደምስሶ ደምስስዎ ለኩሉ መካን ዘውስቴቱ አምላኩ አማልክቲሆሙ አሕዛብ እለ አንትሙ ትትወረስዎሙ በውስተ አድባር ነዋኅት ወበውስተ አውግር ወበታሕተ አእዋም ቈጸል።

Deut 12:03 ወንሥቱ ምሥዋዒቲሆሙ ወቀጥቀጡ ምስሌሆሙ ወግዝሙ አእዋሚሆሙ ወአውዕዩ በእሳት ግልፎ አማልክቲሆሙ ወደምስሶ አስማቲሆሙ እምነ ውእቱ መካን።

Deut 12:04 ወትገብሩ ከመዝ ለእግዚአብሔር አምላክክሙ በአሐቲ እምነ አህጉሪክሙ ከመ ይሰመይ ስሙ በህየ።

Deut 12:05 ወትወስዱ መሥዋዕተክሙ ወቀሩባነክሙ ወቀዳሚያቲክሙ ወብፅዓቲክሙ ወዘበፈቃድክሙ ወዘበ አሚንክሙ ወበኩረ አልህምቲክሙ ወዘአበግዔክሙ።

Deut 12:06 ወብልዑ በህየ በቅድመ እግዚአብሔር አምላክክሙ ወተፈሥሑ በኩሉ ዘውስቴቱ ወይደክሙ እዴክሙ አንትሙ ወበቤትክሙኒ እስመ ባረከከ እግዚአብሔር አምላክክ።

Deut 12:07 ኢትግበሩ ኩሉ ዘንሕነ ንገብር ዮም በዝየ አሐዱ አሐዱ ዘአደመ በቅድሜሁ።

Deut 12:08 እስመ ኢበጻሕክሙ እስከ ይእዜ ውስተ ምዕራፊክሙ ወውስተ ርስትክሙ ዘይሁበክሙ እግዚአብሔር አምላክክሙ።

Deut 12:09 ወዕድው ዮርዳኖስ ወንበሩ ውስተ ምድር እንተ ያወርሰክሙ እግዚአብሔር አምላክክሙ ወያዕርፈክሙ እምነ ኩሉ ፀርክሙ እለ አውድክሙ ወትነብሩ ተአሚነክሙ።

Deut 12:10 ወይኩን ዝክቱ መካን ዘኅርየ እግዚአብሔር አምላክ(ክ)ሙ ከመ ይሰመይ ስሙ በህየ ትወስዱ ኩሎ ዘአነ እኤዝዘክሙ ዮም መሥዋዕተክሙ ወቀሩባነክሙ ወዐሥራቲክሙ ወቀዳሚያተ እደዊክሙ ወሀብተክሙ ወኅሩየ ኩሉ መባእክሙ ወኩሎ ዘበፀፀክሙ ለአምላክክሙ።

Deut 12:11 ወተፈሥሑ ቅድመ እግዚአብሔር አምላክክሙ አንትሙ ወደቂቅክሙ ወአዋልዲክሙ ወአግብርቲክሙ (ወአእማቲክሙ) ወሌዋዊያን እለ ውስተ አንቀጽክሙ እስመ አልቦ ክፍለ ወርስተ ምስሌክሙ።

Deut 12:12 ወዑቅ ርእሰከ ኢትግበር መሥዋዕተከ (በ)ኩሉ መካን በኃበ ርኢከ እንበለ ውስተ መካን ዘኅርየ እግዚአብሔር አምላክከ በውስተ አሐዱ እምነ ሕዘቢከ ህየ ትግበር መሥዋዕትከ ወህየ ትገብር ኩሎ ዘአነ እኤዝዘከ ዮም።

Deut 12:13 ወእምነ ኩሎ ዘፈተውከ ትጥባኅ በህየ ወብላዕ ሥጋ በከመ በረከቱ (ለእግዚእ) ለእግዚአብሔር እንተ ወሀበከ በኩሉ አህጉር ዘርኩሰኒ ወዘንጹሕኒ ኅቡረ ይብልዕዎ ከመ ወይጠል አው ከመ ሀየለ።

Deut 12:14 ወበሕቱ ደመ ኢትብልዑ ውስተ ምድር ከዐውዎ ከመ ማይ።

Deut 12:15 ወኢትክል በሊዎቶ በኩሉ አህጉሪክ ዕሥራተ ወይንክ ወእክልክ ወቅብእክ ወበኩረ አልህምቲክ ወዘአበግዲክ ወኩሎ ብፅዓቲክም ዘበፃዕክም ወዘአሚናትክም ወዘቀዳሚያተ እደዊክም።

Deut 12:16 በቅድመ እግዚአብሔር አምላክክ ብልዎ በውእቱ መካን ዘኅርየ እግዚአብሔር አላክክ አንተ ወደቂቅክ ወወለትክ ወገብርክ ወአመትክ ወግድር ዘውስተ ሀገርክም ወትትፌሣሕ በቅድመ እግዚአብሔር አምላክክ በኩሉ ዘወደይክ ውስቴቱ እዴክ።

Deut 12:17 ወዑቅ ርእስክ ኢትኅድጎ ለሌዋዊ በኩሉ መዋዕል ዘሕያው አንተ ለዕለ ምድር።

Deut 12:18 ወለእመኒ አርሐበ ለክ እግዚአብሔር ደወለክ በከመ ይቤለክ አምላክክ ወትቤ እብላዕ ሥጋ ለእመ ፈተውተ ነፍስክ ከመ ትብላዕ ሥጋ እምኩሉ ዘፈተውተ ነፍስክ ብላዕ ሥጋ።

Deut 12:19 ወለእመሰ ርሑቅ ውእቱ መካን ኅበ ኅርየ እግዚአብሔር አምላክክ ከመ ይሰመይ ስሙ በህየ ወትጡብኅ እምውስተ ኩሉ አልህምቲክ ወአበግዲክ እምውስተ ዘወሀበክ እግዚአብሔር አምላክክ በከመ አዘገዝኩክም ውብላዕ በሀገርክ ዘፈተውት ነፍስክ።

Deut 12:20 በከመ ትበልዑ ወይጠል አው ሀየለ ከማሁ ብልዎ ዘርኩስኒ እምኔክ ወዘንጹሕኒ ከማሁ ብልዕዎ።

Deut 12:21 ወተዓቀብ ጥቀ ከመ ኢትብላዕ ደመ እስመ ደሙ ነፍሱ ውእቱ ወኢይብልዑ ነፍሰ ምስለ ሥጋ ኢትብልዑ ውስተ ምድር ከዐውዎ ከመ ማይ።

Deut 12:22 ወኢትብልዎ ከመ ሠናይ ትኩንክ ውሉድከኒ እምድኅሬክ ወለእመ ገበርክ ዘሠናይ ቅድመ እግዚአብሔር አምላክክ ወዘአዳም።

Deut 12:23 ወባሕቱ ዘረሰይክ ቅዱሰ ወዘበፃዕክ ንሣእ ወሖር ውስተ መካን ኅበ ኅርየ እግዚአብሔር አምላክክ ከመ ይሰመይ ስሙ በህየ።

Deut 12:24 ትገብር መሥዋዒክ ሥጋሁ ወትወዲ ውስተ መሥዋዕ ወደሞሰ ለመሥዋዕትክ ትክ(ዕ)ው ኅበ መንበረ ምሥዋዕ ዘእግዚአብሔር አምላክ ውብላዕ እምነ ሥጋሁ።

Deut 12:25 ወዕቀብ ወስማዕ ኩሎ ቃለ ዘኣነ እኤዝዘክ ዮም ከመ ሠናይ ይኩንክ ወለውሉድክ ለዓለም ለእመ ገበርክ ዘሠናይ ወዘአዳም ቅድመ እግዚአብሔር አምላክክ።

Deut 12:26 ወለእመኒ አጥፍአሙ እግዚአብሔር አምላክክ ለአሕዛብ እለ ትበውእ ህየ ከመ ትትዋረስዎሙ ምድሮሙ እምቅድመ ገጽክ ወትትዋረስዎሙ ወትነብር ውስተ ምድር ዑቅ ርእስክ።

Deut 12:27 ኢትፍቅድ ተሊዎቶሙ እምድኅረ ተሠረው እምቅድመ ገጽክ ወኢትፈቅድ አማልክቲሆሙ ወኢትበል ከመዝ ይገብሩ አሕዛብ ለአማልክቲሆሙ እግበር አነኒ።

Deut 12:28 ወኢትግበር ከማሁ ለእግዚአብሔር አምላክክ እስመ ጸልኦ እግዚአብሔር ርኩስ ዘይገብሩ አሕዛብ ለአማልክቲሆሙ እስመ ደቂቆሙ ወአዋልዲሆሙ ያውዕዩ በእሳት ለአማልክቲሆሙ።

Deut 12:29 ኩሎ ቃለ ዘኣነ እኤዝዘክ ዮም ኪያሁ ዕቀብ ለገቢረ ኢትወስክ ለዕሌሁ ወኢታንኪ እምኔሁ።

## Chapter 13

Deut 13:01 ወለእመኒ ተንሥኦ እምኔክ ነቢይ አው ሐለመ ሕልመ ወገብረ ተአምረ አው መድምመ ወበጽሐ ተአምረሁ አው መድምመ ዘ(ይ)ቤለክ እንዘ ይብል ነዓ ንሖር ወናምልክ አማልክተ ዘኢታአምሩ ኢትስምዕዎ ቃሎ ለውእቱ ነቢይ አው ለውእቱ ሐላሜ ሕልም።

Deut 13:02 እስመ ያሜክረክሙ እግዚአብሔር አምላክክሙ ከመ ይርአይ ለእመ ታፈቅርዎ ለእግዚአብሔር አምላክክሙ እምኩሉ ልብክሙ ወእምኩሉ ነፍስክሙ።

Deut 13:03 ወትልውዎ ለእግዚአብሔር አምላክክሙ ወኪያሁ ፍርሁ ወትእዛዞ ዕቀቡ ወቃሎ ስምዑ ወኅቢሁ ተመሕፀኑ።

Deut 13:04 ወዝክቱስ ነቢይ አው ሐላሜ ሕልም ለይሙት እስመ ነገረክ በዘ ያስሕተክ (እምነ) እግዚአብሔር አምላክክ ዘአውፅኦክ እምነ ምድረ ግብጽ ወቤዘወክ እምነ ቅኔት።

Deut 13:05 ወእስመ ፈቀደ ያኅድገ ፍኖተ እንተ አዘዘክ እግዚአብሔር አምላክክ ከመ ትሖር ባቲ ወታሴስል ወታማስን እኩየ እምኔክሙ።

Deut 13:06 ወለእመኒ አስተባልፀክ እኩክ ዘእምነ አቡክ አው ዘእምነ እምክ አው ወልድክ አው ወለትክ አው ብእሲትክ እንተ ውስተ ሕፅንክ አው ዐርክክ ዘከመ ነፍስክ፡፡ ወይቤለክ በጽምሚት ንዐ ንሖር ወናምልክ አማልክተ በዕደ ዘኢታአምር አንተ ወአበዊክ እምውስተ።

Deut 13:07 አማልክተ አሕዛብ ወእለ አውድክሙ ወእለ ቅሩብክሙ አው እምእለ ርሑቃን እምኔክሙ እምአጽናፈ ምድር እስከ ጽንፈ ምድር ኢትኅበር ምስሌሆሙ ወኢትስምዎ ወኢትምሐኮ ዐይንክ ወኢትመሐሮ።

Deut 13:08 አይድዕ ወንግር በእንቲአሁ እደዊክ ይቅድማ ቀቲሎቶ ወእምዝ እደወ ኩሉ ሕዝብ ወይግራሁ በእብን ወይቅትልዎ።

Deut 13:09 እስመ ፈቀደ ያርሕቀ እምነ እግዚአብሔር አምላክክ ዘአውፅኦክ እምነ ምድረ ግብጽ እምነ ቤተ ቅኔት።

Deut 13:10 ወኩሎ እስራኤል ሰሚዎ ይፍራህ ወኢይድግሙ እንከ ገቢረ እኩየ ውስቴትክሙ።

Deut 13:11 ወለእመኒ ሰማዕከ በውስተ አሐቲ እምነ አህጉሪከ ዘመሀበከ እግዚአብሔር አምላክከ ከመ ትንበር ህየ እንዘ ይብሉ ወፅኡ ዕደው ኃጥአን እምኔን።

Deut 13:12 ወአክሕድዎሙ ለኩሎሙ እለ ይነብሩ ውስተ አህጉሪክሙ ወይቤልዎሙ ንዑ ንሖር ወናምልክ ባዕደ አማልክተ ዘኢታአምሩ ወትሰአል ወተሐትት ጥቀ።

Deut 13:13 ወእም{ቅ}ከመ አማን ኮነ ወጥዩቀ ነገሩ ከመ ኮነ ርኩስ ውስቴትክሙ ቀቲለ ቅትሉ ኩሎሙ እለ ይነብሩ ውስተ ይእቲ ሀገር በኅጺን።

Deut 13:14 ወረጊመ ትረግምዋ ወለኩሉ ዘሀለወ ውስቴታ ወለኩሉ ንዋያ ታስተጋብእ ውስተ ፍናዊሃ ወታውዒ ሀገራ በእሳት

Deut 13:15 ምስለ ኩሉ ንዋያ ወለኩሉ ሀገር ከማሁ ትገብራ በቅድመ እግዚአብሔር አምላክከ ወአልቦ ዘይነብር ውስቴታ ለዓለም ወኢትትነደቅ።

Deut 13:16 ወኢትግስስ በእደከ ምንተኒ ዘርጉም እምነ ዘውስቴታ ከመ ይሚጥ እግዚአብሔር መዓቶ ወየሀብከ ምሕረተ ወይምሐርከ ወይስተባዝኅከ በከመ መሐለ እግዚአብሔር ለአበዊክ።

Deut 13:17 ከመ ለእመ ሰሚዐ ሰማዕከ ቃለ እግዚአብሔር አምላክከ ወዐቀብከ ኩሎ ትእዛዞ ኩሎ ዘኣነ እኤዝዘከ ዮም ወገበርከ ዘሠናይ ወዘአዳም ቅድመ እግዚአብሔር አምላክከ ውሉዶ ትከውኑ ለእግዚአብሔር አምላክክሙ።

## Chapter 14

Deut 14:01 ወኢትትላጸዩ ርእሰክሙ ዲበ ዘሞተ እስመ ሕዝብ ቅዱስ አንተ ለእግዚአብሔር አምላክከ ወኪያከ ኅርየ እግዚአብሔር አምላክከ ከመ ትኩኖ ሕዝቦ ለርእሱ እምውስተ ኩሎ አሕዛብ ዘውስተ ገጸ ምድር።

Deut 14:02 ወኢትብልዑ ኩሎ ዘንተ ዘርኩስ ወዝንቱ ውእቱ ዘትበልዑ እምውስተ እንስሳ ላህመ ወበግዐ እምውስተ አበግዕ ወሐርጌ እምውስተ አጠሊ ወሀየለ ወወይጠለ ወቶራ ወደስክነ ወውዕለ ወአሪጋ ወዛራተ።

Deut 14:03 ወኩሉ እንስሳ ዘንፉቅ ሰኩናሁ ወንፉቅ ጽፍሩ ወክልኤቱ ጽፈሪሁ ወይትመሠኳዕ ዝንቱ ዘትበልዑ እምውስተ እንስሳ።

Deut 14:04 ወዝንቱ ኢትበልዑ እምውስተ ዘይትመሠኳዕ ወዘንፉቅ ሰኩናሁ ወዘክፉል ጽፈሪሁ ገመል ወዳሲጳዳ ወክሮግሊዮን እስመ ይትመሠኳዕ ወኢኮነ ንፉቀ ጽፈሪሁ ርኩስ ውእቱ ዝንቱ ለክሙ

Deut 14:05 Vacat

*THEOT Deuteronomy in IES 294*

Deut 14:06 ወዝእበኒ እስመ ንፉቅ ሰኩናሁ ወክፉል ጽፈሪሁ ወተመሥኸዖስ (ኢይትመሰኳዕ እርኩስ) ውእቱ ዝንቱ ለክሙ እምውስተ ሥጋሆሙ ኢትብልዑ ወበድኖሙኒ ኢትግስሱ።

Deut 14:07 ወዝንቱ ዘትበልዑ ዘእምውስተ ማይ ኩሉ ዘቦቱ ክንፈ ወቅሣረ ብልዑ።

Deut 14:08 ወኩሎ ዘአልቦቱ ክንፈ ወቅሣረ ኢትብልዑ ርኩስ ውእቱ ዝንቱ ለክሙ።

Deut 14:09 ወኩሎ ሶፈ ዘንጹሕ ብልዑ።

Deut 14:10 ወዝንቱ ዘኢትበልዑ እምኔሆሙ ንስረ ወጊጳ ወኤሊዮጦን ወግሪጳ ወሆበይ ወአምሳሌሁ።

Deut 14:11 ወቋዐ ወዘአምሳሌሁ።

Deut 14:12 ወሰገኖ ወግለውቃ ወለሮን ወአሮድዮን ወቀቃኖን ወኢብን ወቀጠ(ራ)ቅጤን ወጉዛ ወዘአምሳሌሁ።

Deut 14:13 ወሂጳጳ ወጉጋ ወአበ ጉንበሕ ወከራድርዮን ወዘአምሳሌሁ።

Deut 14:14 ወጳርፍርዮን ወፅግነተ።

Deut 14:15 ዝንቱ ኩሉ አዕዋፍ ዘርኩስ ውእቱ ለክሙ ወኢትብልዑ እምኔሆሙ።

Deut 14:16 እምኩሉ አዕዋፍ ዘንጹሕ ብልዑ።

Deut 14:17 ወኩሎ ምውተ ኢትብልዑ ለፈለሲ ዘውስተ ሀገርከ ሀብዖ ይብልዐ አው ሀብዖ ለባዕድ እስመ ሕዝብ ቅዱስ አንተ ለእግዚአብሔር አምላክክ።

Deut 14:18 ወኢታብስል መሕሰአ በሐሊበ እሙ።

Deut 14:19 ዓሥራተ ትዔሥር ኩሎ እክለከ ዘዘራእከ ዘታኦቱ እምውስተ ገራውሂከ በበ ዓመቱ ወብልዖ በበ ዓመቱ።

Deut 14:20 በቅድመ እግዚአብሔር አምላክከ በመካን ዘኅርዮ እግዚአብሔር አምላክከ ከመ ይሰመይ ስሙ በህየ።

Deut 14:21 ወታብውእ ዓሥራቲሁ ለእክልከ ወለወይንከ ወለቅብእከ ወበኩረ አልህምቲከ ወዘአበግዒከ ከመ ትትመሀር ፈሪሆቶ ለእግዚአብሔር አምላክከ በኩሉ መዋዕል።

Deut 14:22 ወለእመሰ ርሑቅ ውእቱ እምኔከ ፍኖቱ ወኢትክል ወሲደ እስመ ርሑቅ ውእቱ መካን ዘኅርዮ እግዚአብሔር አምላክከ ከመ ይሰመይ ስሙ በህየ እስመ ይበርከ እግዚአብሔር አምላክከ

Deut 14:23 ወቱህብ ሢጦ ለኩሉ ዘፈተወት ነፍስክ።

Deut 14:24 አው ለላህም አው ለበግዕ አው ለወይን አው ለሜስ አው ለኩሉ ዘፈተውት ነፍስከ ወብለዕ በህየ በቅድመ እግዚአብሔር አምላክከ ወተፈሣሕ አንተ ወቤትከ።

Deut 14:25 ወሌዋዊ ዘውስተ ሀገርከ እስመ አልቦ ክፍለ ወርስተ ምስሌከ።

Deut 14:26 ወበሣልስ ዓም ታበውእ ኩሎ ዓሥራተ እክልከ ወበዓመቲሁስ ታነብሮ ውስተ ሀገርከ ወእምዝ ይመጽእ ምስሌከ ሌዋዊ እስመ አልቦ ክፍለ ወርስተ ምስሌከ።

Deut 14:27 ወግዩር ወእሹለ ማውታ ወእቤር እንተ ውስተ ሀገርከ ከመ ይብልዑ ወከመ ይበርከ እግዚአብሔር አምላክከ በኩሉ ግብርከ ዘገበርከ።

## Chapter 15

Deut 15:01 ወበሳብዕ ዓም ትገብር ኅድገተ ወከመዝ ውእቱ ትእዘዝ ለኅድገት ዘይትኅደግ።

Deut 15:02 ኩሎ ንዋየከ ዘይፈድየከ ከልእከ ወእኑከ ኢትትፈደይ እስመ ኅድገተ ተሰምየት ለእግዚአብሔር አምላክከ።

Deut 15:03 ወዘኅቤስ ነኪር ትትፈደይ ኩሎ ዘብከ ኅቤሁ ወለእኑከስ ኅድገተ ትገብር ዘይፈድየከ።

Deut 15:04 እስመ አልቦ ነዳየ እምኔከ እስመ ባርኮ በረከከ እግዚአብሔር አምላክከ በውስተ ምድር እንተ ይሁበከ እግዚአብሔር አምላክከ መክፈልተከ ዘትወርስ።

Deut 15:05 ወለእመሰ ሰሚዐ ሰማዕከ ቃለ እግዚአብሔር አምላክከመ ወዐቀብክመ ወገበርክመ ኩሎ ዘንተ ትእዘዝ ዘእነ እኤዝዘከ ዮም እስመ በረከከ እግዚአብሔር አምላክከ በከመ ይቤለከ።

Deut 15:06 ወትሌቅሕ ለአሕዛብ ብዙኅ ወአንተስ ኢትትሌቅሕ ወትኳ(?)ኖመ ለአሕዛብ ብዙኃን አንተ ወለከስ ኢይኳንኑከ።

Deut 15:07 ወለእመሰ ቦ ዘተፀንስ እምውስተ አኅዊከ በ(አ)ሐቲ እምውስተ አህጉሪከ ዘወሀበከ እግዚአብሔር አምላክከ ወኢትመይጥ ልብከ ወኢታጽንዕ እዴከ እምነ ውሂቦቱ ለእኑከ።

Deut 15:08 ወፍታሕ ወአርኑ እዴከ ወሀቦ ለእኑከ ዘሰአለከ እምነ ዘሰአለከ።

Deut 15:09 ወዑቅ ርእሰከ ኢይኩንከ ቃለ ኃጢአተ ውስተ ልብከ እንዘ ትብል ቅሩብ ውእቱ ዓመተ ኅድገት ዘሳብዕ ዓም ወኢይሁቦ ወያኣኪ ለዕሌከ ዐይኖ እኑከ ወይጸርኅ ዲቤከ ኅብ እግዚአብሔር ወይከውን ኃጢአት ላዕሌከ።

## THEOT Deuteronomy in IES 294

Deut 15:10 አላ ውሂበኒ ሀቦ ወለቅሖኒ ለቅሖ መጠነ ሰአለክ ወኢይተክዘክ ልብክ እንዘ ትሁቦ እስመ በበይነ ዝንቱ ይበርከክ እግዚአብሔር አምላክክ በኩሎ ምግባሪክ ወውስተ ኩሎ ዘወደይክ እዴክ።

Deut 15:11 እስመ ኢትኅጥእ ነዳይ ውስተ ምድር ወበበይነ ዝንቱ እኤዝዘክ አነ ዮም ትግበር ዘንተ ነገረ ወእቤለክ ከመ ትፍታሕ ወከመ ታርጉ እዴክ ለእጉክ ዘነዳይ ውእቱ ወለዘ ይስእለክሂ ዘቅሩብክ ዘውስተ ምድርክ።

Deut 15:12 ወለእመኒ ተሣይጦ ኅቤክ እጉክ ዕብራዊ አው ዕብራዊት ስድስተ ዓመተ ይትቀነይ ለክ ወበሳድስ ዓም ትፌንዎ አግዲዘክ እምኅቤክ።

Deut 15:13 ወኢትፌንዎ ዕራቆ።

Deut 15:14 ሥንቀ ታሠንቆ እምውስተ አበ(ግ)ዲክ ውእምውስተ እክልክ ወእምውስተ ምክያደ ወይንክ በአምጣነ በረከክ እግዚአብሔር አምላክክ ትሁቦ።

Deut 15:15 ወተዘከር

Deut 15:16 Vacate

Deut 15:17 Vacate

Deut 15:18 Vacate

Deut 15:19 Vacate

Deut 15:20 Vacate

Deut 15:21 Vacate

Deut 15:22 Vacate

Deut 15:23 Vacate

## Chapter 16

Deut 16:01 Vacate

Deut 16:02 Vacate

Deut 16:03 Vacate

Deut 16:04 Vacate

Deut 16:05 Vacate

Deut 16:06 Vacate

Deut 16:07 Vacate

Deut 16:08 Vacate

Deut 16:09 Vacate

Deut 16:10 Vacate

Deut 16:11 መካን ዘኅርየ እግዚአብሔር አምላክከ ከመ ይሰመይ ስሙ በህየ።

Deut 16:12 ወተዘከር ከመ ገብር አንተ በምድረ ግብጽ ወዕቀብ ወግበር ኩሎ ዘንተ ትእዛዘ።

Deut 16:13 ወትገብር ለከ በዓለ መጸላት ሰቡዐ ዕለተ ሶበ አስተጋብእክ እክለክ እምውስተ ምክያደ ወይንከ።

Deut 16:14 ወተፈሣሕ በበዓልከ ወወልድከኒ ወወለትከኒ ወገብርከኒ ወአመትከኒ ወሌዋዌ ወግዩር ወእረሻ ማውታ ወአቤር እንተ ሀለወት ውስተ ሀገርከ።

Deut 16:15 ሰቡዐ ዕለተ ትገብር በዓለ ለእግዚአብሔር አምላክከ በውስተ መካን ዘኅርየ እግዚአብሔር አምላክከ እምውስተ ኩሎ እክልከ ወእምውስተ ኩሎ ግብረ እዴከ።

Deut 16:16 ወተፈሣሕ ሠለስተ ዘመነ ለዓመት ወያስተርኢ ኩሎ ተበዕትከ ቅድመ እግዚአብሔር አምላክከ በውስተ መካን ዘኅርየ እግዚአብሔር አምላክከ በበዓለ ሕገ ሀሌሉያ ወበበዓላ ሰንበት ወበበዓለ መጸላት ወኢትመጽእ ቅድመ እግዚአብሔር አምላክከ ዕራቅከ።

Deut 16:17 አሐዱ አሐዱ ወበአምጣነ ኅይላ እዴከሙ ወበአምጣነ በረከቱ ለእግዚአብሔር አምላክከሙ እንተ ወሀበክሙ ታመጽኡ።

Deut 16:18 ወሂሙ ለክሙ ወፈታሕተ ወጸሐፍተ መባእ በኩሎ አህጉሪክሙ ዘወሀበከ እግዚአብሔር አምላክከ በበነገድክሙ ወይኩንንወ ለሕዝብ ኩነኔ ጽድቅ።

Deut 16:19 ወኢያድልው ለገጽ ወኢይነሥኡ ሕልያነ እስመ ሕልያን ያዐው[ር]ሙ ለጠቢባ[ን] ወያሴ[ስሉ] ለቃሉ ጽድቅ።

Deut 16:20 ዘይ[ጸድቅኒ] በጽድቁ ለይትሉ ከመ ትሕየው ወት[ባኡ] ትትዋረሱ ምድረ እንተ ይሁበከ እግዚአብሔር አምላክከ።

Deut 16:21 ወኢትትክል ለከ አመ ዘያመልኩ እምውስተ ኩሉ ዕፅ ኅበ መሥዋዕ ለእግዚአብሔር አምላክክ።

Deut 16:22 ወኢትግበር ምስለ ዘጽልኦ እግዚአብሔር አምላክክ

## Chapter 17

Deut 17:01 ወኢትሡዑ ለእግዚአብሔር አምላክክሙ ላህመ አው በግዕ ዘቦቱ ነውር ላዕሌሁ ኩሉ ነገር እኩይ ርኩስ ውእቱ በኅበ እግዚአብሔር አምላክክ።

Deut 17:02 ወለእመኒ ተረክበከ በውስተ እምነ አህ(ጉ)ሪከ ዘወሀበከ እግዚአብሔር አምላክክ ብእሲ አው ብእሲት ዘይገብር እኩየ ቅድመ እግዚአብሔር አምላክክ እለ ተዐወሩ ሕጎ።

Deut 17:03 ወሐሩ ወአምላኩ ባዕደ አማልክተ ወሰገዱ ሎሙ ለፀሓይ አው ለወርኅ አው እምውስተ ኩሉ ሰርጉሃ ለሰማይ ዘኢአዘዘከ ወእምከመ ሰማዕከ ተሓትት ጥቀ።

Deut 17:04 ወለእመ እሙነ ኮነ ዝንቱ ነገር ወኮነ ዝንቱ ርኩስ በውስተ እስራኤል ወታወፅአ ለውእቱ ብእሲ ወእመኒ ብእሲት ይእቲ ወይወግርዎሙ በእብን ወይቅትልዎሙ።

Deut 17:05 በክልኤቱ ሰማዕት ወሠለስቱ ሰማዕት ይመውቱ እለ ይመውቱ ወኢይመውቱ በአሐዱ ስምዕ።

Deut 17:06 ወእደዊሆሙ ለውእቶሙ ሰማዕት ይቀድማ ቀቲሎቶሙ ወእምድኅፊሆሙ እደወ ኩሉ ሕዝብ ወታወፅእ እኩየ እምኔከሙ።

Deut 17:07 ወለእመቦ ዘተስእነከ ቃል በውስተ ፍትሕ ዘመእከለ ደም ወደም ወመእከለ {ለኳ} ንጹሕ ለአንጽሖ ወመእከለ ላኳ ወላኳ ቃለ ፍትሕ በውስተ አህጉሪከሙ ትትነሣእ ወተዐርግ ውስተ መካነ ዘኅርየ እግዚአብሔር አምላክክ ከመ ይስመይ ስሙ በህየ።

Deut 17:08 ወተሐውር ኅበ ካህናተ ሌዋዊያን ውኅበ መኳንንት እለ ሀለው በውእቶን መዋዕል ወተሰአል ወያየድዑከ ፍትሐ።

Deut 17:09 ወትገብር በከመ ቃል ዘነገሩከ በውእቱ መካነ ዘኅርየ እግዚአብሔር ይስመይ ስሙ በህየ፡፡ ወዕቀብ ኩሎ ከመ ትግበር ዘመሀሩከ ሕጎ።

Deut 17:10 ወበከመ ፍትሕ ዘነገሩከ ግበር ወኢትትገሐሥ እምነ ቃል ዘነገሩከ ኢለ የማን ወኢለ ፀጋም።

Deut 17:11 ወዝክቱሰ ብእሲ ዘገብረ በትዕቢት ከመ ኢይትአዘዝ ለካህን ይቀውም ወይ{.}ገብር በስሙ ለእግዚአብሔር አምላክክ አው ለመኰንን ዘሀለው በውእቶን መዋዕል ለይሙቱ ውእቱ ብእሲ ወአስሰሉ እኩየ እምነ እስራኤል።

Deut 17:12 ወኸሉ ሕዝብ ሰሚዖ ይፍራህ ወኢይድግም እንከ አብሳ።

Deut 17:13 ወለእመኒ ቦእከ ውስተ ምድር እንተ ይሁበከ እግዚአብሔር አምላክከ መክፈልትከ ወተዋረስካሃ ወነበርከ ውስቴታ

Deut 17:14 ወትቤ እሠይም ሊተ መልአከ ከመ ኸሉ አሕዛብ እለ አውድየ ወትሠይም ለከ መልአከ ዘኃርየ እግዚአብሔር አምላክከ እምውስተ አኅዊከ።

Deut 17:15 ወኢትክል ሠይመ ለከ ብእሴ ነኪረ እስመ ኢኮነ እኑከ ከመ ኢያብዝኅ ሎቱ አፍራሰ ወከመ ኢያብከ ለሕዝብ ውስተ ግብጽ እግዚአብሔር ይቤ ኢትድግም እንከ ገቢአታ ለይእቲ ፍኖት።

Deut 17:16 ወያበዝኅ ሎቱ አንስተ ወኢይሚጥ ልቦ ወኢያብዝኅ ሎቱ ወርቀ ወብሩረ ጥቀ።

Deut 17:17 ወሶበ ነበረ ውስተ ምክኖኑ ለይጽሐፍ ሎቱ ዘንተ ዳግመ ኦሪተ ውስተ መጽሐፍ እምኅበ ካህናት ወሌዋዊያን።

Deut 17:18 ወይንበር ኅቤሁ ወይንብብ ቦቱ በኸሉ መዋዕለ ሕይወቱ ከመ ይትመሀር ፍኖቶ ለእግዚአብሔር አምላኩ ወይዕቀብ ኸሎ ትእዛዘ ወይግበር ኸነኔሁ።

Deut 17:19 ከመ (ኢ.)ያዕቤ ልቦ እምነ አኅዊሁ ወከመ (ኢ.)ይኅድግ እምነ ትእዛዙ ለእግዚአብሔር አምላኩ ወኢይትገሐሥ ኢለየማን ወኢለፀጋም ከመ ያንኅ መዋዕለ በውስተ ምክኖኑ ወውእቱ ወውሉዱ በውስተ ደቂቀ እስራኤል።

## Chapter 18

Deut 18:01 ወአልቦሙ መክፈልተ ካህናት ወሌዋዊያን ወኸሉ ሕዝበ ሌዊ ምስላ እስራኤል መባኡ ለእግዚአብሔር ክፍሎሙ ወኪያሁ ይሴሰዩ።

Deut 18:02 ወክፍለ ባሕቱ አልቦሙ በውስተ አኅዊሆሙ እስመ እግዚአብሔር ውእቱ ክፍሉ በከመ ይቤሎ።

Deut 18:03 ወዝንቱ ሕጎሙ ለካህናት ዘእምኅበ ሕዝብ እለ ይጠብኅ ጥብኅ እመኒ ላህም ወእመኒ በግዕ ዘይሁብዎ ለካህን መዝራዕተ ወሕልቀ ወቄሰጤ።

Deut 18:04 ወቀዳሜ እክልከ ወቀዳሜ ወይንከ ወቀዳሜ ቅብእከ ወእምነ ዘቀረፅከ አባግዲከ ትሁቦ።

Deut 18:05 እስመ ኅርየ እግዚአብሔር አምላክከ እምውስተ ኸሉ ሕዘቢከ ከመ ይቁም ቅድሚሁ ለእግዚአብሔር አምላክከ ወይትለአከ ወይባርከ በስመ ዚአሁ ውእቱ ወደቂቁ በኸሉ መዋዕል።

Deut 18:06 ወለእመ (መጽአ) ሌዋዊ እምውስተ አህጉሪክሙ ዘእምነ ኩሉ ደቂቀ እስራኤል ዘኅበ ይነብር ውእቱ እስመ ፈተወ በነፍሱ ከመ ይትለአክ በውእቱ መካን ኅበ ኅርየ እግዚአብሔር አምላክከ።

Deut 18:07 ወይትቀነይ ለስመ እግዚአብሔር አምላኩ ከመ ኩሉ አኅዊሁ ሌዋዊያን እለ ይቀውሙ ህየ ቅድመ እግዚአብሔር።

Deut 18:08 ይትከፈል መክፈልቶ ወይሴሰይ ዘእንበለ ዘበ ሢመቱ ዘበሀገሩ።

Deut 18:09 ወለእመ ቦእከ ውስተ ምድር እንተ ይሁበከ እግዚአብሔር አምላክከ ኢትትመሀር ገቢረ ከመ ርኩሶሙ ለውእቶሙ አሕዛብ።

Deut 18:10 ወኢይትረከብ በውስቴትክሙ ዘይሠውዕ ወልዶ አው ወለቶ በእሳት በዘ ያስተቃስም መቅሰመ ወዘያስተግል ወዘይጤየር ወዘሥራይ ወዘሐርስ ወዘበፃውዕ ወዘያነቅህ ምውተ ወዘያስተሰግል በዖፍ።

Deut 18:11 እስመ ርኩስ ውእቱ ኩሉ ዘይገብሮ ለዝንቱ በኅበ እግዚአብሔር እስመ በበይነ ዝንቱ ርኩሶሙ ያጠፍአሙ እግዚአብሔር እምኔከ።

Deut 18:12 ወኩን ፍጹመ ቅድመ እግዚአብሔር አምላክከ እስመ እልክቱ አሕዛብ እለ እንቱ ትትወረሶሙ እሙንቱ የስተሰግል ወያጸምእ መቅሰመ ወለከሰ አኮ ከማሁ።

Deut 18:13 ነቢየ ወሀበከ እግዚአብሔር አምላክከ እምውስተ አኅዊከ ዘከማየ ወያነሥእ ለከ እግዚአብሔር አምላክከ ወሎቱ ሰምዕዎ በኩሉ።

Deut 18:14 ወኩሉ ዘሰአልካሁ ለእግዚአብሔር አምላክከ በኮሬብ አመ ዕለተ ተጋባእክሙ ወትቤሉ ኢንድግም እንከ ሰሚዖተ ቃሎ ለእግዚአብሔር አምላክከ ወዛቲኒ እሳት ዐቢይ ኢንርአያ እንከ ከመ ኢንሙት።

Deut 18:15 ወይቤለኒ እግዚአብሔር አማን ኩሉ ዘይቤሉ።

Deut 18:16 ነቢየ አነሥእ ሎሙ እምውስተ አኅዊሆሙ ዘከማከ ወእሁብ ቃልየ ውስተ አፉሁ ወይነግሮሙ ዘከመ አዘዝኩዎ።

Deut 18:17 ወብእሲ ዘኢሰምዖ ለውእቱ ነቢይ በኩሉ ዘነገረ በስመ ዚአየ አነ እትቤቀል እምኔሁ።

Deut 18:18 ወባሕቱ ነቢይ ዘይኤብስ ወይነብብ ቃለ በስምየ ዘኢአዘዝኩዎ ይንብብ ወዘነበበሂ በስመ ባዕድ አማልክት ለይሙት ውእቱ ነቢይ።

Deut 18:19 ወለመሰ ትብል በሉብከ እፎ አእምር ቃለ ዘኢይቤ እግዚአብሔር እምነ ኩሉ ዘነበበ ነቢይ በስመ እግዚአብሔር እምከመ ኢበጽሐ ቃለ ወኢኮነ በከመ ይቤ ኢነበበ እግዚአብሔር ለውእቱ ቃል ወበሐሰት ነበበ ውእቱ ነቢይ ወኢትስምዕዎ።

## Chapter 19

Deut 19:01 ወለእመ አጥፍአሙ እግዚአብሔር አምላክከ ለአሕዛብ እለ ይሁበከ እግዚአብሔር ምድሮሙ ወተዋረስክ(ሙ) ምሙ ወነበርክሙ ውስተ ምድሮሙ ወውስተ አህጉሪሆሙ ወውስተ አቢያቲሆሙ ሠላሳ አህጉረ ትፈልጥ ለከ በመእከለ ምድርክ እንተ ወሀበከ እግዚአብሔር አምላክክ።

Deut 19:02 ወታኦምር ለሊከ ፍኖቶን ወትከፍል ደወለ ምድርክ ምሥልስተ ዘአስተካፈለከ እግዚአብሔር አምላክከ ወይኩን ህየ ምስካዩ ለቀታሊ ለኩሉ።

Deut 19:03 ወዝንቱ ውእቱ ሕጉ ለቀታሊ እምከመ ሰከየ ህየ ይሕየው ለእመ በኢያአምሮ ቀተሎ ለካልኡ ወለእመ ኢኮነ ጸላኢሁ ቀዲሙ።

Deut 19:04 ለእመቦ ዘሐረ ምስለ ካልኡ ሐቅለ ይሕጥብ ዕፀ ወቄስለ እዴሁ በጉድብ እንዘ ይገዝም ዕፀ ወወድቀ ጎጂን እምውስተ ዕፁ ወወረደ ላዕለ ካልኡ ወቀተሎ ይሰኪ ውእቱ ውስተ አሐተ እምነ እላንቱ አህጉር ወየሐዩ ከመ።

Deut 19:05 ኢይዴግኖ አበ ደም ወይትልዎ ለቀታሊ እስመ ተቀየሞ በልቡ ወይርከቦ ለእመ ርሕቆ ፍኖት ወይቀትሎ ነፍሶ እንዘ ኢኮነ አበሳሁ ለሞት እስመ ኢኮነ ጸላኢሁ ቀዲሙ።

Deut 19:06 ወበበይነ ዝንቱ አዘዝኩከ አነ ተግባር ዘንተ ነገረ ወእቤለከ ሠላሳ አህጉረ ፍልጥ ለከ።

Deut 19:07 ወለእመ አርሐበ ለከ እግዚአብሔር ደወለከ በከመ መሐለ እግዚአብሔር ለአበዊከ ወወሀባከ እግዚአብሔር ኩሎ ምድረ እንተ ይቤ እግዚአብሔር እሁቦሙ ለአበዊከ።

Deut 19:08 ለእመ ሰማዕከ ከመ ትግበር ኩሎ ዘንተ ትእዛዘ ዘአነ እኤዝዘከ ዮም ከመ ታፍቅሮ ለእግዚአብሔር አምላክከ ወከመ ትሐር በኩሉ ፍናዊሁ በኩሉ መዋዕል ወትዌስክ ለከ ዓዲ ሠላሳ አህጉረ ላዕለ እለክቱ ሠላሰ።

Deut 19:09 ወኢይትከዐው ደም ንጹሕ ውስተ ምድርክ እንተ ወሀበከ እግዚአብሔር አምላክከ ምክፈልትከ ወኢሀሉ ውስቴትክሙ ቀታሊ ነፍስ።

Deut 19:10 ወለእመሰቦ ብእሲ ዘይጸልኦ ለካልኡ ወይጸንሖ ወእምዝ ተንሥኦ ላዕሌሁ ወቀተሎ ነፍሶ ወሞተ ወሰከየ ውስተ አሐቲ እምእላንቱ አህጉር ወይልእኩ ሊቃናት ሀገሩ ወያመጽእዎ እምህየ ወይሜጥውዎ ኪያሁ ለአበ ደም ወይቀትሎ።

Deut 19:11 ወዐይንከ ኢትምሓኮ ወታነጽሕ ደም ንጹሕ እምነ እስራኤል ወትከውን ሠናይት ላዕሌከ።

Deut 19:12 ወትትጎሠሥ ደወለ ቢጽከ ዘሠርዑ አበዊከ በውስተ ርስትከ ዘተወረስከ ምድረ እንተ ወሀበከ እግዚአብሔር አምላክከ መክፈልተከ።

Deut 19:13 ወኢይ(ከ)ውን አሐዱ ሰማዕት ከመ ይኩን ስምዐ ላዕለ ሰብእ በኩሉ ጊጋይ ወበኩሉ አበሳ ዘአበሱ በአፈ ክልኤቱ ሰማዕት ወበአፈ ሠለስቱ ሰማዕት የኅልቅ ኩሉ ነገር።

Deut 19:14 ወለእመ አምጽኡ ሎቱ ለሰብእ ሰማዕተ በዐመፃ ወነበበ ላዕሌሁ ሐሰተ ወይቀውሙ እልክቱ ክልኤቱ ዕደው እለ ይትኅሠሡ ቅድመ እግዚአብሔር ወቅድመ ካህናት ወቅድመ መኳንንት እለ ሀለው በእማንቱ መዋዕል ወየሐትቱ መኳንንት ወይጠይቁ።

Deut 19:15 ወእልክቱኒ ክልኤቱ ሰማዕት ወለዝንቱኒ አሐዱ ዐማዒ ዘኮነ ስምዐ በሐሰት ወቆመ ላዕለ ካልኡ ይግበርዎ ዘከመ ፈቀደ ይግበር እኪተ ለዕለ ካልኡ ወታሴስ(ሉ) እኩየ እምኔክሙ።

Deut 19:16 ወበዕድ ሰሚዖ ይፍራህ ወኢይድግም እንከ ገቢረ ዘንተ ነገረ እኩየ በውስቴትክሙ።

Deut 19:17 ኢትምሐኮ ነፍስ ህየቱ ነፍስ ወዐይን ህየቱ ዐይን ወስን ህየቱ ስን ወእድ ህየቱ እድ ወእግር ህየቱ እግር።

## Chapter 20

Deut 20:01 ወለእመ ወፅኦከ ፀብኦ ላዕለ ፀርከ ወርኢከ አፍራስ ወመ(ስተ)ጽዕናነ ወሕዝበ ዘይበዝኅከ ኢትፍራህ እምኔሆሙ እስመ እግዚአብሔር አምላክከ ምስሌከ ውእቱ ዘአውፅኦከ እምነ ምድረ ግብጽ።

Deut 20:02 ወሶበ አኅዝከ ትትቃተል ይመጽእ ካህን ወይንግር ለሕዝብ ወይበሎሙ ሰማዕ እስራኤል ናሁ ተሐውሩ አንትሙ ዮም ከመ ትትቃተሉ ፀረክሙ ኢይደንግፀክሙ ልብክሙ ወኢትፍርሁ ወኢትመምዑ ወኢትትገሐሡ እምቅድመ ገጸሙ።

Deut 20:03 እስመ እግዚአብሔር አምላክከ የሐውር ፍጽም ለክሙ ከመ ይቅትል ለክሙ ፀረክሙ ወለክሙስ ያድኅክሙ።

Deut 20:04 ወይብልዎሙ ጸሐፍትኒ ለሕዝብ ለእመቦ ብእሴ ዘነድቀ ቤተ ሐዲሰ ወኢገብረ መድቅሐ ቤቱ ለይሖር ወለይግባእ ውስተ ቤቱ ከመ ኢይሙት ውስተ ቀትለ ወካልእ ብእሴ ይግበር መድቅሐ ቤቱ።

Deut 20:05 ወላእመቦ ብእሴ ዘተከላ ዐጸደ ወይን ወኢተፈሥሐ እምውስቴቱ ለይሖር ወለይግባእ ውስተ ቤቱ ከመ ኢይሙት በውስተ ቀትል ወካልእ ብእሴ ይትፌሣሕ ቦቱ።

Deut 20:06 ወለእመቦ ብእሴ ዘፈኅረ ብእሴተ ወኢንሥኦ ለይሖር ወለይግባእ ውስተ ቤቱ ከመ ኢይሙት በውስተ ቀትል ወካልእ ብእሴ ይንሥኦ።

Deut 20:07 ወይድግሙ ብሄሎቶሙ ጸሐፍት ለሕዝብ ለእመቦ ብእሴ ፈራህ ዘይፈርሆ ልቡ ለይሖር ወለይግባእ ውስተ ቤቱ ከመ ኢይፍርህ ልበ ቢጹ በከመ ዚአሁ።

Deut 20:08 ወሶበ አኅለቁ ነጊሮቶሙ ጸሐፍት ለሕዝብ ይሠይሙ መላእክተ ሰራዊት እምውስተ ዐበይተ ሕዝብ።

Deut 20:09 ወሶበ ትመጽእ ኅበ ሀገር ከመ ትትቃተል ትጼውዕዎሙ በሰላም።

Deut 20:10 ወለእመ አውሥኡክ በሰላም ወአርኅውክ ይኩኑክ ኩሉ ሕዝብ እለ ተረክቡ ውስቴታ እለ ያገብኡ ለከ ጸባሕተ ወመኮናኒከኒ ይኩኑክ።

Deut 20:11 ወለእመሰ ኢያውሥኡክ ወ[ኢ.]ገብሩ ፀብአ ምስሌክ ትነበር ላዕሌሃ ወያገብኦ እግዚአብሔር አምላክከ ውስተ እደዊከ።

Deut 20:12 ወትቀትል ኩሉ ተባዕታ በቀትለ ኅጺን ዘእንበለ አንስት ወንዋየ።

Deut 20:13 ወኩሉ እንስሳ ወኩሎ ዘሀለወ ውስተ ሀገር ወኩሎ ጥሪቶሙ ትበረብር ለከ ውብላዕ ኩሎ በረባረ ፀርከ ዘወሀበከ እግዚአብሔር አምላክከ።

Deut 20:14 ወከመዝ ትገብር ለኩሉ አህጉር እለ ጥቀ ርሑቃት እምኔከ እለ ኢኮና እምውስተ አህጉሪሆሙ ለእሉ አሕዛብ እንተ ይሁበከ እግዚአብሔር አምላክከ ምድሮሙ ከመ ትትዋረሳ።

Deut 20:15 ወኢታሕይው ኩሎ ዘነፍስ አላ መርገመ ትረግምዎሙ ለኬጤዎን ወለአሞሬዎን ወለከናኔዎን ወለፌሬዜዎን ወለአዌዎን ወለኢያቡሴዎን ወለጌርጌሴዎን በከመ አዘዘከ እግዚአብሔር አምላክከ።

Deut 20:16 ከመ ኢይምሀሩክ ገቢረ ኩሉ ርክሶሙ ወኩሎ ዘከመ ይገብሩ ለአማልክቲሆሙ ወትጌጊዩ ቅድመ እግዚአብሔር አምላክከሙ።

Deut 20:17 ወለእመ ነበርከ ኅበ ሀገር ብዙኅ መዋዕላ ከመ ትትቃተላ ወከመ ትንሥኦ ኢትግዝም አማ ወኢታውርድ ኅጺነ ላዕሌሆን አላ እምኔሁ ብላዕ ቦኑ ሰብእ ውእቱ አመ ገዳም ከመ ይምጸእ ቅድሜከ ወይባእ ውስተ ቅጽርከ።

Deut 20:18 ወባሕቱ ዕፅ ዘታአምር ከመ ኢይፈሪ ኪያሁ ትገዝም ወትመትር ወትነድቅ ሐጹረ ላዕለ ይእቲ ሀገር እንተ ትገብር ፀብአ ምስሌክ እስከ ተስተጋብአ።

## Chapter 21

Deut 21:01 ወለእመ ተረክበ ቅቱል በውስተ ምድር እንተ ወሀበከ እግዚአብሔር አምላክከ ትትዋረሳ ውዱቀ ውስተ ገዳም ወኢያአምሩ ቀታሌሁ ወይወፅኡ ሊቃናቲክሙ ወመኳንንቲክሙ ወይሜጥኑ ዘአውዱ ለውእቱ ቅቱል አህጉረ።

Deut 21:02 ወሀገር እንተ ቀርቦት ይእቲ መንገሌሁ ለውእቱ ቅቱል አእሩጊሃ ለይእቲ ሀገር ያመጽኡ እጐልተ እምውስተ አልህምት እንተ ኢተቀንየት ወእንተ ኢሰሐበት አርዑተ።

Deut 21:03 ወያዐርግዋ አእሩጊሃ ለይእቲ ሀገር ለይእቲ እጐልት ውስተ ቄላት መብእስ ዘኢተሐርሰ ወኢተዘርአ ውስቴቱ ወይሜትርዋ ሠረዊሃ ለይእቲ እጐልት በውስተ ቄላት።

Deut 21:04 ወይመጽኡ ካህናት ወሌዋዊያን እስመ ኪያሆሙ ኅርየ እግዚአብሔር ይቁሙ ኅቤሁ ወይባርኩ በስመ ዚአሳሁ ወበቃለ ዚአሆሙ ይቁም ኩሉ ተስናን ወኩሉ ዘይትኅደግ።

Deut 21:05 ወኩሉ አእሩጊሃ ለይእቲ ሀገር እንተ ቅርብት ለውእቱ ቅቱል ለመንገሌሁ ወይትኅፀቡ እደዊሆሙ ላዕለ ርእስ ለይእቲ እጐልት እንተ መተርዋ ሥረዊሃ በውስተ ቄላት።

Deut 21:06 ወይነብብ ወይብሉ እደዊነ ኢከዐዋ ደዋ ለዝንቱ ወአዕይንቲነኒ ኢርእያ።

Deut 21:07 ስሪ ለሕዝብከ እስራኤል እግዚአብሔር ቤዘውካሆሙ እምነ ምድረ ግብጽ ከመ ኢይኩን ጌጋየ ነፍስ ላዕላ ሕዝብከ እስራኤል ወይሰረይ ሎሙ በእንተ ውእቱ ነፍስ።

Deut 21:08 ወአንተስ አሰስል ጌጋየ ነፍስ እምላዕሌክሙ ወትከውን ሠናይተ ላዕሌከ ለእመ ገበርከ ዘሠናይ ወዘአዳም ቅድመ እግዚአብሔር አምላክከ።

Deut 21:09 ወለእመኒ ወፀእከ ፀብአ ላዕለ ፀርከ ወአግብአሙ እግዚአብሔር አምላክከ ውስተ እዴከ ወዲወውከ ያዋሆሙ።

Deut 21:10 ወርኢከ በውስተ ዪዋ ብእሲት እንተ ሠናይት ርኢየታ ወፈተውካሃ ወነሣእካሃ ለከ ትኩንከ ብእሲተ።

Deut 21:11 ወታብውአ ውስተ ጽርሐ ቤትከ ወትላጽያ ርእሳ ወትጸፍራ ወታሴስል አልባሲሃ ዘቦቱ ተዪወወት ወታነብራ ውስተ ቤትከ ወትበኪ አቡሃ ወእማ ሠላሳ መዋዕለ።

Deut 21:12 ወእምድኅረ ዝንቱ ተበውእ ኅቤሃ ወትነብር ምስሌሃ ወትከውነከ ብእሲተ።

Deut 21:13 ወእምዝ ለእመ ኢፈቀድካሃ ትፈንዋ አጋዕዚተ ወሠይጠሰ ኢትሠይጣ በወርቅ ወኢትክሐዳ ከመ አውሰብካሃ።

Deut 21:14 ወለእመኒ አውሰበ ብእሲ ክልኤ አንስተ ወለአሐቲ ይጸልአ ወለአሐቲ ያፈቅር ወወለደት ሎቱ ወልደ በኩሮ እንተ ይጸልእ።

Deut 21:15 አመ ያስ(ተ)ዋርሶሙ ንዋዮ ለደቂቁ ኢይክል አዕብዮቶ ለወልዳ ለእንተ ያፈቅር ወተዐውሮቶ ለወልዳ ለእንተ ይጸልእ።

Deut 21:16 ወይሁቦ ምክዕቢተ እምነ ኩሉ ዘተረክበ ሎቱ እስመ ውእቱ ቀዳሜ ውሉዱ ወሎቱ ይፊሲ ዘበኩሩ።

Deut 21:17 ወለእመቦ ዘቦቱ ወልደ ከሐደ ወዝሁረ ወኢይትኤዘዝ ለቃለ አቡሁ ወለቃለ እሙ ወይጌሥጽዎ ወኢይሰምዎም ወይወስድዎ ኀበ ሊቃናት ሀገሩ ወውስተ አንቀጸ ብሔር።

Deut 21:18 ወይብልዎሙ ለሰብአ ሀገሮሙ ዝንቱ ወልድነ ይክሕድነ ወያዐቢ ርእሶ ወኢይሰምዕ ቃለነ ወይሰግር ወይሰክር።

Deut 21:19 ወይወግርዎ ብእብን ሰብአ ሀገሩ ወይቅትልዎ ወታሴስል እኩየ እምኔክሙ ወኩሉ እስራኤል ሰሚዎ ይፍራህ።

Deut 21:20 ወለእመቦ ዘአበሶ ወበጽሐ ጌጋዩ ከመ ይትኩነን ሞተ ትሰቅልዎ ዲበ ዕፅ ወቅትልዎ።

Deut 21:21 ወኢይቢት ሥጋሁ ዲበ ዕፅ አላ ቀቢረ ቅብርዎ በይእቲ ዕለት እስመ ርጉም ውእቱ በኀበ እግዚአብሔር ዘስቁል ዲበ ዕፅ ወኢታርኩስዎ ለምድር እንተ ይሁበከ እግዚአብሔር አምላክከ መክፈልተከ።

## Chapter 22

Deut 22:01 ወለእመ ርኢከ ላህመ ቢጽከ አው በግዎ ኀበ ተገድፈ በፍኖት ኢትትዐወር አስጥ ሎቱ ለካልእከ ወአወፊዮ።

Deut 22:02 ወለእመኒ ኢኮነ ቅሩብ ኀቤከ ካልእከ ወለእመኒ ኢታአምሮ ተስተጋብአ ወታአቱ ቤተከ ወይነብር ኀቤከ እስከ አመ የኀሥሥ ካልእከ ወታግብእ ሎቱ።

Deut 22:03 እመኒ አድጉ ወእመኒ ላህሙ ከመዝ ትገብር ወእመኒ ልብሱ ከማሁ ትገብር በእንተ ኩሉ ዘገደፈ ካልእከ ወዘተገድፈ እምኀቤሁ ወረከብካሁ ኢትክል ታዐውሮቶ።

Deut 22:04 ወለእመኒ ርኢከ አድገ ቢጽከ አው ላህሙ እንዘ ውዱቅ ውስተ ፍኖት ኢትትዐወሮሙ ታነሥእ ወታስተለዕል ምስሌሁ።

Deut 22:05 ወኢት(ት)ረሰይ ብእሲተ ብእሲ ወኢይልበሰ ብእሲ ልብሰ(ተ) ብእሲት እስመ ርኩስ በኀበ እግዚአብሔር አምላክከ ኩሉ ዘገብሮ ለዝንቱ።

Deut 22:06 ለእመ ረከብከ እጃለ ያፍ ቅድመ ገጽከ በውስተ ፍኖት ወእመኒ በውስተ ኩሉ ዕፀው አው በውስተ ምድር እመኒ አፍርኀት ወእመኒ አንቆቆኖ ኢትነሣእ እመ ምስለ እጉሊሃ።

Deut 22:07 ታሠርር ወታግዕዝ እመ ወአፍርኀቲሃስ ትነሥእ ለከ ከመ ትኩን ሠናይት ላዕሌከ ወይብዝኀ መዋዕሊከ።

Deut 22:08 ወለእመ ነደቀ ቤተ ሐዲስ ትገብር ተድባበ ለነሕስከ ወኢትግበር ቀትላ በውስተ ቤትከ ከመ ኢይደቅ እመቦ ዘይወድቅ እምኔሁ።

Deut 22:09 ወኢትትክል እምውስተ ኩሉ ሕብር ዐጸደ ወይንከ ከመ ኢይትቀደስ ፍሬሁ ወዘርአከኒ ዘተዘርእ ምስለ ፍሬ ወይንከ ወይንከ።

Deut 22:10 ወኢትሕርስ በአድግ ወበላህም ኅቡረ ወኢትልበስ ልብስ ዘተኣንመ በፀምር ወበዐጌ።

Deut 22:11 ወትገብር ለከ ዘፈረ ፍቱላ ውስተ አርበዕቲሆሙ መኣዝነ አልባሲከ ዘትለብስ።

Deut 22:12 ወለእመ ጸልኦ ለብእሲት ዘአውሰባ እምድኅረ ነበረ ምስሌሃ ወእምጸኦ ላቲ ነገረ ምክንያት ወአውፅኦ ላቲ ስመ እኩየ ወይቤ ነሣእኩዋ ለዛቲ ብእሲት ወሶበ ቦእኩ ላዕሌሃ ኢረከብኩ ድንግልናሃ ወይነሥኡ አቡሃ ወእማ መንፀፈ ድንግልናሃ ለወለቶሙ ወይወስዱ ኅበ ሊቃናት ኅበ አንቀጽ።

Deut 22:13 ወይበሎሙ አቡሃ ለይእቲ ወለት ለሊቃት ዛቲ ወለትየ ወሀብኩዎ ለዝንቱ ብእሲ ትኩኖ ብእሲተ ወሶበ ጸልኦ ይእዜ አምጽኦ ላቲ ነገረ ምክንያት ወይቤ ኢረከብኩ ድንግልናሃ ለወለትከ።

Deut 22:14 ወናሁ ዝንቱ ውእቱ መንፀፈ ድንግልናሃ ለወለትየ፡፡ ወይሰፍሕዎ ለውእቱ መንፀፍ ቅድመ ሊቃናት ዘይእቲ ሀገር።

Deut 22:15 ወይእኅዝዎ ለውእቱ ብእሲ ሊቃናተ ይእቲ ሀገር ወይጌሥጽዎ ወይነሥእዎ ምእተ ሰቅለ ወይሁብዎ ለአቡሃ ለይእቲ ወለት።

Deut 22:16 እስመ አውፅኦ ስመ እኩየ ላዕለ ድንግለ እስራኤል ወትከውኖ ሎቱ ብእሲቱ ወኢይከውኖ ኅዲጎታ መጠነ ሕያው ውእቱ።

Deut 22:17 ወለእመቦ እሙነ ኮነ ዝንቱ ነገር ወኢተረከበ ድንግልናሃ ለይእቲ ወለት ወያመጽእዎ ለይእቲ ወለት ኅበ ኖኅተ ቤተ አቡሃ ወይወግርዋ በእብን ሰብኦ ይእቲ ሀገር ወይቅትልዋ።

Deut 22:18 እስመ ገብረት እበደ በውስተ ደቂቀ እስራኤል ወአዘመወት ቤተ አቡሃ አፀእለት ወታሴስሉ እኩየ እምውስት ክሙ።

Deut 22:19 ወለእመቦ ዘረከበ ብእሲ እንዘ ይሰክብ ምስላ ብእሲተ ብእሲ ቅትልዎሙ ክልኤሆሙ ለውእቱኒ ብእሲ ዘሰከበ ምስሌሃ ለይእቲ ብእሲት ወለይእቲኒ ብእሲት ወታሴስሉ እኩየ እምውስተ እስራኤል።

Deut 22:20 ወለእመቦ ወለተ ደንግለ እንተ ፍኅርት ይእቲ ለብእሲ ወረከበ ካልእ ብእሲ በውስተ ሀገር ወሰከበ ምስሌሃ ለክልኤሆሙ አውፅእዎሙ ኅበ አንቀጸ ለይእቲ ሀገር ወይግርዎሙ በእብን።

Deut 22:21 ወይቅትልዎሙ ለወለትኒ እስመ ኢጸርኅት በውስተ ሀገር ወለውእቱኒ ብእሲ እስመ አኅሰራ ለብእሲት ካልኡ ወአሰስሉ እኩየ እምውስቱትክሙ።

Deut 22:22 ወለእመሰ በገዳም ረከበ ብእሲ ለወለት እንተ ፍኅርት ይእቲ ወተኅየለ ወሰከበ ምስሌሃ ቅትልዎ ለዝክቱ ዘሰከበ ምስሌሃ ለባሕቲቱ።

Deut 22:23 ወለወለትሰ አልቦ ዘተረሰይዎ እስመ አልባቲ ጌጋየ በዘ ትመውት ይእቲ ወለት ከመ ሶበ ይትነሣእ ብእሲ ላዕለ ካልኡ ወይቀትሎ ነፍሶ ከማሁ ውእቱ ዝንቱ ነገር።

Deut 22:24 እስመ በገዳም ረከበ ወጸርኅት ይእቲ ወለት እንተ ፍኅርት ይእቲ ወአልቦ ዘረድኡ።

Deut 22:25 ወለእመቦ ዘረከበ ወለተ ድንግለ እንተ ኢኮነት ፍኅርት ወተኅየለ ወሰከበ ምስሌሃ ወረከብዎ ይሁቦ ለአቡሃ ውእቱ ብእሲ ዘሰከበ ምስሌሃ ለይእቲ ወለት ኅምሳ ዲድረክሙ ብሩረ ወትከውኖ ሎቱ ብእሲቶ ወኢይከውኖ ይኅድጋ መጠነ ሕያው ውእቱ እስመ አኅሰራ።

Deut 22:26 ወኢይንሣእ ብእሲ ብእሲተ [ወ]አቡሁ ወኢይክሥት ኅፍረተ አቡሁ።

## Chapter 23

Deut 23:01 ወኢይባእ ዘቦቱ ነውረ ወዘምቱረ ውስተ ቤተ እግዚአብሔር ከመ ኢያዘሙ ቤተ እግዚአብሔር፡፡

Deut 23:02 ወኢያበእ ዐማናዊ ወሞአባዊ ውስተ ቤተ እግዚአብሔር እስከ ሣልስት ወራብዕት ትወልድ ወእስከ ዓሥርት ኢያበእ ቤተ እግዚአብሔር ወእስከ ለዓለም።

Deut 23:03 እስመ ኢተቀበሉክሙ በእክል ወበማይ ውስተ ፍኖት አመ ወፃእክሙ እምነ ግብጽ ወእስመ ለበላዓም ወልደ ቤዖር ከመ ይርግምክሙ።

Deut 23:04 ወኢፈቀደ እግዚአብሔር ከመ ይስምዖ ለበላዓም ወሚጦ እግዚአብሔር ለመርገሙ ውስተ በረከት እስመ አፍቀረክ እግዚአብሔር አምላክክ።

Deut 23:05 ወኢትትናገሮሙ ሰላመ ወበዘይደልዎሙ በኩሉ መዋዕሊክ ወለዓለም።

Deut 23:06 ወኢታሥቆርሮ ለኢዱሜያዊ እስመ እኑከ ውእቱ ወኢታሥቆርሮ ለግብጻዊ እስመ ፈላሲ ኮንከ በውስተ ምድሮሙ።

Deut 23:07 ወደቂቅ ለእመ ተወልዶ ሎሙ በሣልስት ትውልድ ይበውእ ቤተ እግዚአብሔር።

Deut 23:08 ወለእመ ወፀኣከ ትፅብኦሙ ለፀርከ ተዓቀብ እምነ ኩሉ ቃል እኩይ።

Deut 23:09 ወለእመቦ እምውስቱትክሙ ብእሲ ዘኢኮነ ንጹሐ ሥእበቱ ዘሌሊት ለይፃእ አፍኦ እምነ ትዕይንት ወእይባእ ውስተ ትዕይንት።

Deut 23:10 ወፍና ሰርክ ተጎዲቦ በማይ ሥጋሁ ይባውእ ዐረቦ ፀሐይ ውስተ ትዕይንት።

Deut 23:11 ወአሐደ መካነ ረሲ ለከ አፍአ እምነ ትዕይንት ኅበ ትወፅእ ህየ አፍአ።

Deut 23:12 ወዕፀ ንሣእ ለከ ውስተ ቅናትከ ወሶበ ነበርከ ቅስፈ ትካሪ ወትነሥእ ወትደፍን ወኅፍረተከ።

Deut 23:13 እስመ እግዚአብሔር አምላክከ የንሶሱ ውስተ ትዕይንትከ ከመ ያድኅንከ ወያግብአሙ ለፀርከ ውስተ እደዊከ በቅድመ ገጽከ ወትኩን ቅድስተ ትዕይንትከ ከመ ኢያስተርኢ ውስቴትከ ዘኮነ ኅፍረተ ወይትመየጥ እምኔከ ወይኅድገ።

Deut 23:14 ወኢታግብአ ለገብር ኅበ እግዚአኡ እምድኅረ ተሠይጦ ኅቤከ ይንበር ምስሌከ ኅበ አደሞ ወኢትሣቂዮ።

Deut 23:15 ወኢትኩን እምውስቴትክሙ ዘማ እምነ አዋልደ እስራኤል ወአልቦ ዘያገብእ ግብረ እምውስተ አዋልደ እስራኤል።

Deut 23:16 ወአልቦ ዘያገብእ ጸባሕተ እምውስተ ደቂቀ እስራኤል፡፡ ኢታብእ ደነሰ ዘማ ወኢቤዛ ከልብ ውስተ ቤተ እግዚአብሔር አምላክከ በበይነ ኩሉ ብፅዓት።

Deut 23:17 እስመ ርኩሳን እሙንቱ በኅበ እግዚአብሔር አምላክከ ክልኤሆሙ።

Deut 23:18 ወኢትትረደይ እምኅበ ቢጽከ ኢርዴ ወርቅ ወኢርዴ እክል ወኢርዴ ኩሉ ዘኮነ ትካዙ ዘተለቀሐከ እምኅበ ነኪሮ ትትረደይ ወእምኅበሰ ቢጽከ።

Deut 23:19 ኢትትረደይ ከመ ይባርከ እግዚአብሔር አምላክከ ለዕለ ምድር በኩሉ ግብርከ እንተ ውስቴታ ትባውእ ህየ ከመ ትትዋረሳ።

Deut 23:20 ወለእመ በፃዕከ ብፅዓተ ለእግዚአብሔር ኢትጐንዲ ገቢሮቶ እስመ ተኅሥሦ ይትኅሠሠከ እግዚአብሔር አምላክከ እምኔከ ወይከውን ኅጢአተ ላዕሌከ።

Deut 23:21 ወለእመሰ ኢፈቀድከ ትብፃዕ አልብከ ኅጢአተ ዳእሙ እምድኅረ ወፅእ እምነ ከፍፍሪከ ተዓቀብ ወግበር በከመ በፃዕከ ተሀብ ለእግዚአብሔር ዘከመ ነበብከ በአፉከ ከማሁ ግበር።

Deut 23:22 ወለእመ ቦእከ ውስተ ገራህተ ካልእከ ትምሐው ሠዊተ በእደዊከ ወማዕዕደ ኢታበውእ ውስተ ገራህተ ካልእከ።

Deut 23:23 ወለእመ ቦእከ ውስተ ዐጸደ ወይኑ ለካልእከ በላዕ አስካሌ እስከ ትጸግብ ነፍስከ ወውስተ ሞዳይ ባሕቱ ኢትወዲ።

Chapter 24

Deut 24:01 ወለእመሶ ዘነሥኡ ብእሲተ ወነበረ ምስሌሃ ወእምዝ ለእመ ኢረከበት ሞገሰ በኅቤሁ እስመ ረከበ ዘኮነ ኅፍረተ ላዕሌሃ ይጽሐፍ ላቲ መጽሐፈ ኅደጋቲሃ ወይመጥዋ ውስተ እደዊሃ ወያወፅኦ እምነ ቤቱ።

Deut 24:02 ወሐረት ወአውሰበት ካልኦ ሩብእሴ ወእምዝ ጸልኦ ውእቱኒ ብእሲ ደጋሪ ወጸሐፈ ላቲ መጽሐፈ ኅደጋቲሃ ወመጠዋ ውስተ እደዊሃ ወያወፅኦ እምነ ቤቱ፡፡ ወለእመኒ ሞተ ውእቱ ብእሲ ደጋሪ ዘነሥኦ ሎቱ ትኩኖ ብእሲተ።

Deut 24:03 ኢይከውን ለዝክቱ ብእሲ ቀዳማዊ ዘአውፅኦ ከመ ይግባእ ላዕሌሃ ወይነሥኦ ሎቱ ትኩኖ ብእሲተ እምድኅረ ርኩስት እስመ ርኩስ ውእቱ ዝንቱ በኅበ እግዚአብሔር አምላክከ።

Deut 24:04 ወኢታርኩሱ ምድረ እንተ ይሁበክሙ እግዚአብሔር አምላክክሙ መክፈልተክሙ።

Deut 24:05 ወለእመሶ ዘነሥኡ ብእሲተ ግብተ ኢይውፅእ ፀብኦ ወአልቦ ምንተኒ ዘያቀትውዎ ድኑን ውእቱ ቤቱ ኣሐተ ዓመተ ከመ ይትፈሣሕ ምስላ ብእሲቱ እንተ አውሰበ።

Deut 24:06 ወኢትትኣኃዝ መሕረጸ ወኢመድሄ መሕረጸ እስመ መብዕለ ነፍስ ውእቱ ወኢይትኣኃዝዎ።

Deut 24:07 ወለእመሶ ዘተረክበ ብእሲ ዘሰረቀ ነፍስ እምውስተ ኣኅዊሁ እምነ ደቂቀ እስራኤል ወተኣገሎ ወሄጦ ለይቅትልዎ ለውእቱ ሰራቂ ወታሴስሎ እኩየ እምውስቱትክሙ።

Deut 24:08 ወዑቅ ርእስከ በእንተ ትእምርተ ለምጽ ተዓቀቦ ጥቀ ከመ ትግበር ኩሎ ሕገ ዘይቤሉክሙ ካህናት ወሌዋዊያን በከመ አዘዝኩክሙ ተዓቀቡ ዘትገብሩ።

Deut 24:09 ወተዘከር ኩሎ ዘገብረ እግዚአብሔር አምላክከ ላዕለ ማርያ በፍኖት ወፂኦክሙ እምነ ግብጽ።

Deut 24:10 ወለእመሶ ዘይፈድየከ ካልእከ ዕዳ ዘኮነ ኢትበውእ ውስተ ቤቱ ከመ ትትኣኃዝ ኣኅዘከ ኣፍኦ ትቀውም።

Deut 24:11 ውብእሴ ዕዳከ ዝክቱ ዘይፈድየከ ለሊሁ ያወፅእ ኣኅዘከ ኣፍኦ ኅቤከ።

Deut 24:12 ወለእመ ብእሲ ነዳይ ውእቱ ኢታበይት ኣኅዛ ኅቤከ።

Deut 24:13 ታገብእ ሎቱ ኣኅዞ ዐረቦ ፀሐይ ወይበ(ይ)ቱ በልብሱ ወትትባረክ ወይከውነከ መጽዋተ ቅድመ እግዚአብሔር አምላክከ።

Deut 24:14 ወኢትዐመዎ ዐስቦ ለዐሳብከ ለነዳይ ዘኅጡእ ውእቱ እምውስተ እደዊከ ኣው እምውስተ ግድራን እለ ውስተ ሀገርከ።

Deut 24:15 እንተ ጸበሐት ተሁቦ ዐስቦ ወኢታዐርብ ፀሐየ ላዕሌሁ እስመ ነዳይ ውእቱ ወውእቱ ተስፋሁ ወኢይግዕር ላዕሌከ ኀብ እግዚአብሔር ወኢይኩንከ ኀጢአተ።

Deut 24:16 ወኢይመውቱ፥ ወለነዳያን በበይነ ውሉዶሙ ወኢይመውቱ ውሉዶሙ በበይነ ወላዲያኒሆሙ አሐዱ አሐዱ በጌጋዩ ይመውት።

Deut 24:17 ወኢትሚጥ ፍትሐ ግዩር ወዘእጃለ ማውታ ወዘእቤር።

Deut 24:18 ወተዘከር ከመ ገብር አንተ በምድረ ግብጽ ወቤዘመክ እግዚአብሔር አምላክክ እምህየ ወበበይነ ዝንቱ እኤዝዘክ አነ ትግበር ዘንተ ነገረ።

Deut 24:19 ወለእመ አኬድክ እክለ ገራህትከ ወረሳዕክ አሐተ ክልስስተ ውስተ ገራህትከ ኢትግባእ ከመ ትንሣእ ለግዩር ወለእጃለ ማውታ ወለእቤር ይኩን ከመ ይባርክ እግዚአብሔር አምላክክ በኩሉ ተግባረ እደዊከ።

Deut 24:20 ወለእመኒ ቀሠምከ ዐጸደ ወይንከ ኢትድግም ተመየጠ ድኅሬከ ከመ

Deut 24:21 ታስተናጽሕ ቀሢመ ለግዩር ወለእጃለ ማውታ ይኩን ወለእቤር

Deut 24:22 ወተዘከር ከመ ግዩር አንተ በምድረ ግብጽ

Deut 24:23 በበይነ ዝንቱ እኤዝዘክ አነ ትግበር ዘንተ ነገረ።

## Chapter 25

Deut 25:01 ወለእመ ኮነ ተስናን ማእከለ ሰብእ ወመጽኡ ውስተ ዐውድ ወተሰነኑ ወአርትዑ ለዘ ይረትዕ ወአእስው ለዘ ይፀውግ።

Deut 25:02 ወለእመ ኮነ ለተቀሥፎ ወያነብርዎ ቅድመ ዐውድ ለዝክቱ ዘይፀውግ ወይቀሥፍዎ በቅድሚሆሙ በአምጣነ አበሳሁ።

Deut 25:03 አርብዓ ይቀሥፍዎ በኖልቁ ወኢያበዝኑ እምኔሁ ወለእመ አብዝኑ ቀሢፎቶ እምዝንቱ አስተሐፈርከ እኋከ በቅድሚከ።

Deut 25:04 ወኢትፈጽም አፉሁ ለለህመኒ ዘያከይድ።

Deut 25:05 ወለእመቦ አኀው እለ ይነብሩ ኀቡረ ብእሲ ምስለ እኀሁ ወሞተ አሐዱ እምኔሆሙ ወአልቦ ውሉደ ኢታወስብ ብእሲቱ ነኪረ ብእሴ ዘኢኮነ ቅሩቡ እኀሁ ለምታ ያወስባ ወውእቱ ለይባእ ኀቤሃ ወሎቱ ትኩኖ ብእሲቶ ወይንብር ምስሌሃ።

Deut 25:06 ወሕፃን ዘተወልደ ይኩን ለዘ ሞት ወይሰመይ በስሙ ወኢይደመሰስ ስሙ እምነ እስራኤል።

Deut 25:07 ወለእመ ኢፈቀደ ውእቱ ብእሲ ያውስባ ለብእሲተ እኅሁ ወተዐርግ ይእቲ ብእሲት ኅበ ሊቃናት ውኅበ አንቀጽ ወትብል ኢይፈቅድ እኅሁ ለምትየ ያቅም ስመ እኅሁ በውስተ እስራኤል።

Deut 25:08 ወይጸውዕዎ ሊቃናት ሀገሩ ወይብልዎ ኢትፈቅድኑ ታቅም ዘርአ ለእኅከ ውስተ እስራኤል ወይብል ቀዊሞ ኢእፈቅድ አውስበ።

Deut 25:09 ወተመጽእ ይእቲ ብእሲት ቅድመ እግዚአብሔር ወቅድመ ሊቃናተ ይእቲ ሀገር ወትፈትሕ ሠእኖ ዘአሐቲ እግሩ ወትትፍእ ውስተ ገጹ ወትብል ከመዝ ይግበርዎ ለብእሲ ዘኢይሕንጽ ቤተ እኅሁ።

Deut 25:10 ወይሰመይ ስሙ በውስተ እስራኤል ቤተ ፍቱሐ ሠእን።

Deut 25:11 ወለእመ ተበአሱ ክልኤቱ ዕደወ ኅቡረ ብእሲ ምስለ ካልኡ ወመጽአት ብእሲቱ ለአሐዱ እምኔሆሙ ከመ ታኅድኅ ለምታ እምእደ ዘባጢሁ ወአለዓለት እዴሃ ወአኅዘቶ በክልኤሆን አሰክቲሁ ለይምትሩ እደዊሃ ወኢትምሐከ ዐይንከ።

Deut 25:12 ወኢታንብር ለከ መዳልወ ንኡስ ወዐብየ ወኢትግበር ለከ ውስተ ቤትከ ምስፍረ መስፈርት ዐቢየ ወመስፈርት ንኡስ።

Deut 25:13 ወመዳልዋኒከኒ ርቱዐ ወጸዱቀ ይኩን ከመ ታብዝኅ መዋዕለ እንተ ይሁበከ እግዚአብሔር አምክከ መክፈልተ ከ።

Deut 25:14 እስመ ርኩስ ውእቱ በኅበ እግዚአብሔር አምላክከ ኩሉ ዘይገብሮ ለዝክቱ ወኩሉ ዘይገብር ዐመፃ።

Deut 25:15 ወተዘከር ኩሉ ዘገብረ ላዕሌከ ዐማሌቅ በፍኖት አመ ወፃእከ እምነ ምድረ ግብጽ።

Deut 25:16 እፎ ተቃወመከ በፍኖት ወአምተረከ ገዐዘከ እለ ይመጽኡ በድኅሬከ።

Deut 25:17 ወአንተሰ ርኅብከ ወደከመከ ወኢፈራህካሁ ለእግዚአብሔር።

Deut 25:18 ወእመ ያዐርፈከ እግዚአብሔር አምላክከ እምነ ኩሉ ፀርከ እለ አውድከ ውስተ ምድር እንተ ይሁበከ እግዚአብሔር አምላክከ ትትወረሳ መክፈልተከ ትደመስሶ ለዐማሌቅ እምታሐተ ሰማይ ወኢትርስዖ።

## Chapter 26

Deut 26:01 ወለእመ ቦእከ ውስተ ምድር እንተ ይሁበከ እግዚአብሔር አምላክከ ትትወረሳ መክፈልተከ ወነበርከ ውስቴታ ወትነሥእ እምነ ፍሬ ምድርከ እንተ ይሁበከ እግዚአብሔር አምላክከ።

Deut 26:02 ወትወዲ ውስተ ቀርጠሎን ወተሐውር ውስተ መካን ዘኅርየ እግዚአብሔር አምላክከ ከመ ይሰመይ ስሙ በህየ።

Deut 26:03 ወትበውእ ኅበ ካህን ዘሀለወ በውእቶን መዋዕል ወትብሎ አየድዕ ዮም ለእግዚአብሔር አምላክከ እስመ በጸሐኩ ውስተ ምድር እንተ መሐለ እግዚአብሔር ለአበዊነ ከመ ይሀበነሃ።

Deut 26:04 ወይነሥኦ ካህን ለውእቱ ሞደየ ቀርጠሎ እምውስተ እደዊከ ወያነብር ውስተ ምሥዋዑ ለእግዚአብሔር አምላክከ።

Deut 26:05 ወትብል ቅድመ እግዚአብሔር አምላክከ አቡየ ወፅኦ እምነ ሶርያ ወወረደ ውስተ ግብጽ ወነበረ ህየ እንዘ ውሑዳን እሙንቱ ኖለቁሆሙ ወኮነ በህየ ሕዝበ ዐቢየ ወመልኡ ወዐቢየ በዝኑ።

Deut 26:06 ወሣቀዩን ግብጽ ወአሕመሙን ወአግበሩን ዕጹብ ግብረ።

Deut 26:07 ወጸራኅን ኅበ እግዚአብሔር አምላክ አበዊነ ወስምዐ እግዚአብሔር ቃለነ ወርእየ ሕማመነ ወሥራሕነ ወሠቃየነ ርእየ እግዚአብሔር።

Deut 26:08 ወአውፅኦን እግዚአብሔር ለሊሁ እምነ ምድረ ግብጽ በእድ ጽንዕት ወበመዝራዕት ልዑል ወበዐቢይ ግርማ ወበዐቢይ ተአምር ወበመድምም።

Deut 26:09 ወአበኦን ውስተ ዝንቱ መካን ወወሀበናሃ ለዛቲ ምድር ምድር እንተ ትውሕዝ ሐሊበ ወመዓረ።

Deut 26:10 ወይእዜኒ ናሁ አምጽኦኩ ቀዳሜ እክለ ምድርየ እንተ ወሀበኒ እግዚአብሔር ምድረ እንተ ትውሕዝ ሐሊበ ወመዓረ ወትሰግድ ቅድመ እግዚአብሔር አምላክከ።

Deut 26:11 ወትትፈሣሕ በኩሉ በረከት ዘወሀበከ እግዚአብሔር አምላክከ አንተ ወቤትከ ወሌዋዊኒ ወግደርኒ ዘኅቤከ።

Deut 26:12 ወእምከመ ፈጸምከ ዐሥሮተ ኩሉ ዓሥራት ዘእክለ ምድርከ በሣልስ ዓም እምዝ ዘእመ ዳግመ ተዔሥር ትሁቦ ለሌዋዊ ወለግደር ወለእጓለ ማውታ ወለእቤር ወይብልዕዎ በሀገርከ ወይጽግቡ።

Deut 26:13 ወትብል በቅድመ እግዚአብሔር አምላክከ አንጸሕኩ ዘይቄድስ ለከ እምነ ቤትየ ወወሀብኩዎ ለሌዋዊ ወለግደር ወለእጳለ ማውታ ወለእቤር በከመ ኩሉ ትእዛዝከ ዘአዘዘኒኒ ኢተዐደውኩ ትእዛዝከ ወኢረሳዕኩ።

Deut 26:14 ወበሕማምየኒ ኢበላዕኩ እምኔሁ ወኢሥዕኩ እምውስቴቱ ለርኩስ ወኢወደይኩ ውስተ በድን እምኔሁ ሰማዕኩ ቃለ እግዚአብሔር አምላኪየ ሰማዕኩ ዘአዘዘኒ።

Deut 26:15 ወነጽር እምነ ቤተ መቅደስከ እምነ ሰማይ ወባርከ ሕዝበከ እስራኤል ወምድረኒ እንተ ወሀብካሆሙ እንተ መሐልከ ለአበዊነ ከመ ተሀበነ ምድረ እንተ ትውሕዝ ሐሊበ ወመዓረ።

Deut 26:16 በዛቲ ዕለት እግዚአብሔር አምላክክ አዘዘክ ከመ ትግበር ኩሎ ዘንተ ኩነኔ ወተዕቀብ ፍትሖ ወትግበሮ በኩሉ ልብክ ወበኩሉ ነፍስክ ታምልኮ ለእግዚአብሔር አምላክክ ወትሖር በፍናዊሁ ወትዕቀብ ፍትሖ ወኩነኔሁ ወትስማዕ ቃሎ።

Deut 26:17 እስመ እግዚአብሔር ኅርየክ ዮም ትኩኖ ሕዝቦ ለርእሱ በከመ ይቤ ከመ ትዕቀብ ኩሎ ትእዛዞ ወትኩን መልዕልተ ኩሉ አሕዛብ።

Deut 26:18 ወገበረ ለከ ስመ ዐቢየ ወምክሐ ወክብረ ከመ ትኩን ሕዝቦ ቅዱስ ለእግዚአብሔር አምላክክ በከመ ይቤ።

## Chapter 27

Deut 27:01 ወአዘዘሙ ሙሴ ለአእሩገ እስራኤል ወይቤሎሙ ዑቁ ከመ ትግበሩ ኩሉ ዘንተ ትእዛዘ ኩሎ ዘአነ እኤዝዘክ ዮም።

Deut 27:02 ወአመ ትዐድውዎ ለዮርዳንስ ውስተ ምድር እንተ ይሁበክሙ እግዚአብሔር አምላክክሙ ወታቀውም ለከ እብነ ዐቢይተ ወትመርጎ መሬተ ጸዕደ።

Deut 27:03 ወትጽሕፍ ውስተ ውእቶን እበን ኩሎ ነገሮ ለዝንቱ ሕግ ዐዲወክሙ ዮርዳንስ ሶበ በእክሙ ውስተ ይእቲ ምድር እንተ ይሁበክሙ እግዚአብሔር አምላኮሙ ለአበዊነ ከመ የሀብክ ምድረ እንተ ትውሕዝ ሐሊበ ወመዓረ በከመ ይቤለክ እግዚአብሔር አምላኮሙ ለአበዊክ።

Deut 27:04 ወሶበ ዐደውክሙ ዮርዳንስ ታቀውምዎን ለውእቶን እበን እለ አነ እኤዝዘክሙ ዮም በእንቲአሆን ውስተ ደብረ ጌባል ወትመርግዎን መሬተ ጸዕዳ።

Deut 27:05 ወትነድቅ በህየ ምሥዋዐ ለእግዚአብሔር አምላክክ በእበን ወኢይግስሶን ኀጺን በእበን እለ ኢኮና ውቁራተ ቦንቱ ወትነድቅ ምሥዋዐ ለእግዚአብሔር አምላክክ።

Deut 27:06 ወትሠውዕ ላዕሌሆን መሥዋዕተ መድኅኒት ወብላዕ ወጽገብ በህየ ወተፈሣሕ በቅድመ እግዚአብሔር አምላክክ።

Deut 27:07 ወጸሐፍ ውስተ ውእቶን እበን ኩሎ ዘንተ ሕገ ጥዩቀ ጥቀ።

Deut 27:08 ወይቤልዎሙ ሙሴ ወካህናት ለሌዋዊያን ወለኩሉ እስራኤል አርምም ወስማዕ እስራኤል በዛቲ ዕለት ኮንክ ሕዝቦ ለእግዚአብሔር አምላክክ ወስማዕ ቃለ እግዚአብሔር አምላክክ ወግበር ኩሎ ትእዛዞ ወኩነኔሁ ዘአነ እኤዝዘክ ዮም።

Deut 27:09 ወአዘዙሙ ሙሴ ለሕዝብ በይጻቲ (ዕለት) ወይቤሎሙ እ(ሉ) እሙንቱ እለ ይቀውሙ ወይባርክዎ ለሕዝብ በደብረ ጋሪዝ(ን) ዐዲወክሙ ዮርዳንስ ስምዖን ወሌዊ ወይሁዳ ወይሰኮር ወዮሴፍ ወብንያም።

Deut 27:10 ወእሉ እሙንቱ እለ ይቀውሙ ለረጊም በደብረ ጊባል ሮቤል ወጋድ ወአሴር ወዛቡሎን ወዳን ወንፍታሌም።

Deut 27:11 ወያወሥኡ ለሊሆሙ ሌዋዊያን ወይብልዎሙ ለኩሉ እስራኤል በቃለ (ዐ)ቢይ።

Deut 27:12 ርጉም ለይኩን ብእሲ ዘይገብር ግልፎ ወስብኮ ዘርኩስ በኅበ እግዚአብሔር ግብረ ኬንያ ወይሠይም ወይኅብእ ወያወሥኡ ኩሉ ሕዝብ ወይብል አሜን አሜን።

Deut 27:13 ርጉም ለይኩን ዘየስተአኪ አቡሁ ወእሙ ወይብል ኩሉ ሕዝብ አሜን ወአሜን።

Deut 27:14 ርጉም ለይኩን ዘይሰርቅ ደወለ ቢጹ ወይብል ኩሉ ሕዝብ አሜን ወአሜን፡፡

Deut 27:15 ርጉም ለይኩን ዘያስሕቶ ፍኖተ ለዕውር ወይብል ኩሉ ሕዝብ አሜን ወአሜን።

Deut 27:16 ርጉም ለይኩን ዘይገምፅ ፍትሐ ግዩር ወዘእረሳ ማውታ ወዘእቤር ወይብል ኩሉ ሕዝብ አሜን ወአሜን።

Deut 27:17 ርጉም ለይኩን ዘይሰክብ ምስለ ብእሲተ አቡሁ እስመ ከሠተ ኅፍረተ አቡሁ ወይብል ኩሉ ሕዝብ አሜን ወአሜን።

Deut 27:18 ርጉም ለይኩን ዘይሰክብ ምስለ ኩሉ እንስሳ ወይብል ኩሉ ሕዝብ አሜን ወአሜን።

Deut 27:19 ርጉም ለይኩን ዘይሰክብ ምስለ እኅቱ እመኒ እንተ እምአቡሁ ወእመኒ እንተ እምእሙ ወለይበል ኩሉ ሕዝብ አሜን ወአሜን።

Deut 27:20 vacat

Deut 27:21 ርጉም ለይኩን ዘይዘብጥ ካልኦ በጉሕሉት ወይብል ኩሉ ሕዝብ አሜን ወአሜን።

Deut 27:22 [ወ]ርጉም ለይኩን ዘይነሥእ ሕልያነ ከመ ይቅትል ነፍሰ ደመ ንጹሐ ወይብል ኩሉ ሕዝብ አሜን ወአሜን።

Deut 27:23 ርጉም ለይኩን ኩሉ ብእሲ ዘኢይቀውም ይግበር ቃለ ዘውስተ ዝንቱ ሕግ ወይብል ኩሉ ሕዝብ አሜን ወአሜን።

Deut 28:01 ወለእመ ሰሚዐ ሰማዕክሙ ቃላ እግዚአብሔር አምላክክሙ (ወ)ዐቀብክሙ ከመ ትግበሩ ኩሎ ትእዛዘ ዘኣነ እኤዝዘክሙ ዮም ወይሬሲየክ እግዚአብሔር መልዕልተ ኩሎ አሕዛብ ምድር።

Deut 28:02 ወይበጽሐክ ኩሎ ዝንቱ በረከት ወይረክብክ ለእመ ሰማዕክ ቃላ እግዚአብሔር አምላክክ።

Deut 28:03 ቡሩክ ትከውን በሐቅል ወቡሩክ ትከውን በሀገር።

Deut 28:04 ቡሩክ ይከውን ፍሬ ከርሥክ ወቡሩክ ይከውን እክለ ምድርክ ወአዕጻደ ላህምክ ወመራዕየ አባግዒክ ቡሩክ።

Deut 28:05 መዛግብቲክ ወትራፋቲክ።

Deut 28:06 ቡሩክ ትከውን በበአትክ ቡሩክ ትከውን በፀአትክ።

Deut 28:07 ወያገብአሙ እግዚአብሔር አምላክክ ለፀርክ ከመ ይትቀጥቀጡ በታሕተ እገሪክ በአሐቲ ፍኖት ይወፅኡ ይትቀበሉክ ወ(በ)ሰብዑ ፍናዌ ይነትዑ እምቅድመ ገጽክ።

Deut 28:08 ወይፌኑ እግዚአብሔር በረከቶ ውስተ አብያቲክ ወውስተ ኩሎ ዘወደይክ እዴክ በውስተ ምድር እንተ ወሀበክ እግዚአብሔር አምላክክ

Deut 28:09 ወያቀውመክ እግዚአብሔር ሎቱ ሕዝበ ቅዱሰ በከመ መሐለ እግዚአብሔር ለአበዊክ ለእመ ሰማዕክ ቃላ እግዚአብሔር አምላክክ ወሐርክ በፍናዊሁ።

Deut 28:10 ወይሬ(ኢ)የክ ኩሎ አሕዛብ ምድር ከመ ትስምየ ስሙ ለእግዚአብሔር ላዕሌክ ወይፈርሁክ።

Deut 28:11 ወያስተበዝኅክ እግዚአብሔር አምላክክ ውስተ ሠናይት በውሉደ ከርሥክ ወበእክለ ምድርክ።

Deut 28:12 ወያስተዋልዶ ለእንስሳክ በውስተ ምድር እንተ መሐለ እግዚአብሔር ለአበዊክ ከመ የሀብክ ከ ከመ መዋዕለ ሰማይ ዲበ ምድር።

Deut 28:13 ወይፈትሕ ለ(ከ) እግዚአብሔር መዝገበ ቡሩክ ሰማይ ከመ የሀብክ ዝናመ በመዋዕሊሁ ለምድርክ ከመ ይባርክ ለክ ኩሎ ተግበረ እደዊክ ወትሌቅሕ አንተ ለብዙኅ አሕዛብ ወአንተሰ ኢትትሌቃሕ ወትኳንን እንተ ለብዙኅ አሕዛብ ወለከሰ ኢይኳንኑክ።

Deut 28:14 ወይሠይመክ እግዚአብሔር ውስተ ርእስ ወአኮ ውስተ ዘነብ ወትከውን መላዕልተ ወኢትከውን መትሕተ ለእመ ሰማዕክሙ ቃላ እግዚአብሔር አምላክክሙ ወትእዛዘ ኩሎ ዘኣነ እኤዝዘክሙ ከመ ትዕቀቡ ወትግበሩ።

Deut 28:15 ወ(ኢ)ትትገሐሡ እምነ ኩሎ ቃል ዘኣነ እኤዝዘክሙ ዮም ኢለ የማን ወኢለ ፀጋም ከመ ትሐሩ ድኅረ አማልክተ ባዕድ ታምልኩዎሙ።

Deut 28:16 ወለእመ ኢሰማዕክሙ ቃለ እግዚአብሔር አምላክክሙ ከመ ተዕቅቡ ኩሎ ትእዛዘ ዘኣነ እኤዝዘክ ሙዮም ወይመጽእ ላዕሌክ ኩሎ ዝንቱ መርገም ወይረክብክ።

Deut 28:17 ወትከውን ርጉመ አንተ በሐቅል ወበሀገር።

Deut 28:18 ወይከውን ርጉመ መዛግብቲክ ወትራፋቲክ።

Deut 28:19 ወርጉመ ውሉዶ ከርሥክ ወእክለ ምድርክ ወአዕጸደተ አልህምቲክ ወመራዕየ አበግዲክ።

Deut 28:20 ወርጉመ አንተ በበአትክ ወበፀአትክ ርጉመ ትከውን።

Deut 28:21 ወይፌኑ ላዕሌክ እግዚአብሔር ንዴተ ወርኅበ ወብድብድ ወይጠፍእ ኩሎ ዘወደይክ እዴክ ውስቲ ቱ ወይሠርወክ እስክ ይደመስሰክ ፍጡነ በበይነ እከየ መግባሪክ እስመ ኀደገኒ።

Deut 28:22 ወያተሉ እግዚአብሔር ሞተ ላዕሌክ እስክ ያጠፍኣክ እምነ ምድር እንተ ውስቴታ ትበውእ ህየ ከመ ትትዋረሳ።

Deut 28:23 ወይቀሥፈክ እግዚአብሔር በደዌ ሲሕ ወበፈፀንት ወበአሰፈር ወበፍርህት ወበድንጋጂ ወበዐበር ወበኅጠእ ወይሰድዱክ እስክ ያጥፍኡክ።

Deut 28:24 ወትከውንክ ሰማይ በመልዕልተ ርእስክ ብርተ ወምድር በመትሕቲክ ኀጺነ።

Deut 28:25 ወይፊሲዮ እግዚአብሔር ለዝኖመ ምድርክ (ቆባረ) ወመሬት ይወርድ እምሰማይ ላዕሌክ እስክ ይቀጠቅጠክ ወእስክ ያጠፍኣክ።

Deut 28:26 ወይገብሩክ እግዚአብሔር ከመ ትትቃተል በቅድመ ፀርክ በአሕቲ ፍኖት ትወፅእ ኀቤሆሙ ወበሰብዑ ፍኖዊ ትነትዕ እምቅድመ ገጸሙ ወትከውን ዝርወ ውስተ ኩሎ መንግሥታተ ምድር

Deut 28:27 ወይከውን አብድንቲክሙ መብልዐ ለአዕዋፈ ሰማይ ወኢትረክቡ ዘይቀብረክሙ።

Deut 28:28 ወይቀሥፈክ እግዚአብሔር በመቅሠፍተ ግብጽ በዐበቅ እኩየ ውስተ ነፍስትክ ወበሕከክ ዘአልቦ ፈውሰ።

Deut 28:29 ወይቀሥ(ፈ)ክ እግዚአብሔር በድቀት ወበዕውር ወበድንጋጂ ልብ።

Deut 28:30 ወተገብእ ተርመስስ መዓልተ ከመ ይመረስስ ዕውር በውስተ ጽልመት ወኢትረክብ ፍኖተ ወትትገፋዕ ወትትበረበር በኩሎ መዋዕሊክ ወኢትረክብ ዘይረድኣክ።

Deut 28:31 ወታወስብ ብእሲተ ወየሀይደከሃ ካልእ ብእሲ ወትነድቅ ቤተ ወኢትነብር ውስቴቱ ወትተክል ወይነ ወኢትቀሠሞ።

Deut 28:32 ወይጡብኑ ላህመክ ወኢትበልዕ እምኔሁ ወየሀይዱክ አድገክ ወኢያገብኡ ለከ ወይገብእ አባግዲክ ለአግብርት ወለፀርክ ወኢትረክብ ዘይረድኡከ።

Deut 28:33 ወይገብኡ ደቂቅክ ወአዋልዲክ በካልእ ሕዝብ ወትሬኢ በአዕይንቲክ እንዘ ይኳርዕዎሙ ወአልቦ ዘትክል ገቢረ።

Deut 28:34 ወይበልዕ ሕዝብ ዘኢታአምር እክለ ምድርክ ወጸማክ ወትከውን ጽዑረ ወሥቁየ በኩሉ መዋዕል።

Deut 28:35 ወትከውን ሙኑፀ በምርአየ አዕይንቲክ ወኢትርኢ።

Deut 28:36 ወይቀሥፈክ እግዚአብሔር በደዊ እኩይ ውስተ በረኪክ ውውስተ አቀሥጺክ ወውስተ አዕማደ እገሪክ በዘ ኢትክል ሐይወ እምነ ሰኩና እገሪክ እስከ ርእስከ።

Deut 28:37 ወይወስደክ እግዚአብሔር ኪያከኒ ወመላእክትከኒ እለ ሢምክ ለከ ውስተ ሕዝብ ዐቢይ ዘኢታአምር ኢአንተ ወኢአበዊክ ወታመልክ በህየ ባፅደ አማልክተ ወዕፀወ ወእበነ።

Deut 28:38 ወትከውን በህየ ድንጉፀ ወትከውን አምሳላ ወነገረ ለኩሉ አሕዛብ እለ ውስቴቶሙ ወእለ ኀቢሆሙ ይወስደክ እግዚአብሔር ህየ።

Deut 28:39 ወታወፅእ ብዙኀ ዘርእ ውስተ ገራህትክ ወታበውእ ውሑደ እስመ አንበጣ በልዎ።

Deut 28:40 ወትትክል ዐጸደ ወይን ወትትጌበሮ ወኢትሰቲ እምነ ወይኑ ወኢትትፌሣሕ እምኔሁ እስመ ዕጼ በልዎ።

Deut 28:41 ወታጠሪ ዕፀዋተ ዘይት ውስተ ኩሎ ደወልክ ወኢትትቀበእ ቅብእ እምኔሁ እስመ ተነግፈ ፍሬሁ።

Deut 28:42 ወትወልድ ደቂቀ ወአዋልደ ወኢያተርፍዎሙ ለከ እስመ ይነሥእዎሙ ወይጌውዎሙ።

Deut 28:43 ወኩሉ እክለ ምድርክ ወኩሉ ተክለ ዕፀዋቲክ አናኳዕ ያጠፍእ ለከ።

Deut 28:44 ወፈላሲ ዘህለወ ኀቢክ የዐርግ መልዕልተ(ከ) ወላዕሌክ ወአንተሰ ትከውን መትሕቶ።

Deut 28:45 ወውእቱ ይሌቅሐክ ወአንተሰ ኢትሌቅሖ ውእቱ ይከውነክ ርእሰ ወአንተ ትከውኖ ዘነበ።

Deut 28:46 ወይመጽአ ላዕሌክ ዝንቱ ኩሎ መርገመ ወይዴግነክ ወይረክበክ እስከ ያጠፍኡክ ወእስከ ይደመስሰክ እስመ ኢሰማዕክ ቃለ እግዚአብሔር አምላክክ ከመ ትዕቀብ ትእዛዞ ወኩነኔሁ ኩሉ ዘአዘዝከ።

Deut 28:47 ወይከውን ተአምረ ለዕሌክ ወመድምመ ወላዕለ ዘርእክ እስከ ለዓለም እስመ ኢያምለካሁ ለእግዚአብሔር አምላክክ በትፍሥሕት ወበሠናይ ልብ።

Deut 28:48 ወበብዝሃ ኩሉ ወትትቀነይ ለጸለእትከ እለ ይፌኑ እግዚአብሔር ላዕሌከ በረኅብ ወበጽምእ ወበዕርቅና ወበኅጠአ ኩሉ ወይወዲ ለከ ጋገ ዘኅጺን ውስተ ክላድከ እስከ ያጠፍአከ።

Deut 28:49 ወያመጽእ እግዚአብሔር ሕዝበ እምርሑቅ ለዕሌከ እምኦጽናፈ ምድር ከመ ርደተ ንስር ሕዝብ እለ ኢትሰምዕ ነገሮሙ።

Deut 28:50 ሕዝብ ግሩመ ገጽ ዘኢያክብር ገጸ ልሂቅ ወኢይምሕር ንኡሰ።

Deut 28:51 ወያጠፍእ እጉለ መራዕይከ ወእክለ ምድርከ እስከ ኢያትርፍ ለከ ኢእክለ ወኢወይነ ወኢቅብአ ወኢኣዕጸዳተ ላህምከ ወኢመራዕየ ኣባግዒከ እስከ ያጠፍአከ።

Deut 28:52 ወይደመስሰከ እምውስተ ኩሉ ኣህጉሪከ እስከ ያወድቅ ኦረፋቲከ ዐበይተ ወኦጽዋኒከ ዘቡቱ ትትኣመን ዘውስተ (ኩሉ) በሐውርቲከ ወይሣቅየከ በውስተ ኩሉ ኣህጉሪከ ዘወሀበከ እግዚአብሔር ኣምላክከ።

Deut 28:53 ውብላዕ ውሉደ ከርሥከ ሥጋ ደቂቅከ ወኦልዲከ ዘወሀበከ በመንዳቤከ ወበሥቃይከ ዘሣቀየከ ጸለኢከ በውስተ ኣህጉሪከ።

Deut 28:54 ረኅጽከሂ ወለምለምከሂ ወትዶነጹ ዐይኑ ለእኅሁ ወለብእሲቱ እንተ ውስተ ሕፅኑ ወዘተርፈ ውሉደ ዘኣትረፉ ሎሙ።

Deut 28:55 ይሁቡዎሙ ለለ ኣሐዱ እምኔሆሙ ሥጋ ውሉዶሙ ይሴሰዩ እስመ ኢያትረፉ ሎሙ ወኢምንተ በሥቃይ ወበመንዳቤ ዘሣቀየከ ጸላእትከ በኩሉ ኣህጉሪከ።

Deut 28:56 ወእንተ ረኅጽኒ ይእቲ እምኔክሙ ወእንተሂ ድክምት ይእቲ ትሜህር እገሪሃ ሐዊረ ውስተ ምድር ወእስመ ረኅጽ ይእቲ ወድክምት ትደነጽዎ ዐይና ለምታ ዘዲበ ሕፅና ወለወልዳ ወለወለታ።

Deut 28:57 ወለሥጋሃ ዘእምውስተ ኣባለ ውእቱ ወሕፃናሂ ዘወለደት ትበልዕ ጽምሚት ሶበ ኅጥኣት ኩሎ በመንዳቤ ወበሥቃይ ዘይሣቅየከ ጸላኢከ በውስተ ኣህጉሪከ።

Deut 28:58 ለእመ ኢስማዕከ ከመ ትግበር ኩሎ ዘንተ ነገሮ ለዝንቱ ሕግ ዘጽሐፍ ውስተ ዝንቱ መጽሐፍ ከመ ትፍራህ ስሙ ክቡር ወስቡሕ ዝንቱ ዘእግዚአብሔር ኣምላክከ።

Deut 28:59 ወይገብር እግዚአብሔር ነኪረ መቅሠፍትከ ወመቅሠፍተ ዘርእከ መቅሠፍተ ዐቢየ ወ(መ)ድምም ወደዌ እኩየ ወሕማመ።

Deut 28:60 ወይገብእ ላዕሌሆሙ ኩሉ ደዌሆሙ ለግብጽ እኩይ ዝክቱ ዘኢፈራህከ እምኔሁ ወኢፈራህከ እምቅድመ ገጹሙ ወይተሉ ዲቤ።

Deut 28:61 ወኩሉ ደዌ ወኩሉ መቅሠፍት ዘኢኮነ ጽሑፈ ውስተ ዝንቱ መጽሐፈ ሕግ ያመጽእ እግዚአብሔር ላዕሌከ እስከ ያጠፍአከ ወእስከ ትደመሰሱ።

Deut 28:62 ወትትርፉ ሕዳጥ በኖልቅ እምድኅረ ከመ ከዋክብተ ሰማይ አንትሙ ብዝሃክሙ እስሙ ኢሰማዕክሙ ቃለ እግዚአብሔር አምላክክሙ።

Deut 28:63 በከመ ተፈሥሐ እግዚአብሔር ላዕሌክሙ ከመ ይግበር ሠናይተ ዲቤክሙ ወአብዝሃክሙ ከማሁ ይትፈሣሕ እግዚአብሔር ዲቤክሙ ከመ ይሄርወክሙ ወትጠፍኡ እምነ ምድር እንተ ውስቴታ ትበውኡ ህየ ከመ ትትዋረስዋ።

Deut 28:64 ወይዘርወክ እግዚአብሔር ውስተ ኩሉ አሕዛብ እምነ አጽናፈ ምድር እስከ አጽናፈ ምድር ወትትቀነይ በህየ ለባዕድ አማልክት ለዕፀው ወለእበን ለዘ ኢታአምር አንተ ወአበዊክ።

Deut 28:65 ወበህየኒ በውስተ ውእቱ አሕዛብ ኢያዐርፈክ ወኢያበውሐክ ትቁም እግርክ ወይሁበክ በህየ እግዚአብሔር ልበ ሕዙነ ወአዕይንተ ጥፉአተ ወነፍሰ መንሱተ።

Deut 28:66 ወትከውን ሕይወትክ ስቅልተ ቅድመ አዕይንቲክ ወትደነግፅ ለሊክ መዓልተ ወኢትትአመን በሕይወትክ።

Deut 28:67 ለእመ ጽብሐ ትብል እፎ እንጋ ይመሲ ወለእመ መስየ ትብል እፎ ይጸብሕ እምነ ፍርሀተ ልብ ዘትደነግፅ ወእምነ ዘያስተርአየክ ውስተ አዕይንቲክ ወዘትፊኢ።

Deut 28:68 ወያገብአክ እግዚአብሔር ውስተ ግብጽ በአሕማር ወእንተ ምድር ኒ በእግር ዝንቱ ዘእቤ ኢትድግሙ እንክ ርእዮታ ዓዲ።

Deut 28:69 ወትከውን በህየ አግብርተ ወአእማተ ለፀርክሙ ወአልቦ ዘየስተምሕረክሙ።

## Chapter 29

Deut 29:01 ወዝንቱ ውእቱ ነገረ ኪዳን ዘአዘዘ እግዚአብሔር ለሙሴ ከመ ይትካየዶሙ ለደቂቀ እስራኤል በምድረ ሞአብ ዘእንበለ ዝክቱ ኪዳን ዘተካየዶሙ በኮሬብ።

Deut 29:02 ወጸውዶሙ ሙሴ ለኩሉ ደቂቀ እስራኤል ወይቤሎሙ ለሊክሙ ርኢክሙ ኩሎ ዘገብረ እግዚአብሔር ለክሙ በምድረ ግብጽ ላዕለ ፈርዖን ወላዕለ መገብቱ ወላዕለ ኩሉ ምድሩ።

Deut 29:03 ዐበይተ መቅሠፍተ ዘርእያ አዕይንቲክ፡፡ ወዝክቱ ተአምር ወመድምም ዐበይተ ወእድ ጽንዕት ወመዝራዕት ልዑል።

Deut 29:04 ወኢወሀበክሙ እግዚአብሔር ልቦ ታአምሩ ወዐይነ ትርአዩ ወእዝነ ከመ ትሰምዑ እስከ ዛቲ ዕለት።

Deut 29:05 ወወሰደክሙ አርብዓ ዓመተ ውስተ ገዳም አልባሲክሙ ኢበልየ ወኢኦሥኦኒክሙኒ ኢበልየ እምውስተ እገሪክሙ።

Deut 29:06 እንዘ እክለ ኢትበልዑ ወወይነ ወሜሰ ኢትሰትዩ እስመ በጸሕክሙ ውስተ ዝንቱ መካን ከመ ታኦምሩ ከመ አነ ውእቱ እግዚአብሔር አምላክክሙ።

Deut 29:07 ወወፅአ ሴዎን ንጉሠ ሔሴቦን ወአግ ንጉሠ ሞአብ ተቀበሉክሙ ይትቃተሉክሙ ወቀተልናሆሙ ወነሥኦነ ምድሮሙ።

Deut 29:08 ወወሀብኩዎሙ ይእተ ምድረ ለሮቤል ወለጋድ ወመንፈቀ ነገደ መናሴ

Deut 29:09 ወወቀቡ ከመ ትግበሩ ኩሎ ነገረ ዝንቱ ኪዳን ከመ ታኦምሩ ኩሎ ዘትገብሩ።

Deut 29:10 ወናሁ ቆምክሙ አንትሙ ኩልክሙ ቅድመ እግዚአ ብሔር አምላክክሙ ዐበይተ ነገድክሙ ወሊቃናቲክሙ ወመኳንቲክሙ ወጸሐፍትክሙ ወኩሉ ተባዕተ እስራኤል።

Deut 29:11 ወአንስቲያክሙ ወውሉድክሙ ወግዩር ዘሀለወ መእከለ ትዕይንቲክሙ እምሓግበ ዕፅክሙ እስከ ሐ(ዋ)ረ ማይክሙ።

Deut 29:12 ከመ ትሰምዑ ኪዳኖ ለእግዚ አብሔር አምላክ(ክሙ) (ወመርገሞ ለእግዚአብሔር አምላክክሙ ዘተካየደ) [ም]ስሌክሙ ዮ(ም)።

Deut 29:13 ከ(መ) ይርሲከ ሕዝቦ ሎቱ ወውእቱኒ ከ(መ) ይኩንከ አምላክከ በከመ መሐ(ለ ለ)አበዊከ ለአ(ብ)ርሃ(ም) ወለይስሐቅ ወለያዕቆብ።

Deut 29:14 ወአኮ ለክሙ በበሐቲትክሙ ዘአቀውም አነ ዘንተ ኪዳነ ወዘንተ መርገመ።

Deut 29:15 አላ ለእለሂ ሀለው ዝየ ዮም ምስሌክሙ ቅድመ እግዚአ ብሔር አምላክክሙ ወለእለሂ ኢ(ሀ)ለዉ ዝየ ምስሌክሙ ዮም።

Deut 29:16 እስመ ለሊክሙ ታኦምሩ ከመ ነበርነ ውስተ ግብጽ ወዘከመ ኅለፍነ እንተ መእከሎሙ ለእልክቱ አሕዛብ ወተዐደውናሆሙ።

Deut 29:17 ወርኢክሙ ርኩሶሙ ወአማልክቲሆሙ ዕፅ ወእብን ወብሩር ወወርቅ ዘገብሩ ለሊሆሙ።

Deut 29:18 ኢይኩን እምኦክሙ ኢብእሲ ወኢብእሲት ወኢሕዝብ ወኢነገድ ወኢመኑሂ ዘያኅድግ ልቦ እመነ እግዚአ ብሔር አምላክክሙ ወይሖር ያምልኮሙ ለእልክት አማልክተ አሕዛብ ወኢይኩን እምኔክሙ ሥርው እኪት እንተ ትቦቅል ወትፈሪ ሕምዘ ወመረተ።

Deut 29:19 ወሰሚዐክሙ ቃለ ዝንቱ መርገመ ዘይቤ በልቡ ይሰሪ ሊተ እስመ በእበድ ልብየ ገበርኩ ወሐርኩ ከመ ኢ(የ)ዐሪ መዊተ መአብስ ምስለ ዘኢአበሳ።

Deut 29:20 ኢይፈቅድ እግዚአብሔር ከመ ይሣህሎ አላ በጊዜሃ መዐቱ በእግዚአ ብሔር ወቀንኡ ለያውዕዮ ለውእቱ ብእሲ ወለይታለዎ ኩሉ ዝንቱ መርገመ ዘዝንቱ ኪዳን ዘጽሑፍ ውስተ ወዝንቱ መጽሐፍ (ሕ)ግ ወለይስዐር እግዚአ ብሔር ስሞ እምነ ታሕት ሰማይ።

Deut 29:21 ወለያግብአ እግዚአብሔር ውስተ እኪት ወለይፍልጦ እምነ ኩሉ ደቂቀ እስራኤል በኩሉ ዝንቱ መርገመ ዘዝንቱ ኩዳን ዘጽሑፍ ውስተ ዝንቱ መጽሐፍ ሕግ።

Deut 29:22 ወይብሉ ድሕረ ትውልደ ደቂቅክሙ እለ ይትነሥኡ እምድጎሬክሙ ወነኪርኒ ዘይመጽእ እምርሑቅ ብሔረ ወይሬኢዩ መቅሠፍታ ለይእቲ ምድር ወደዊሃ ዘፈነወ እግዚአ ብሔር ለዕሌሃ።

Deut 29:23 ትይ ወጼው ይነድድ ውስተ ኩላ ይእቲ ምድር ወኢትዘርእ ወኢትበቅል ወኢይወፅእ ውስቲታ ኩሉ ጎመልሚል በከመ ተገፍትአ ሰዶም ወጎሞራ ወአዳማ ወሴበይም (እ)ለ ገፍትኦን እግዚአብሔር በመዐቱ።

Deut 29:24 ወይብሉ ኩሉ አሕዛብ ለምንት ከመዝ ገብራ እግዚአ ብሔር ለዛቲ ምድር ወምንት ውእቱ መንሱቱ ለዝንቱ መዐት ዐቢይ።

Deut 29:25 ወይብሉ እስመ ጎደጉ ኪዳኖ ለእግዚአብሔር አምላክ አበዊሆሙ ዘተካየደ ምስለ አበዊሆሙ አመ አውፅአሙ እምነ ምድረ ግብጽ።

Deut 29:26 ወሐሩ ወአምላኩ ባዕደ አማልክተ ወሰገዱ ሎሙ ለዛ ኢያአምሩ ወለዘ አይበቀሶሙ።

Deut 29:27 ወተመዐ መዐተ እግዚአብሔር ላዕለ ዛቲ ምድር ወአምጽአ ላዕሌሃ ኩሎ መርገመ ዘጽሑፍ ውስተ ዝንቱ መጽሐፍ ሕግ።

Deut 29:28 ወአሰዐሮሙ እግዚአ ብሔር እምነ ገጸ ምድሮሙ በመዐት ወበመንሱት ወበመቅሠፍት ዐቢይ ክም ይእዜ ዘጎቡእ ለእግዚአ ብሔር አምላክነ።

Deut 29:29 ወዘየሳተረኢስ ለነ ወለውለድነ ለዓለም ከመ ንግበር ኩሎ ዘይብል ዝንቱ ሕግ።

## Chapter 30

Deut 30:01 ወአመ መጽአ ላዕሌኮ ኩሉ ዝንቱ ነገር በረከቱሂ ወመርገሙሂ ዘአቀምኩ ቅድሚክ ተዘከሮ በልብክ በውስተ ኩሉ አሕዛብ ጎበ ዘረወክ እግዚአ ብሔር ህየ።

Deut 30:02 ወተመየጦ ኀበ እግዚአብሔር አምላክክ ወሰማዕ ቃሎ ኩሎ ዘኣነ እኤዝዘክ ዮም በኩሉ ልብከ ወበኩሉ ነፍሰከ።

Deut 30:03 ወየኅድግ ለከ እግዚአብሔር ኀጣይኢከ ወይሣህለከ፡፡ ወካዕበ የሰተጋብኦከ እግዚአብሔር እምነ ኩሉ ኣሕዛብ እለ ውስቴቶሙ ዘረወከ ህየ።

Deut 30:04 ወለእመኒ ውስተ ኣጽናፈ ሰማይ ዘረወከ የሰተጋብኦከ እምህየ እግዚአብሔር ኣላክከ።

Deut 30:05 ወይወስደከ እግዚአብሔር አምላክክ ውስተ ይእቲ ምድር እንተ ዘወረኮ ወተዋረሳ ወይገብር ሠናይተ ላዕሌከ ወያበዝገከ ወይሬሲየከ ፈድፋደ እምነ ኣበዊኮ።

Deut 30:06 ወያሴሰሎ እግዚአብሔር ለዝንቱ ልብከ ወልቦሙ ለዘርእከ ከመ ታፍቅሮ ለእግዚአብሔር አምላክከ በኩሉ ልብከ ወበኩሉ ነፍሰከ ከመ ትሕየወ ኣንተ ወዘርእከ።

Deut 30:07 ወያገብኦ እግዚአብሔር አምላክከ ለዝንቱ መርገም ላዕለ ፀርከ ወላዕለ እለ ይጸልኡከ ወላዕላ እለ ሰደዱከ።

Deut 30:08 ወኣንተሰ ትመየጥ ወሰማዕ ቃለ እግዚአብሔር አምላክከ ወግበር ኩሎ ትእዛዘ ዘኣነ እኤዝዘክ ዮም።

Deut 30:09 ወብዙኅ ያጸንዐከ እግዚአብሔር አምላክከ በኩሉ ተግባረ እደዊከ ወበውሉደ ከርሥከ ወበዘርኦ ምድርከ ወበኣስተዋልዶ እንሰሳከ እስመ ይትመየጥ እግዚአብሔር አምላክከ ከመ ይትፈሣሕ ላዕሌከ በሠናይት በከመ ተፈሥሐ በኣበዊከ

Deut 30:10 እስመ ሰማዕከ ቃለ እግዚአብሔር አምላክከ ከመ ተዕቀብ ወከመ ትግበር ኩሎ ትእዛዘ ወኩሎ ኩነኒሁ ወፍትሐ ዘጽሑፍ ውስተ ዝንቱ መጽሐፈ ሕግ ለእመ ገበእከ ኀበ እግዚአብሔር አምላክከ በኩሉ ልብከ ወበኩሉ ነፍሰከ።

Deut 30:11 እስመ ዛቲ ትእዛዝ እንተ ኣነ እኤዝዘክ ዮም ኢኮነት ክብደ ወኢኮነት ርሕቀት እምኒከ።

Deut 30:12 ወኢኮነት ውስተ ሰማይ ወትበል መኑ የዐርግ ለነ ውስተ ሰማይ ወያመጽኦ ለነ ወንስምዓ ወንግበራ።

Deut 30:13 ወኢኮነት መዕዶተ ባሕር ወትበል መኑ እምዐደወ ለነ መዕዶተ ባሕር ወያመጽኦ ለነ ወያስመዐናሃ ወንግበራ።

Deut 30:14 እስመ ናሁ ቅርብት ይእቲ ለከ ጥቀ ቃለ ውስተ ኣፋከኒ ወውስተ ልብከኒ ወውስተ እደዊከኒ ከመ ትግበራ።

Deut 30:15 ወናሁ ሢመከ ቅድመ ገጽከ ዮም ሕይወተ ወሞተ ሠናይት ወእኪተ።

Deut 30:16 ለእመ ሰማዕክሙ ቃለ እግዚአብሔር አምላክክሙ ወትእዛዛ ኩሎ ዘእነ እኤዝዘክ(ሙ) ዮም ከመ ታፍቅሮ ለእግዚአብሔር አምላክክ ወትሖር በኩሉ ፍናዌሁ ወትዕቀብ ኩነኔሁ ወፍትሖ ወትትበዝኑ ወትሕየው ወይበርከክ እግዚአብሔር በኩሉ ምደር እንተ ውስቴታ ትበወእ ህየ ከመ ትትወረሳ።

Deut 30:17 ወለእመሰ ተመይጥ ልብክ ወአበይክ ሰሚዐ ወሰሕትክ ወሰገድክ ለበዕድ አማልክት ናሁ አይደዕኩክ ዮም ከመ ጠፊክ ትጠፍእ።

Deut 30:18 ወኢይነውኅ መዋዕሌክሙ ውስተ ምድር እንተ ውስቴታ ተዐድው ዮርዳንስ ህየ ከመ ትትዋረስዋ።

Deut 30:19 ናሁ አሰምዕ ለክሙ ዮም ሰማየ ወምድረ ከመ ሢምኩ ቅድሜክ ሕይወተ ወሞተ ወበረከተ ወመርገመ ወኅረያ ለክ ለሕይወት ከመ ትሕየው አንተ ወዘርእክ።

Deut 30:20 ወአፍቅሮ ለእግዚአብሔር አምላክክ ወሰማዕ ቃሎ ወአጽንዖ ኪያሁ እስመ ውእቱ ሕይወትክ በዘ ቦቱ ይነውኅ መዋዕሊክ ከመ ትንበር ውስተ ምድር እንተ መሐለ እግዚአብሔር ለአበዊክ ለአብርሃም ወለይስሐቅ ወለያዕቆብ ከመ የሀቦሙ።

## Chapter 31

Deut 31:01 ወፈጸመ ሙሴ ተናግሮቶሙ ለኩሎ ደቂቀ እስራኤል ኩሎ ዘንተ ነገረ።

Deut 31:02 ወይቤሎሙ ምእት ወዕሥራ ዓም ሊተ ዮም ወኢይክል እንክ በዊእ ወወጊእ ወይቤለኒ ባሕቱ እግዚአብሔር ኢትዐድዎ ለዝንቱ ዮርዳንስ።

Deut 31:03 ውእቱ እግዚአብሔር ዘየሐውር ቅድሜክ ውእቱ ያጠፍአሙ እምቅድመ ገጽክ ለእሉ አሕዘብ ወበከመ እግዚአብሔር ይቤ።

Deut 31:04 ከማሁ ይገበሮሙ በከመ ገብሮሙ ለሴዎን ወለአግ ክልኤቱ ነገሥተ አሞሬዎን እለ ይነብሩ ውስተ ማዕዶተ ዮርዳንስ ወለምድሮሙ በከመ ሠረዎሙ።

Deut 31:05 ወአግብአሙ እግዚአብሔር ለክሙ ወገበርክምዎሙ በከመ አዘዝኩክሙ።

Deut 31:06 ወትባዕ ወጽናዕ ወኢትፍራህ ወኢትደንግፅ ወኢትፀበስ በቅድመ ገጽሙ እስመ እግዚአብሔር አምላክክ ውእቱ የሐውር ቅድሜክ ምስሌክሙ ኢያኅድገክ ወኢያስትተክ፡፡

Deut 31:07 ወጸውዖ ሙሴ ለኢየሱስ ወይቤሎ በቅድመ ኩሎ እስራኤል ትባዕ ወጽናዕ እስመ አንተ ትበውእ ቅድሜሁ ለዝንቱ ሕዝብ ውስተ ምድር እንተ መሐለ እግዚአብሔር ለአበዊክሙ ከመ የሀቦሙ ወአንተ ታ{በ}ውርሶሙ።

Deut 31:08 ወእግዚአብሔር ዘየሐውር ምስሌከ ወኢያዳግከ ወኢያሰትተከ ወኢትፍራህ ወኢትደንግፅ።

Deut 31:09 ወጸሐፎ ሙሴ ለነገረ ዝንቱ ሕግ ውስተ መጽሐፍ ወወሀቦሙ ለካህናት እለ ይጸውሩ ታቦተ ሕጉ ለእግዚአብሔር ለደቂቀ ሌዊ ወለሊቃናቲሆሙ ለደቂቀ እስራኤል።

Deut 31:10 ወአዘዘሙ ሙሴ በይእቲ ዕለት ወይቤ እምድጎረ ሰብዓቱ ዓመት በዓመተ ጎድገት አመ በዓለ መጸለት።

Deut 31:11 አመ የሐውር ኩሉ እስራኤል ከመ የስተርኢ ቅድመ እግዚአብሔር አምላክከ ውስተ መካነ ዘጎረየ አንብብዎ ለዝንቱ ሕግ ቅድመ እስራኤል።

Deut 31:12 አስተጋቢኦ ሕዝብ ከመ ይስምዑ ዕዱ ወአንስቱ ወደቂቁ ወግደራን እለ ውስተ ሀገርክሙ ከመ ይስምዑ ወያእምሩ ፈረሆቶ ለእግዚአብሔር አምላክክሙ ወሰሚረዎሙ ከመ ይግበሩ ኩሉ ሕጎ ለዝንቱ ቃል።

Deut 31:13 ወደቂቆሙኒ እለ ኢያአምሩ ይስምዑ ወይትመሀሩ ፈረሆቶ ለእግዚአብሔር አምላክክሙ በኩሉ መዋዕሊሆሙ ዘየሐይው እሙንቱ ዲበ ምድር እንተ ውስቲታ ተዐድው ዮርዳንስ አንትሙ ከመ ትትዋረስዋ በህየ።

Deut 31:14 ወይቤሉ እግዚአብሔር ለሙሴ ናሁ ቀርቦ መዋዕለ ሞትከ ጸውዖ ለኢየሱስ ወቁሙ ኅብ ኅጎተ ደብተራ ወእኤዝዘ ወሐሩ ሙሴ ወኢየሱስ ውስተ ደብተራ ዘመርጡል

Deut 31:15 ወወረደ እግዚአብሔር በዐምደ ደመና ወቆመ ጥጎተ ደብተራ ዘመርጡል ወቆመ ዐምደ ደመናሂ ኅብ ጥጎተ ደብተራ ዘመርጡል።

Deut 31:16 ወይቤሉ እግዚአብሔር ለሙሴ ናሁ ትነውም አንተ ምስለ አበዊከ ወይትነሣእ ዝንቱ ሕዝብ ወይዜምው ድጎረ አማልክተ ባዕድ ዘውስተ ምድር እንተ ውስቲታ ይበውኡ ወየጎድጉኒ ወይትዔውሩ ኪዳንየ ዘተካየድኩዎሙ።

Deut 31:17 ወእትምዐዕ መዐተ ላዕሌሆሙ በይእቲ ዕለት ወአጎድጎሙ ወእመይጥ ገጽየ እምኔሆሙ ወይከውኑ መብልዐ ለፀሮሙ ወትረክቦ ብዝጎት እኪት ወሥቃይ ወይብል በይእቲ ዕለት እስመ ጎደገኒ እግዚአብሔር አምላኪየ ወኢህለወ ምስሌነ ረከበተኒ ዛቲ እኪት።

Deut 31:18 ወአንሰ መይጥ እመይጥ ገጽየ እምኔሆሙ በይእቲ ዕለት (እስመ) ኩሉ ኅጣኢይሆሙ ዘገብሩ ወገብኡ ኅብ አማልክተ ባዕድ።

Deut 31:19 ወይእዜኒ ጸሐፉ ነገራ ለዛቲ መጎሌት ወመሀርዎሙ ለደቂቀ እስራኤል ወደይዋ ውስተ አፉሆሙ ከመ ትኩኑኒ ስምዐ ላዕለ ደቂቀ እስራኤል።

Deut 31:20 እስመ አበውኦሙ ውስተ ምድር ቡርክት እንተ መሐልኩ ለአበዊሆሙ ምድረ እንተ ትውሕዝ ሐሊቢ ወመዓር ወበሊዎሙ ወጸጊቦሙ የዐብዱ ወይገብኡ ኅብ አማልክተ ባዕድ ወያመልኩዎሙ ወያምዕዑኒ ወየጎድጉ ኪዳንየ።

Deut 31:21 ወትቀውም ላዕሌሆሙ ዛቲ መኅሌት ስምዕ ቅድመ ገጽሙ እስመ ኢትትረሳዕ እምውስተ አፉሆሙ ወእምውስተ አፈ ውሉዶሙ እስመ አነ አእምር እከይሆሙ ኩሉ ዘገብሩ በዝየ እንበለ አብእሙ ውስተ ይእቲ ምድር ቡርክት እንተ መሐልኩ ለአበዊሆሙ።

Deut 31:22 ወጸሐፋ ሙሴ ለዛቲ መኅሌት በይእቲ ዕለት ወመሀሮሙ ኪያሃ ለደቂቀ እስራኤል።

Deut 31:23 ወአዘዘ ሙሴ ለኢየሱስ ወይቤሎ ጽናዕ ወትባዕ እስመ አንተ ታብውኦሙ ለደቂቀ እስራኤል ውስተ ምድር እንተ መሐለ እግዚአብሔር ለአበዊሆሙ ወውእቱ ይሂሉ ምስሌከ።

Deut 31:24 ወሶበ አኅለቆ ሙሴ ጽሒፎቶ ለዝንቱ ነገረ ሕግ ውስተ መጽሐፍ እስከ ፈጸሞ አዘዞሙ ለሌዋዊያን እለ ይጸውሩ ታቦተ ሕጉ ለእግዚአብሔር።

Deut 31:25 ወይቤሎሙ ንሥኡ ዘንተ መጽሐፈ ወአንብርዎ ውስተ ከርሣ ለታቦተ ሕጉ ለእግዚአብሔር አምላክክሙ ወይንበር ህየ ስምዕ ለከ።

Deut 31:26 እስመ አነ አእምር ወሐኮትከ ወክሳድከ ጽኑዕ ዘእንዘ አነ ሀለውኩ ዓዲየ ሕያው ዮም አምዕዕክምዎ ለእግዚአብሔር እፎኬ ፈድፋደ እምድኅረ ሞትኩ።

Deut 31:27 አስተጋብኡ ኀቤየ ዐበይተ ነገድክሙ ወሊቃናቲክሙ ወመኳንንቲክሙ ወጸሐፍትክሙ ከመ እንግሮሙ ይስምዑ ኩሉ ዘንተ ነገረ ወአስምዕ ላዕሌሆሙ ሰማየ ወምድረ።

Deut 31:28 እስመ አእምር ከመ እምድኅረ ሞትኩ አበሳ ትኤብሉ ወተኅድግዎ ለፍኖት እንተ አዘዝኩክሙ ወትመጽእ ላዕሌክሙ በዳኅሪ መዋዕል እስመ ትገብሩ እኪተ ቅድመ እግዚአብሔር አምላክክሙ ከመ ተምዕዕዎ በግብረ እደዊክሙ።

Deut 31:29 ወነገሮሙ ሙሴ ወአስምዖሙ ለኩሉ ማኅበረ እስራኤል ነገራ ለዛቲ መኅሌት ፍጹም።

## Chapter 32

Deut 32:01 ወይቤ አጽምእ ሰማይ ወስማዕ ምድር ቃለ አፉየ።

Deut 32:02 ወተወከፍዎ ከመ ዝናም ለነገርየ ወይወርድ ከመ ጠል ነቢብየ ከመ ዝናም ውስተ ገራህት ወከመ ጊሜ ውስተ ሣዕር

Deut 32:03 እስመ ስመ እግዚአብሔር ጸዋዕኩ ሀቡ ዕበየ ለአምላክነ እግዚአብሔርሰ።

Deut 32:04 ጽድቅ በምግባሩ ወርቁዕ ኩሉ ፍናዊሁ እግዚአብሔር ጻድቅ ወአልቦ ዓመፃ ጻድቅ ውኄር እግዚአብሔር።

Deut 32:05 አበሱ ወአኮ ሎቱ ውሉደ ርኩሳን ትውልድ ዕሉት ወግፍትእት ከመዝኑ ተዐስይዎ ለእግዚአብሔር።

Deut 32:06 ዝሕዝብ አብድ ወአኮ ጠቢብ አኮኑ ዝንቱ አብ ዘፈጠረከ ፈጠረከኒ ወገብረከኒ።

Deut 32:07 ተዘከሩ መዋዕለ ትካት ወሐልዩ ዓመተ ተውልደ ትውልድ ተሰአሎ ለአቡከ ወይነግረከ ወለሊቃውንት ወይዜንውከ።

Deut 32:08 አመ ከፈሎሙ ልዑል ለአሕዘብ ወዘከመ ዘርእሙ ለደቂቀ አዳም ወሠርዖሙ ለአሕዛብ በበ ደወሎሙ ወበበ ጥልቆሙ ለመላእክተ እግዚአብሔር።

Deut 32:09 ወኮነ ያዕቆብ መክፈልተ ሕዝቡ ለእግዚአብሔር ወእስራኤልኒ ሐብለ ርስቱ።

Deut 32:10 ወአጽገቦሙ በምድረ ገዳም በብሔረ ጽምእ ወሃፍ በብሔረ በድው ወመገቦሙ ወመርሐሙ ወዐቀቦሙ ከመ ብንተ ዐይን፡ ፡

Deut 32:11 ከመ ንስር ያስተጋብእ እጐሊሁ ታሐተ ክነፊሁ ወከመ የሐቅፍ እጐሊሁ በገበዋቲሁ ወሐዘሎሙ በክነፊሁ ወጸሮሙ በእንግድዓሁ።

Deut 32:12 እግዚአብሔር በሕቲቱ መርሐሙ ወአልቦ ምስሌሆ(ሙ) አምላክ ነኪር።

Deut 32:13 ወአዕረጎሙ ዲበ ኀይላ ለምድር ወሴሰዮሙ እክለ ገራውህ ወሐፀኖሙ በመዓር እምኩኩሕ ወበቅብእ እምእብን ጽንዕት።

Deut 32:14 በቅብአ እጐልት ወበሐሊብ አባግዕ ምስለ መቀሳሰል ጠሊ ወላህም ወእጐሉ አልህምት ወአበግዕ ምስለ ቁቀሐ ስርናይ ወደመ አስካል ሰተዩ ወይነ።

Deut 32:15 ወበልዐ ያዕቆብ ወጸግበ ወከረዮ ጽጋብ ለምዙሕ ሠብሐ ወገዝፈ ወርሕበ ወሐደጎ ለእግዚአብሔር ፈጣሪሁ ወርሕቀ እምእግዚአብሔር ሕይወቱ።

Deut 32:16 ወወሐኩኒ በዘ ነኪር ወአምረሩኒ በርኩሶሙ።

Deut 32:17 ወሦዑ ለአጋንንት ወአኮ ለእግዚአብሔር ለአማልክት እለ ኢያአምሩ አማልክተ ግብት እለ ኢይበቀሁ እለ ኢያአምሩ አበዊሆሙ።

Deut 32:18 ውደጎ ለእግዚአብሔር ዘወለደከ ወረሳዕኮ ለእግዚአብሔር ዘሐፀነከ።

Deut 32:19 ወርእየ እግዚአብሔር ወቀንአ ወተመዐ መዓተ ለደቂቆሙ ወአዋልዲሆሙ።

Deut 32:20 ወይቤ እመይጥ ገጽየ እምኔሆሙ ወእር(እ)ዮሙ ዘይከውን በደጋሪቶሙ እስመ ትውልደ ዓላዊያን እሙንቱ ውሉድ እለ አልቦሙ ሃይማኖተ።

Deut 32:21 እሙንቱ አቅንኡኒ በዘ ኢኮነ አምላክ ወአምዕዑኒ በአማልክቲሆሙ ኣነ አቀንኦሙ በዘ ኢኮነ ሕዝበ ወአምሥሙ በሕዝብ ዘኢይሌብው።

Deut 32:22 እስመ እሳት ትነድድ እመዐትየ ወታውዒ እስከ ሲኦል ታሕቱ ወትበልዖ ለምድር ወለፍሬሃ ወይነድድ መሰረታተ አድባር።

Deut 32:23 ወአስተጋብኦሙ ለእኪት ወአኅልቅ አሕጻየ በላዕሌሆሙ (ወይኅልቁ) በረኅብ ወይከውን መብልዓ ለአዕዋፍ።

Deut 32:24 ወይደክም ጽንዖሙ ወእፌኑ ለዕሌሆሙ ስነ አራዊተ ምድር ምስለ ሕምዝ ከመ ይጉይዩ እምድር።

Deut 32:25 ወበአፍኦ ያጸምቶሙ መጥባኅት ለውሉዶሙ ወበውስተ አብያቲሆሙ ድንጋዒ ለወራዙቶሙ ምስለ ድናግሊሆሙ ወለሕፃናቲሆሙ ምስለ አእሩጊሆሙ።

Deut 32:26 ወእቤ ከመ እዝርዎሙ ወእስዐር እምድር ዝክሮሙ ወእምእፄለ እመ ሕያው።

Deut 32:27 በመዐት ፀረ ኮኑኒ ከመ ኢይትዐበዩ ፀር ወይበሉ እዴነ ጸንዐት ወአኮ እግዚአብሔር ዘገብሮ ለዝ ኩሉ።

Deut 32:28 እስመ ሕዝብ ሕጉላነ ምክር እሙንቱ ወአልቦሙ ምልሐ ወሃይማኖተ።

Deut 32:29 ወኢሐለይዎ ከመ ያእምርዎ ለዝንቱ ወያእምርዎ በመዋዕል ዘይመጽእ።

Deut 32:30 እፎ ያነትሆሙ አሐዱ ለዐሠርቱ ምእት ወክልኤቱ ይሰድድዎሙ ለእልፍ እስመ እግዚአብሔር ፈደዮሙ ወአምላክነ አግብኦሙ።

Deut 32:31 እስመ ኢኮነ ከመ አምላክነ አማልክቲሆሙ ወፀርነሰ አብዳን።

Deut 32:32 እስመ ከመ ዐጸደ ወይነ ሰዶም ዐጸደ ወይኖሙ ወሐረኅሙኒ እምነ ግሞራ ወአስካሎሙኒ አስካለ ሐሞት ወቀምኖሙኒ መሪር።

Deut 32:33 ወሕምዘ አርዌ ምድር ወይኖሙ ሕምዘ አፍዖት ዘይቀትል።

Deut 32:34 አኮኑ ዝንቱ ትእዛዝ እምኅቤየ ወተኅትመ ውስተ መዛግብትየ።

Deut 32:35 በዕለተ ኩነኔ እትቤቀሎሙ ወበጊዜ ይድሕፅ እግሮሙ እስመ ቀርበት ዕለተ ኅልቆሙ እስመ በጽሐ ወድልው ውእቱ ለክሙ።

Deut 32:36 እስመ ይፈትሕ እግዚአብሔር ለሕዝቡ ወይትናበብ በእንተ አግብርቲሁ እስመ ርእዮሙ ተመስው ወኅልቁ ወተዘንጉጉ በኅበ ሀለው።

Deut 32:37 ወሶበ ሠርሑ ይቤ እግዚአብሔር አይቱ እሙንቱ አማልክቲክሙ እለ ትትዌከሉ ቦሙ።

Deut 32:38 እለ ትበልዑ መሳብሕተ መሥዋዕቶሙ ወትሰትዩ ወይነ ሞጸኅቶሙ ለይትነሥኡ ወይርድኡክሙ ወለይኩኑክሙ መድኅኒክሙ።

Deut 32:39 አእምሩ አእምሩ ከመ አነ ውእቱ ወአልቦ ባዕደ አምላክ ዘእንበሌየ አነ እቀትል ወአሐዩ እቀሥፍሂ ወእሣህልሂ ወአልቦ ዘያመስጥ እምእዴየ።

Deut 32:40 እስመ አሌዕል ውስተ ሰማይ እዴየ ወእምሕል በየማንየ ወእብል ሕያው አነ ለዓለም።

Deut 32:41 ወአበልሐ ከመ መብረቅ ለመጥባኅትየ ወትቀውም እዴየ በኩነኔየ ወእትፈደዮሙ በቀለ ለፀርየ ወእትቤቀሎሙ ለጸላእትየ።

Deut 32:42 ወአሰክሮን በደሞሙ ለአሕጸየ ወይበልዕ ሥጋሆሙ መጥባኅትየ እምደመ ቅቱላን ወዚውዋን ወኣርእስተ መላእክተ ፀር።

Deut 32:43 ይትፌሣሕ ኩሉ ሰማያት ኅቡረ ወይሰግዱ ሎቱ ኩሉ መላእክተ እግዚአብሔር ወይትፌሥሑ ሕዝብ ምስለ ሕዝቢሆሙ ወይብሉ ኩሎሙ ውሉደ እግዚአብሔር ጽኑዕ ውእቱ።

Deut 32:44 እስመ ይትቤቀል ደመ ደቂቄ ወይትቤቀል ወይትፈደዮሙ በቀለ ለፀሩ ወይትፈደዮሙ ለጸላእቱ ወያነጽሕ እግዚአብሔር ምድረ ለሕዝቡ።

Deut 32:45 ወጸሐፉ ሙሴ ለዛቲ መኅሌት በይእቲ ዕለት ወመሀሮሙ ለደቂቀ እስራኤል፡፡ ወቦኣ ሙሴ ወነገሮሙ ለሕዝብ ውእቱ ወኢየሱስ ወልደ ኔዌ።

Deut 32:46 ወሶበ አኅለቀ ሙሴ ነገሮቶሙ ለኩሉ እስራኤል ወይቤሎሙ ተዐቀብዎ በልብክሙ ለኩሉ ዝንቱ ነገር ዘአስማዕኩ አነ ላዕሌክሙ ዮም ዘትኤዝዙ ለደቂቅክሙ ዮም ከመ ይዕቀቡ ወይግበሩ ኩሎ ነገሮ ለዝንቱ ሕግ።

Deut 32:47 እስመ ከንቱ ዝንቱ ነገር ለክሙ እስመ ውእቱ ሕይወትክሙ ወበበይነ ነገር ይነውኅ መዋዕሊክሙ ውስተ ምድር እንተ ላቲ ተዐድው ዮርዳንስ ከመ ትትዋረስዎ በህየ።

Deut 32:48 ወነበቦ እግዚአብሔር ለሙሴ በይእቲ ዕለት ወይቤሎ ዕረግ ውስተ ደብረ አባሪም ዘውስተ ደብረ ናቦር ዘውስተ ምድረ ሞአብ ዘመንገለ ገጸ ኢያሪኮ ወርኢያ ለምድረ ከናኣን እንተ እሁቦሙ ለደቂቀ እስራኤል ይምልክዎ።

Deut 32:49 ወሙት በውስተ ደብር ዘውስቱቱ ተዐርግ ህየ ውእቱ ኅበ ሕዝብክ በክመ ሞተ ኣሮን እኑክ በውስተ ደብረ ሆር ወአተወ ኅበ ሕዝቡ።

Deut 32:50 እስመ ክሕድክሙ በቃልየ በኅበ ደቂቀ እስራኤል በአ(ው)አ{ው}ደ ማየ ቅሥት በቃዴስ በገዳም ዘሲና እስመ ኢቀደስክሙኒ ውስተ ደቂቀ እስራኤል።

Deut 32:51 ወርኢያ ለይኢቲ ምድር ቅድሜክ ወህየሰ ኢትበውኢ።

## Chapter 33

Deut 33:01 ወከመዝ ይኢቲ በረከት እንተ ባረከሙ ሙሴ ለደቂቀ እስራኤል ብእሴ እግዚአብሔር ዘእንበለ ይሙት።

Deut 33:02 ወይቤ እግዚአብሔር እምነ ሲና መጽእ ወአስተርአየኒ በሴይር ወአዕረፈ በደብረ ፋራን ምስለ አእላፈ ቃዴስ እለ እምየማኑ መላእክቲሁ ወእለ ምስሌሁ።

Deut 33:03 ወምሕኮ ለሕዝቡ ወለእለ ተቀደሱ በእደዊሁ ወእሉሂ እሊኣክ እሙንቱ።

Deut 33:04 ወረከቡ ሕገ በቃለ ዚአሁ ዘአዘዘን ወርስተ ለሕዝብ ያዕቆብ።

Deut 33:05 ወይከውን መልኣክ እምውስተ ፍቁር ተጋቢአሙ መላእክተ አሕዛብ ምስለ ነገደ እስራኤል።

Deut 33:06 አጎሥሦ ለሮቤል ወኢይሙተኒ ወይኩን ብዙኅ ጥለቀሁ።

Deut 33:07 ወበዛቲኒ ለይሁዳ ስምዖ እግዚአ ቃሎ ለይሁዳ ወይ(ግ)ባእ ውስተ ሕዝቡ ወእደዊሁ ይኩንናሁ ወኩኖ ረዳኤ እምነ ፀሩ።

Deut 33:08 ወለሌዋዊኒ ይቤሎ አግብኡ ለሌዊ ቃሎ ወጽድቆ ለብእሲ ጻድቅ ዘአመከርዎ መከራ ወፀአልዎ በኅበ ማየ ቅሥት።

Deut 33:09 ዘይብሎ ለእሙ ወለአቡሁ ኢርኢኩክ ወበአኅዊሁኒ ኢያእመረ ወበደቂቁኒ ኢለበወ ወዐቀበ ቃለክ ወተማ(ሕ)ፀነ ኪዳንክ።

Deut 33:10 ከመ ይንግሩ ኩነኔክ ለያዕቆብ ወሕገክ ለእስራኤል ወከመ ይደዩ ዕጣነ ለመዐትክ ወበኩሉ ጊዜ ውስተ ምሥዋዒክ።

Deut 33:11 ወባርክ እግዚአ ኀይሎ ወተ(ወ)ከፍ ግብረ እደዊሁ ወአውርድ ክበደ ላዕለ እለ ይትቃወምዎ ፀሩ ኢትንሥኦሙ ለእለ ይጸልእዎ።

Deut 33:12 ወለብያምኒ ይቤሎ ፍቁረ እግዚአብሔር የኀድር ተአሜኖ ወእግዚአብሔር ይጼልሎ በኩሉ መዋዕሊሁ ወያዐርፍ መእከለ መታክፍሁ።

Deut 33:13 ወለዮሴፍኒ ይቤሎ እምነ በረከተ እግዚአብሔር ምድሩ ወእምነ ዝናመ ሰማይ ወጠል ወእምነ ነቅዐ ቀላይ ዘእምታሕቱ።

Deut 33:14 ወለ ሰዐቱ እክሉ ወእምነ ሥርቀተ ፀሐይ ወእምነ ጥለቀሆሙ ለአውራጎ።

Deut 33:15 ወይቀድም እምውስተ አርእስተ አድባር ወእምውስተ አርእስተ አውግር ዘኤናዎን።

Deut 33:16 ምድር እንተ ዘልፈ ጽግብት ወሠናይት ለዘ አስተርአየ በውስተ ዕፀተ ባጦስ ለይምጽእ ዲበ ርእሱ ለዮሴፍ ወበርእሱ ይከበር ውስተ አኅዊሁ ከመ በኩረ ላህም ሥኖ።

Deut 33:17 ወአቅርንት ዘአሐዱ ቀርኑ አቅርንቲሁ ወይወገኦሙ ለአሕዛብ ቦሙ ኅቡረ እስከ አጽናፈ ምድር ዝንቱ አእላፍ ዘኤፍሬም ወዝንቱ አእላፍ ዘመናሴ።

Deut 33:18 ወለዛብሎንሂ ይቤሎ ተፈሣሕ ዘቡሎን በፀአትከ ወይስካር በመኃድሪክ እለ ያጠፍእዎሙ ለአሕዛብ።

Deut 33:19 ወጸውዑ በህየ ወሡዑ መሥዋዕተ ጽድቅ እስመ በዕለ ባሕር የሐፅነከ ወንዋዮሙ ለእለ ይነብሩ ውስተ ጳራሊያ።

Deut 33:20 ወለጋድሂ ይቤሎ ረሐቢ በረከቱ ለጋድ ከመ አንበሳ ቀጥቂጦ መዝራዕተ መላእክት።

Deut 33:21 ወርእየ ቀዳሚሁ ከመ በህየ ተካፈልዎ ለምድረ መላእክት እንዘ ጉቡአን መሳፍንት ኅቡረ ምስለ መልአከ ሕዝብ ወምስለ ሕዝብ እስራኤል እግዚአብሔር ገብረ ኩነኔሁ ወጽድቀ ምስለ እስራኤል።

Deut 33:22 ወለዳንሂ ይቤሎ ዳን እጼለ አንበሳ ወይሠርር እምነ ባሳን።

Deut 33:23 ወለንፍታሌምኒ ይቤሎ ንፍታሌም ጽጉብ እምነ ሠናይት ወይጽግብ እምነ በረከተ እግዚአብሔር ወለይትዋረስ ባሕረ ወሊበ።

Deut 33:24 ወለአሴሂ ይቤሎ ቡሩክ ውእቱ እምነ ውሉደ አሴር ወይከውን ኅሩየ ለአኃዊሁ ወይኅፅብ በቅብእ እገሪሁ።

Deut 33:25 ወዘኅጺን ወዘብርት አሥአኒሁ ወይከውን በከመ መዋዕሊከ ኅይልከ።

Deut 33:26 አልቦ ከመ አምላኩ ለፍቁር ዘይነብር ውስተ ሰማይ ውእቱ ረዳኢከ ወዕበየ ሥኑ ለሰማይ።

Deut 33:27 ወይክድንከ እግዚአብሔር ፍጽመ በኅይለ መዝራዕተ ኤኤናዎን ወይወፅእ እምቅድመ ገጽከ ፀር በከመ ይቤ ከመ ያጥፍኦሙ።

Deut 33:28 ወታነብሮ ለእስራኤል ተአሚኖ ባሕቲቶ ውስተ ምድረ ያዕቆብ ውስተ ምድረ ስርናይ ወወይን ወሰማይኒ ለከ ምስለ ደመና ወጠል።

Deut 33:29 ወብፀዕ አንተ እስራኤል መኑ ከማከ ሕዝብ ዘእግዚአብሔር ያድኅኖ ወያጸንዐከ ረዳኢከ ወበመጥባኅትከ ዕልገትከ ሐሰው ፀርከ አንተ ትጸዐን ላዕለ ክሳዳቲሆሙ።

## Chapter 34

Deut 34:01 ወዐርገ ሙሴ እምነ አራባድ ዘሞክብ ውስተ ደብረ ናቦት ውስተ ርእሰ ፈሰጋ ዘሀለወ ቅድመ ኢያሪኮ ወ(አ)ርእዮ እግዚአብሔር ኩሎ ምድረ ገላአድ ወኩሎ ምድረ ንፍታሌም ወኩሎ ምድረ መናሴ ወኩሎ ምድረ ይሀዳ እስከ ደጋሪት ባሕር።

Deut 34:02 ወገዳሙ ወአድያሚሃ ለኢያሪኮ ሀገረ ፊንቆን እስከ ሴይር።

Deut 34:03 ወይቤሎ እግዚአብሔር ለሙሴ ዛቲ ምድር እንተ መሐልኩ ለአብርሃም ወለይስሐቅ ወለያዕቆብ ወይቤሎሙ ለዘርእክ እሁባ ወናሁ አርአይኩከሃ ወህየ ባሕቱ ኢትበውእ።

Deut 34:04 ወሞተ ሙሴ ቊልዔሁ ለእግዚአብሔር በምድረ ሞክብ በቃለ እግዚአብሔር።

Deut 34:05 ወቀበርዎ ውስተ ምድረ ቅሩብ ቤተ ፌጎር ወአልቦ ዘያኦምር መኑሂ መቃብሮ እስከ ዛቲ ዕለት።

Deut 34:06 ወምእት ወዕሥራ ዓመት ሎቱ ለሙሴ አመ ሞተ ወኢተኅምጋ አዕይንቲሁ ወኢማሰና።

Deut 34:07 ወበከይዎ ደቂቀ እስራኤል ለሙሴ በአራቦት ዘሞክብ በኅብ ዮርዳንስ ዘመንገለ ኢያሪኮ ሠለሳ መዋዕለ ወተፈጸመ መዋዕለ ላሑ ለሙሴ ዘበ(ከ)ይዎ።

Deut 34:08 ወኢየሱስ ወልደ ኔዌ ተመልአ መንፈስ ጥበብ እስመ ወደየ እደዊሁ ሙሴ ላዕሌሁ ወተአዘዙ ሎቱ ኩሎ ደቂቀ እስራኤል ወገብረ ኩሎ ዘከመ አዘዞ እግዚአብሔር ለሙሴ።

Deut 34:09 ወኢትንሥኦ እንከ ነቢይ ውስተ እስራኤል ዘከመ ሙሴ ዘተናገሮ ለእግዚአብሔር ገጸ በገጽ።

Deut 34:10 ወበኩሎ ተአምር ወመድምም ዘፈነዎ እግዚአብሔር ከመ ይግበሮ በምድረ ግብጽ ለዕለ ፈርዖን ወላዕለ መገብቱ ወላዕለ ምድሩ።

Deut 34:11 ዐበይተ መድምም ወእድ ጽንዕት ወመዝራዕት ልዑል ኩሎ ዘገብረ ሙሴ በቅድመ ኩሎ እስራኤል።

ዳግም ሕግ: :

